

近代中國史料叢刊續編第四十輯  
沈雲龍主編

頁十

盒

集

鄧濂著·裘可仁編

文海出版社

有限公司

印

行

顏升盦集

敦世



本書承

楊愷齡代表惠借景印特此致謝

文海出版社謹啓

顛  
卅

盞

集

敦  
世



詩人鄧石瞿小傳

楊愷齡

詩人姓鄧氏，諱濂，字似周，一字石瞿，遜清江蘇省金匱人也。性敦厚，沉默寡言。生咸豐五年乙卯，五歲始就讀，卽聰穎守繩墨，肆志詩文，嘗從業邑大儒秦澹如先生緇業之門，與同邑華若溪裘葆良暨先伯祖範甫公先叔祖仁山公先外王父秦叔固公先外從叔祖湘臣公，同品題爲梁溪七子，一時聲華籍甚。年方二十，作客四明，得太守宗湘文觀察激賞，延參府幕，並敦課其公子子容子戴昆仲，由是往來浙東西，詩名益盛。年二十六失怙。無何，伯兄紹曾及仲姊瑜又相繼卒，母于太宜人諱懿字靜宜憶女甚，乃遠游武昌，明年秋，遽遘中風，迨迎歸故鄉，越年又卒。服闕，赴蘇州從事書局，並爲陸

廉使記室，旋廉使解任，書局又告撤。曾講學於江夏書院，與譚仲修山長，謝鍾英孝廉，屠靜山孝廉等，琴酒唱和爲樂。時南皮張文襄公方開府兩湖，亟禮聘司主筆札，賓主雖深契慕，但厄於臧倉，不久卽賦歸。嗣後橐筆四方，傭書迭更，終以所遇輒左，窮愁憔悴，顧詩文辭則日益工瞻典麗，爲當世所推重。光緒二十五年己亥，鬱鬱病卒於里邸，年僅四十有五。元配狄湘字韻簫，亦工詩文，先卒，子滌生，孫阿筠，並能傳其學行。遺槧彙集詩二卷詞一卷，爲甥諸季遲以仁所輯，同邑廉南湖補詩一卷文七篇，常熟宗子戴同邑丁仲祐續補遺詩二卷文十二篇，共增爲十七卷，民國二十三年裘葆良可桴醵資倩武進劉亞康寫仿宋字上石，印行問世，亦所以酬

良友之託。愷獲參與編校，書成隨諸行篋，屢經戰亂，幸無散佚，屈指歲月，忽忽逾四十年矣。





聶盦集原序

舅氏聶盦先生遺稿光緒辛丑十一月先妣鄧淑人臨歿之日  
諄命以仁編訂問世癸卯正月奉先考崑山公諱營喪既畢乞  
食四方攜而之楚復之湘戊申在長沙提學使署筆札餘暇從  
容掇拾釐爲詩二卷詞一卷先生生平行麻略具於是亟擬序  
而傳之而回澣哀鞮魂搖心折援筦哽咽迄難成文淹滯至今  
垂垂老矣慙先朝露竟致失墜適繼準表弟息勞戎馬同客舊  
都因舉以相付忍淚和墨謹贅卷端於庠印擘碧穹放愁萬古  
頰斫玄壤沈恨九幽長離瘖而謝時詹諸泣而感魄墮懷之始  
隨和不華束髮以往干莫婁鈍仇於面者无道之神親於旁者  
伯龍之鬼匪莪伊蒿哀哀父母有杖之杜眾羣兄弟潘岳喪妻  
蒼茫而眊天日王戎思友掩噎而慟山河學究孟荀而坐慳白

身會集  
首志存稷契而無補蒼生即茲香草孤芬等夫落花零緒卽永  
嘉夢還之錦誰收灰螻李昌谷嘔賸之血幾化唳鵲骨蕭寥兮  
已塵歲搖落兮成世晦久必顯鬱極斯昌誦東阿十言羊子猶  
溫舅澤抱劍南一集陸郎能刻父書幸慰遙靈冀申永悼己巳  
十月杭縣諸氏甥以仁識于北平寓廬

聃盦集序

鄧似周聃盦遺詩二卷詞一卷廉南湖得於似周甥杭諸李逢益以遺詩補一卷謀傳世未果而南湖沒余與常熟宗子戴同里丁仲祐復益以遺詩續補二卷爲印行文皆散佚南湖搜求所得才四篇今增十五篇別爲卷附於末似周客游時多往往終歲不一面其歸也余必往訪之一日有憂色問其故不言繼乃太息曰吾自少無壯懷故勢位富厚不吾及非吾憂吾特憂所著詩文不傳姓名與生命同盡耳余曰古詩三千存者三百存其詩非存其人故詩人姓氏率湮沒不可得知微獨詩古書亦不署撰人名字蓋各有著書之宗旨而非以求名降及周秦諸子尚復爾厥後思想頓絕而詞章之士興名之所歸天下之士靡然從風其間傑出之才亦猶奇花異卉得天獨美愛美又

人類之天性也必且珍視之優養之庇護之佳種流傳因以不絕顧其生存之率卒不敵滅亡之多詩文之美如之自上古迄今存者歷歷可數亡者誰復知其幾何其能傳世至數百千年之久者幸也他力爲之也凡諸撰述必藉他力而後能傳又必藉他力而後能久莫爲之後雖美勿傳以故恣君天才之所能至不徒爲世欣賞亦且足以自娛是即天之所以寵君過於人者矣千秋萬歲之事非君所能爲力尤非今所能預知况值國勢凌夷會當變革之時乎憂也不如其已君曰孔子不云百世可知耶余曰繼周之秦適與孔子所料相反事實昭示不可掩也何百世之能知微獨孔子自庖犧以來仰觀俯察智創巧述之遺風傳至墨子斬焉中絕遂令後世子孫百不如人爲人魚肉如今日矣古時制器尚象諸先哲又寧能料及因相與歎

息久之君復言曰白話興文言廢文學必亡此非不可預知者  
子果何惡於文言而欲廢之乃復答曰余安能廢文言哉文言  
特號爲士者嗜之余不忍坐視全民受困於不易解之文字故  
欲以白話代之耳君獨不覩篆書一變爲隸再變爲楷乎今楷  
書盛行幾二千年而篆隸不廢此其先例矣好古者任自爲之  
異時文學或且勝於古人亦猶近世治許學者古人不能及也  
君曰否否文白必不能並存爭甚力然亦頗奇余言踰年君卒  
戊戌政變之明年也君爲人篤於兄弟之愛取友喜樸直見人  
爭利祿相傾軋輒耻之顧於文學頗自矜異既不得志於科名  
則挾其所爲詩若文遨遊吳越江漢間當是時諸公貴人猶皆  
崇尚風雅喜宏獎故君所至蒙優禮受厚薪或遂以君未遭世  
變爲幸然余頗惜君早世不能見古人所未見聞古人所未聞

君卒時年四十五民國二十一年八月二十五日七十六叟裘可桴

大白之爭始於前清戊戌似周與余二人是時余方與里中諸同志創行無錫白話報繼加官音二字示非土語繼又別爲論說附報行鼓吹白話甚力君意不我同也故以文學將亡爲慮後二十餘年余與錢子泉基博復有文白之爭而內容絕異前以口舌後以書翰所操爭具亦絕異而爭點之不易解決則同予維音嘵嘵僅足供異時治無錫報史教育史之資料而已可桴附註

驟盦集前四卷皆諸君季遲編次有季遲原序及跋原序下有南湖季遲及王孫二君題詞此爲南湖寫定本今悉仍之南湖卒前二月以寫本寄寒厓校閱並轉示不佞屬爲序未

及寄還而南湖沒後三卷由宗君子戴編次合前後爲七卷  
寫宋體字上石秦君湘臣侯君暉華任校讐顧君紹衣馮君  
緒承楊君愷齡佐之寫畢非特南湖不及見即宗君亦已與  
世長辭矣歎惋不已時在二十三年十二月長至後一日可  
梓又註

八

武進劉亞康書



集與與諸季遠商訂就其篋中所有再加增補共得詩  
三百廿首詞八十三闕兩家互鈔校改多次經柯風孫王書衡  
兩先生閱過至今日總算寫出清本來在病榻以醫眼校  
讀一編精神越滯頭白昏、不知其中尚有可刪及誤字否  
千秋之業對於吾友不妨過於務真耶幸

鑒定并乞題詞或撰序亦吾儕後先責也季遠擬約

遠廬以行楷精書付印恐不易成鄙意交中華書局

用仿宋體印行亦為不惡

印費千餘始七八百元  
尚未籌備不知予能出否

不謂如何

閑後法

他人家

寒屋也

解

稿

明

丁氏

冷紅

耳

明翠樓集贊

鞠隱山莊遺詩序

懷雲詞序

清之居集序

已劄得鄭先生文四篇

可存先生侍者羅金遺詩十

紙已錄刻敬惟原稿奉微

現與李道刻竟授求世前

詩三百三十首詞八十三闕惟

欠太少亦肯四篇乞

必於朋好中代為訪求至

咸至奇亦頌

道祺 未學羅金謹上

八月廿九日

此三篇一遺詩 卷四一 詞序

可存先生執事遺傳日長世仰之

據無以爲痛而長

與居者福不遠近年大病不化者年乃

以日緣得見羅金先生遺稿錄其

卷之四謂李道所錄者有福在節世

凡羅金遺稿任式昌收刊行不果日

沈李道屬書乞得者竹風錄王書衡

為先生贊定凡詩一百一十五首八何則十

往者字力則有本安處可為改定詞四

十九則風浪文采足見一經修承碩泥

先生將示至爲自錄一紙以問抄者只

有始見自錄有或一首餘皆不存以此

知羅金遺稿一散出者多矣乞

屬錄書者妙何以復編遺之至賜在

年單金上歸於詩敬求抄序三篇日

年中亦尚者記若者已此頃沈先生登

敬微亦能詩二十篇一併付印於願

足矣中社有心人乎沈法若所幸

便及之必解廣焉按集也之世悲勝

賦感也兩年自少不越其先以刊

學康辰生仍時外而和富玩

極越整言一經五年方能斷於念

羅金集序  
夫世不能存、法  
漢子七首在集中  
當其傑作也  
情以定、

羅金集序  
夫世不能存、法  
漢子七首在集中  
當其傑作也  
情以定、

## 附南湖遺墨

侯君擘華雅慕南湖之爲人觀此遺墨  
愛不忍釋請附印於題詞之後余笑曰  
毋乃爲蛇添足乎然擘華持之堅且謂  
南湖苦心不宜沒不得已商之仲祐卒  
徇其意附焉擘華百忙中爲驛庵佚稿  
謄寫清本成三卷並校正誤字甚多可  
感也乙亥五月十四日可桴附書時年  
七十有九

東齋集題詞

吾鄉鄧廣文石瞿物化後茂陵遺草到處訪求竟無知者  
近見令甥諸季遲謂曩承母命編舅氏遺藁付繼準表  
第刊行不果繼準現客武昌因託季遲寓書請以遺藁  
畀我逾月寄到校錄一本將付手民以詩祭之并報寒

厓

廉泉

孤燈鈔藁草兼真料理千秋一愴神魂夢歌呼成隔世江闕蕭  
瑟有傳人公寄季遲詩曰幸有佳甥能酷似偶談花月身嫌贅上薄風騷氣自

醇扶醉勝流今畧盡九原幾見海揚塵

三十年前曾約公與顧大省臣秦子岐農同醉

蓉湖某畫舫懸有夕陽簫鼓橫額公笑語我曰此陳狀元書也  
吳孃聞之意頗自得宵寒月上相與扶醉而歸一時傳為勝事  
今顧丈秦子亦皆墓有宿草每過州門為之腹痛

司馬凌雲未可梯高名合與古人齊

余齋壁懸有山舟學士楹帖上款巽庵公見之大喜

謂與別號適同因以為壽又公詩有千秋又見相如鴻陞店裏  
出喜說凌雲賦最工之句知公嘗以相如自命也

驚初見鶯脰湖邊覓舊題余初識公於宣南鴻陞店越日公訪

洋手豪有化為七十二鴛鴦句後世子雲吾豈敢罷官元亮徑

還迷先外舅吳康之先生罷官歸隱以陶元亮自况築鞠隱山

卷公為選定并迷大凡有黃壤幽翳已無釣游同輩頭俱白剪

紙招魂到日西知聞青編寂寥何益冥漢之語可悲也已

題龔盒集用南湖韻

王式通

闔風天未許朝真見續溪程蒲孫庶常和作付與佳甥著問神謂季入暮情

懷三語掾過江標格六朝人娛情簫鼓羣扶醉侍坐湖山晚飲

醇見本集東馬嚴徐何足羨素衣差免化緇塵

名場石棧與天梯濃福清才世尠齊絕軫淚緣知己灑有哭宗湘文觀

察詩一千二百六十言寄衣詩為細君題銷魂楊柳春如舊見本集比翼鴛

鴛迹不迷見南湖詩注風義南湖今獨絕親持遺橐質膠西南湖詩卷乞

鳳孫學士鑒定

南湖先生將刊行石瞿舅氏集題詞二章闡發幽潛

沒存銜結謹次元韻賦以志感 諸以仁

歷劫無磨自有真文章曠世信通神抱魂白雪憐長夜覓骨青

山仗故人舅氏答余詩有生以窮愁消莊董淵源望騷雅陽湖

說兄弟均有書舅氏莊達甫先生春覺軒詩一洪黃氣誼感精醇

集後文余作舅集序筆固不逮其情則明珠如月終難掩不使同悲萬古塵

彌天功德度金梯直並褒忠表節齊寫本付之斑竹管約定太湖李遠

廬君以行楷零篇按到錦帶題舅氏文多散佚先生方說文辨

精善付印體隨拈字舅氏邃於御學書兼小樂府緣情與指迷茂茂秋問

臺城路賦雁字詞並於少年曾賦鴛鴻影如今瘦豪都倦句旁

注云今昔感哀之感西風故伴怎才結同心一絕吹斷句旁注

云此為追悼蕭關萬里秋勁訝傳來急羽兵氣淒黯句旁注云此指甘肅兵事結陣誰工書空自笑寂寞凌雲詞翰句旁注云士不遇賦奈目斷紅樓箇人天遠句旁注云此作近今應罕見聞中遂遠之悲畧示詩餘意內言外要旨

行看傳徧海東西

題真金集四首答南湖先生

孫揆均

江東獠兒有奇氣堂下鹿鳴歌雅詩甲午秋闈榜發石  
瞿先生譏語自以隸體書小聯惠賀先生見人時誦之  
意甚得難與爭鋒無狀烏敢當也一日南湖宴之吳阿  
蘭游山船坐有小翰孟兼及無狀時薛庸葺星輶返國  
奄殂海上先生席上成一輓語曰一舉比登天但令偉  
器如公何必文章誇上第萬方正多難豈謂使星掩曜  
空教君相惜邊才寒屋先生來稿原空八個字回首前  
塵恍如隔世事矣此輓當日亦誦不  
去口所空八個字竟亦不能追憶頃得秦效魯先生函示成完璧矣南湖敬注痛逝自念卓然



名手並挽孟兼裂帛書之小翰雅喜此聯誦不去口今  
遺詩如一名猶且落人後又文章艱一第又不學憐諸  
弟長貧更老親及歲暮七歌等篇先生至性過人壯懷  
靡遣梁溪七子中傷心人也奉讀遺稿感念疇昔先生  
墓木拱矣孟兼小翰俱亦電謝阿蘭倩影久化殘霞當  
年此會船中人今惟吾兩人尚飄蕭南北拉雜成四絕  
句藉答南湖辛未九月秣陵浮橋厲樓

獼兒無復有奇氣老卧江東亦白頭不盡感懷疇昔夜夫容湖  
上木蘭舟

建安風骨齊梁手迸作纏綿無限情寫定遺文皆涕淚早知阿  
士是名甥

廉公原是高義者印本又傳萬柳堂滄海故人髯叟在

表可存  
先生

零篇斷墨苦搜揚

吳孃船上當筵客  
四顧蒼茫汝我存  
彼美人兮同寂寞  
一湖煙水賦招魂

顛升全集總目

卷一

詩

卷二

詩

卷三

詞

卷四

詩補

卷五

詩續補

卷六

詩續補附詞

卷七

文

願齋集卷一

金匱鄧 濂石瞿

對月

天風吹海月飛上碧雲端  
遠水澹如此梅花清更寒  
美人隔千里今夜倚闌干  
羅袖怯孤冷素輝未忍看

寄贈秦姚臣寶璣時客山西

天下論文章誰真大手筆  
畧能貌龍媒即已誇駿逸  
掉尾牛羊羣馬知九州  
闊卓哉秦潛叔精爽世無匹  
蟠空鬱奇氣削嶽出秀骨  
抗聲爲風雷飛動挾日月  
讀君詩一卷百怪走我室  
翠駭紛陸離紫暈縱超忽  
一笑看蒼雲萬里在几席

乘螭游青冥騎鯨控八荒  
靈均與謫仙挾君共翱翔  
昨爲晉陽游叱馭上太行  
舉瓢酌天河引手攀扶桑  
騰身跨碧落天花散

衣裳萬象蟠心胸發爲古文章探奇虎豹數搜索蛟龍藏慨然  
望雁門白日彫精光雕響激燕雲馬毛慘胡霜歸思滿黃河瀕  
洞何能量

大雪獨酌至醉聞張曉帆王旭扶侯翔千有惠麓之游作  
歌東曉帆諸君兼訂後約

海月不可招有酒孰與同危樓挿天半落落搖長風長風吹雪  
來浩然滿青空萬象變慘澹百花散玲瓏憑高望龍山矢卻十  
丈青夫容故人道來亦未來枉殺野梅開幾叢擁寒獨酌忽已  
醉但覺綠香吹面春濛濛我時海上歸雲水開心胸采苓跨白  
鹿種草呼蒼龍遊戲山麓間妻孥亦從容陶然太古一壺酒要  
使醉鄉日月成黃農安能走天涯風雪飄孤蓬朝叩青綺門莫  
隨玉花驄終年袖一刺欲前且卻難爲通鴻鸞一嘯可千里舉

止瑟縮真秋蟲飄然揖青山故人幾輩欣相逢王郎俊逸才仙  
颺拂雲松大筆推侯生洪響開笙鏞云有張曉帆孟詩韓筆無  
不工偶然杯酒快傾倒意氣直欲干長虹昨聞龍山游踏雪紫  
翠峯蒼猿抱孤琴老鶴導瘦筇千觴縱豪飲洩洩何融融酒酣  
憶我忽不樂或者此席不可無車公寶華世界頗黎宮江山清  
影無時窮會須驂鸞戲銀海復與三子相追從試看今宵魂夢  
已清絕早被天風吹落萬壑千巖中

哭張麟洲大令

竹堂淒雨對蕭辰傳到遺書倍愴神海內於今誰作者當時呼  
爾謫仙人文章未了生前事翰墨空餘死後因江草江花又零  
落楚天披髮訴靈均

醉帽欹斜氣不羣旗亭殘雪記逢君豪情憤控青絲響豔曲爭

歌白練裙縱酒誰憐劉沛國傷春終累杜司勳黃墟回首今何在  
在斷笛聲聲不可聞

一官淪落楚江頭贏得狂名滿鶴樓十載風花真似夢中年身  
世不宜秋闈珊冠履從人笑狼藉圖書待友收知爾遺棺行就  
道靈風吹雨黯歸舟

文園病渴已經年旅鬢江潭絕可憐豈以苦吟讐性命空將慧  
業豔神仙幸留遺稿傳千古直侍重闈到九泉他日句章城外  
路素車來拜白楊煙

吳烈婦詩

高山何巍巍大海何瀟瀟中有精衛日夕銜石飛君不見烈婦  
之烈世所希解烈婦吳氏姝年十七歸于俞相我夫子奉我舅  
與姑一家骨肉愉愉如解宛宛雙妃央同心誓相保孀孀女蘿



枝願抱喬松以終老奈何妾與君朝爲合歡花莫爲斷腸草

解三

夫遠行身兢兢夫遺疾心戚戚痛哭呼天天不我憐嗟我夫子

兮竟難永年

解四

天喪我夫子可憐夫子無子無子可撫妾何恃

妾身雖存不如死

解五

有姑有母以節殉身兩家奇烈妾所聞妾

今一死何足云隨夫子兮奉我親

解六

漆銜熒熒搖綠烟手置鴛

酒夫棺前妾心之痛不可言上有青天下有黃泉

解七

事在光緒

丁丑八月十二日行路聞之皆慘感嗚呼烈婦之烈世無匹

解八

### 感懷十二首敬次家大人六十自述原韻

望斷大刀頭思歸願未酬江山餘落日吳楚入高秋風吹三霄

鶴波馴萬里鷗壯懷難自遣擊劍一長詎

自作登樓賦常爲入幕賓疲驢應笑我破帽尚依人不學憐諸

弟長貧更老親那堪望鄉國第宅但荆榛

我懷彭澤令高卧水雲寬秋色柴桑里先生忽罷官田園歸隱

易天地放懷難吳下有流寓羈縻樓猶未安

謂俞悠遠師時客吳門

悔把羊裘典寒來失所依琴書隨手散時事與心違諧俗材偏

拙因人計總非焦桐由自毀莫謂賞音稀

望雲數鴻雁兄弟幾人存青草有新壠白楊搖斷魂漢其對風

雨檢點到琴樽遺挂滿塵污傷心那可論

謂先仲氏

阿買年還幼楹書讀未能家貧常廢學體弱忍加懲而叔身猶

賤是兒情可矜追思託孤意餘痛結如癥

惘惘出門去中懷百不如風塵爲客後兒女累人初壯志頻看

鏡奇窮且著書囊琴欲何往天末渺愁予

見說潼關外風高細柳營九龍移帳處萬馬踏邊聲定遠曾投

筆終軍且請纓低頭撫長劍歎落愧吾生

嘗笑杜陵叟許身契稷臣憂時空有淚謀國豈無人世事炎涼  
改交情患難真平生艱一飽橡粟亦堪珍

忽聽落梅笛悄然獨倚樓楚天沈古色湘草接幽愁回首洞庭

樹相思雲夢舟女嬃幸無恙鄭重尺書投

謂諸氏姊

野水秋更綠難爲羈旅情西風萬行柳腸斷石頭城白雪誰知  
賞烏絲枉擅名閨中猶未悟釵卜問前程

### 對酒抒懷簡句章故人八首

酒酣意氣鬱難平醉擁牛衣感此生豈有文章凌漢魏空餘歌  
哭激幽并樽前煙月傷心色笛裏關山變徵聲起坐闌干望鄉  
國一行旅雁又南征

蓬梗飄流絕可憐客裝寥落越江邊遠行已過三千里此地曾  
經十五年松菊漫商陶令宅桑麻未辦杜陵田吾生自分常樗

散休拓空青去問天

白海桑枯有劫灰軟紅無際送愁來早經患難庸非福強作周  
旋已可哀不是唐衢偏善哭幾逢任昉解憐才鐵簫吹破渾無  
用披髮荒山日數回

天涯兄弟幾彫零雲散星離百感并遠道煙花龍出骨大河風  
雨雁移聲亦知情在身猶在未卜他生勝此生日莫脊令原上  
望白楊青草已縱橫

袖斧山中忽爛柯枯碁一局半銷磨青琴弦澀因愁重素被香  
溫覺夢多瘦柳腰圍憐沈約散花身世伴維摩深閨刀翦西風  
裏搖曳芳心到女蘿

美人春曉上樓臺一笑無端萬謗來燕子尚雛難寄恨芙蓉已  
老未堪媒金笳幽怨文姬拍水珮蒼涼漢女哀腸斷東風渾不

省楊花如雪亂青苔

絕少名山寄此身聊將白水證前因  
時無飽叔真知己誰信曾參不殺人  
燕頤未封情落落蛾眉何事詈申申  
一川香草猶堪拾擬學長沙弔楚臣

落日寒雅古渡頭臨歧欲發更淹留  
萬重木葉催寒色千疊雲山寫別愁  
破爛衣裝餘趙筑蒼茫生死託吳鉤  
此行漫作王尼歎隨處烟波可釣舟

旅居蕭寺檢先仲氏見懷遺詩感書長句

危鐙搖搖慘將黑夜半空堂聞歎息  
出門四望蕭無人卻是寒蟬雨中泣  
偶然開篋理故簡忽得臣兄舊時墨  
數行細字如牛毛墨淚猶新那忍拭  
憶當作客去茗甞煙柳蕭蕭送行色  
西風吹落孤雁聲要使征人念鄉國  
寒篷欹枕不成寐翠被難溫酒

無力夜深燈火青熒熒  
賸與奚奴話岑寂  
詩成往往索我酬  
至今殘藁積盈尺  
遺詩尚在人在  
在三五年來同一瞥  
墓門草綠秋茫茫  
欲更相逢那可得  
萬里風悲越客吟  
五更霜折桓山翼  
我復天涯常作客  
人事勞勞苦相迫  
宵來風雨不可聽  
擁被空懷對床夕

讀江叔叔混伏敬堂詩有感書後

我生遲十年不及見  
叔而獨嗜其詩讀之已三復  
想當離亂時  
孑身竄荒谷  
風塵一孤劍  
天地雙繭足  
扣弦而歌不成曲  
若非雍門琴  
定是漸離筑  
使我讀不終篇  
輒欲哭我哭爾不聞聞  
之恐爾彌酸辛  
江南昔年多戰塵  
關山處處迷荆榛  
吳宮花開慘不春  
白狐跳嘯黃狐奔  
至今風雨尚蕭瑟  
中或有爾抑塞磊落之精魂  
於乎陳后山孟東野如君之才世已寡  
可憐終老丞

倅間贏得狂名滿天下我亦頻年涉憂患身世蒼涼不堪寫文章  
草草何足傳若論窮愁足君亞作詩悲君行自悲千載下誰  
知我者

己卯生日

莽莽人間世春光百可憐野花猶欲雪夢草已如煙料得深閨  
裏頻來繡佛前焚香爲我祝細語最纏綿

北風

天空羣象寒日落四山黑北風浩浩來入夜未肯息勢搖萬星  
落聲拔大河立餘威入我廬四壁奮蕩激瓦簷欲飛動牆柱盡  
欹側我生本虛舟飄落在川澤出入煙濤叢心畏蛟龍得今方  
有棲止而尚憂偏仄風汝應我憐胡反逼我急自從出門來關  
山苦相隔昨寄書數行知否到鄉國正愁北風勁圻我草堂壁

嬌兒應未麻兄弟相愛惜翻書手倒卷弄筆面塗墨可能體我心爲母解岑寂宵闌鐙火盡行罷當窗織料亦念遠人停梭百無憚前書倘已達或可免相憶所悲無盤飧畧使加餐食汝縱諒我貧我心得無惻丈夫生世間落落無長策饑寒到汝曹慙憤曷有極亦思辭風塵慰汝牛衣泣顧念囊無錢得歸亦無益所幸賴汝賢習苦在朝夕未嘗以其勞向我一交謫當我遠行役殷勤囑努力私鬻頭上釵爲我製裘紵自云無別怨彊作歡笑色可憐羅襦裳粉淡已暗溼緊予受命窮年年作行客豈不思骨肉無乃人事迫卻看身上衣猶汝手中跡三歎北風前遼天莽寒白

解夢一首寄內

華胥是何鄉荒渺不可知槐安是何國頗笑衆螳癡試問莊漆



園此身栩栩將安之古人大抵好說夢其事皆匪夷所思我從  
數年來夢境殊離奇無端生骨肉夢作死別離或與故人游談  
笑如平時心知其鬼不敢說顏色慘澹心孤疑忽如矢意歸妻  
子相嗟咨忽如得意歸黃金白璧青騶驪忽如淪落不得歸蛇  
盤虎嘯路險巖虛空變幻倏無定使我冥想心不怡念昔汝多  
病往往心神馳有時欹枕函微笑支兩頤忽如有所感殘黛不  
綠愁凝眉覺來問汝夢何事夢已飄忽不可追自我一出汝必  
夢見遺夢我客天涯風雨愁淒其夢我千里回入門雙笑情依  
依只休夢我向歧路鳥道百折羊腸危餐風宿露汝豈慣有夢  
願勿相追隨不如耐堅坐靜鎖雙歲蕤時誦楞嚴經解脫煩惱  
齊歡悲即我亦將勘諸妄尚友抱朴師希夷一任夢神弄狡獪  
我自能破愁城圍況乎人生本大夢朝教莫嗜空爾為仰天一

笑萬感寂眾星落落元雲垂

最第

我乍登高堂見母色憂恟問母何所憂爲弟弱多病且云嗜好  
多如夢沈不醒豔詞摹齊梁靡響溺衛鄭結客豪華間皆足伐  
其性試觀汝弟顏豈復似彊威腰圍束竹如瘦骨枯柴賸以此  
孱弱軀豈堪任變更哀哀慈母言使我雙淚迸念汝纔弱冠血  
氣猶未定正當惜此身努力至顏孟胡爲擺其束不自範乎正  
立身須自彊失足有陷穽忍令慈母懷爲汝百憂并汝兄無所  
成搔鬢羞明鏡文章飽憂患聊復託歌詠江山莽春愁風雨入  
秋興尚覺傷天和慘舒改恒令以汝夙多疾尤宜自申傲自來  
寢食旁每有鬼神訶矧爲衆欲擾水火相鑽競輕猶鑠神明重  
乃讐性命務當絕其株不復假以柄神清氣自足緣寂心乃淨

安見蒲柳衰不爲松柏勁勗此以報親庶不愧其行今我將遠  
游愁難一言盡聊書此數行以爲吾弟贈去矣何可言吾言汝  
其聽

金陵喜晤家仲熊兄弟

爾從粵東來見我忽而笑爲其青鬢多沙塵無復翩翩舊風貌  
記否故園羅綺叢畫樓疊翠珠簾重蕭騷竹馬搖綠尾與爾結  
羣嬉戲於其中我時方四齡爾亦纔六七春風桂水頭爾作羅  
浮客關山數千里音信日以隔十年鞀鼓聲碧血照鄉國可憐  
烏衣巷盡化銅駝陌故家樓閣亦無存青草茫茫亂秋色今日  
是何日復此情相親雖然面目改猶喜言笑真一樽相見豈易  
得勸爾休悲客裏身一樽復一樽對飲忽已醉度信家園且莫  
言謝家兄弟看猶在只我年來事可傷斷鴻零落不成行此時

見爾倍淒絕渺渺秦淮空夕陽

衡江舟中聽翠伶彈琵琶歌

北風卷黃沙鴻雁皆南征哀音落江水慘入琵琶聲不知彈何  
詞但覺一絃一絕難為聽記昔相逢木蘭楫錦裙成圍香作國  
一時紅粉皆翩翩只爾凝情矜獨立四絃欲發先沈吟眉黛都  
爲可憐色自言家在常山頭生小學弄沙棠舟朝朝隨姊習歌  
舞金絲銀甲彈空侯畫筵初開教勝酒羅扇不掩雙蛾羞自從  
姊死日淪落脂田粉盞無人收東南大賈挾金幣徵歌選舞稱  
風流可憐但解縱歡笑誰復知我平生愁不知一身此後何處  
託空江獨對蘋花秋我聞此言生歎息彊作酣歌拓金戟酒闌  
燭盡風吹衣頓覺此身尚爲客木葉欲脫秋連天故人祖道開  
華筵涼星如雨花如煙更翻離歌張斷絃青衫生塵黑衛瘦臨

歧贏得蛾眉憐高秋九月白門道未信此才竟潦倒三條燭淚  
萬言書祇博西風一聲了蕭然席帽歸去來我懷鬱矣何由開  
空山抱琴歌百回紫血灑地成青苔哀時空揮廣武涕望古不  
見燕昭臺典衣市酒彊作樂舉世誰復知吾哀此時獨立頗憶  
爾金尊華燭方裴裒越山迢迢越水隔何意重逢在今日一般  
俱是可憐人萬事茫茫那堪說我方欲語心忡忡爾亦對我生  
愁容且云別後苦消瘦顏色消盡桃花紅自將團扇感身世久  
合捐棄隨秋風如何樊川才調美無匹亦爾頻年落寞風塵中  
不惜殘絲與枯木爲爾重調斷腸曲四絃欲絕萬感生掩袂無  
聲不成哭吁嗟乎我亦不必哭爾亦不必悲爾不見邯鄲才人  
絕世才空房獨處無良媒一朝嫁與厮養卒羅裙鈿柱生塵埃  
卽論劉蕡之策補衡賦有能識者何人哉不如我且盡君酒千

斛君亦爲我傾一杯歌時即醉醉即卧不知東西南北誰是天  
之涯

### 稷山行

會稽王子獻孝廉繼香避地時家紹興之稷山朝出乞  
食夜則潛身叢莽間藉草爲卧具嘗夢有古衣冠者招  
之游層臺累榭迥出塵表既寤于草中得白骨一具始  
知身在廢墓中遂出亂後嘗繪圖誌異庚辰之秋于明  
州試院爲予言其事因戲效長吉體紀之

王郎落拓竟如此兵燹侵凌不得死自言身世殊可悲不及青  
山一坏耳聞昔避亂家稷山一身出入烽火間潛身榛莽不敢  
起土花繡面紅斑斑此中萬古不見日天黑雲黃氣蕭瑟青狸  
捧骨山鬼愁夜夜荒原哭孤月碧火耿耿搖幽燐忽然照見大

卧人風吹斷臂如屈伸欲起復仆旋秋塵泉深十丈窈莫測寶  
衣已彫玉棺裂魚鱗閃燄淒不紅蜨紙燒灰慘猶白精靈一去  
不復回殯宮寂寂無人哀幽魂忽憶生前事別薛重認山南碑  
枕碑爛卧君勿怒猶勝殘邱窳孤兔當時多少諛墓人誰肯此  
中伴君住涼風槭槭煙冥冥夢中依約逢仙靈五雲樓閣渺無  
際道山一點如雅青夢耶真耶不能說爲鬼爲仙兩難必曉光  
入谷樵客來卻訝人從九原出

旅夜有感東子獻

秋風病骨費支持勉惜餘生爲母慈寄命同憐蠟食後思家又  
是雁來時百年如此將誰倚千里逢君已恨遲共翦殘釭話疇  
昔夜深贏得鬢成絲

爲子獻題天童訪碑卷子

冥冥猿嘯碧雲端  
雨後螺峯秀可餐  
人在萬松聲裏立  
滿衣青雪不勝寒

載酒來尋開士家  
寒林如夢待栖雅  
斷碑卧地昏無字  
秋雨年年生蘚花

竹火禪房秋氣深  
蒲團靜悟妙明心  
三更閉戶月初落  
萬壑風泉龍夜吟

絕壁匆匆手一揮  
筍輿得得度斜暉  
寺僧送客出山去  
自向白雲深處歸

歲莫七歌客四明作

人生奇困無過此  
欲生不死死北風  
蕭蕭雪塞塗可憐  
寸步千崎嶇手足凍  
皴痛欲折豺虎見  
之不忍食吁噫嘻  
丈夫幽憤塞九州  
披髮上訴天爲愁



我母我母今龍鍾一生長在憂危中兒行負米去千里垂橐終  
年苦無米窮冬日莫衣不完風雪在母心中寒吁噫嘻生男雖  
好慎勿舉垂老翻多別離苦

有兄有兄客黃浦墨經倉皇走塵土低頭乞食行道邊欲營半  
菽如登天蓬頭稚子赤雙足勸耶且歸望耶哭吁噫嘻昨宵夢  
汝顏色鰥瘦龙叫雨聲淒淒

有姊有姊在漢皋小時課我何辛勞朔風鼻涕垂半尺蟻虱盈  
頭面枯瘠塾中夜歸就姊眠翦鐙教我吟詩篇吁噫嘻苦心作  
詩果何益杜陵至今不得食

七郎別我豈得意不能依兄卻依姊臨行慈母親檢裝含淚爲  
弟縫衣裳衣裳雖舊汝自惜著體當思母心力吁噫嘻汝行歲  
莫亦已勞楚天浪黑魚龍高

身金集  
阿快十齡學章句阿英十三能織素幽房雨黑燈不明時聞孤  
兒相泣聲應憐汝叔百無就經旬不炊令汝瘦吁噫嘻當年我  
兄決別時哀哀託我雙孤兒

生女莫作秀才婦典盡嫁衣質杵白我行處處悲途窮不如對  
泣牛衣中嬌兒繞母頻索食汝曹何知吾力竭吁噫嘻我歌至  
此心欲摧萬壑助我緩聲哀

哭伯兄六首

兄諱紹曾字芹伯少即通敏智百常童愛好文義未嘗  
違捨後以婁困場屋屈就左塗非所願也庚辰之秋旅  
食申浦及冬病革始來杭州適予校卷四明遂不得見  
而兄於十一月二十日竟死矣年甫四十有二獨客窮  
塗寡乏親舊陳尸待瞑不知誰何及吾鄉秦澹如都轉

知之始爲經紀其喪於戲急裝甫卸鬼伯在門逆旅桐  
棺視不受含可哀也已予聞耗馳往于十二月廿三日  
始哭兄於旅舍中爲設奠三日并爲詩六章以代大招  
之詞即將以其喪歸矣痛哉

一帆秋色指葺城黃浦灘頭送弟行

時送七弟之楚

事到難言惟有淚

病將入骨始登程愁多恐母知消息魂斷勞人辨姓名野店黃  
茅風雨苦曉鐘聲裏了平生

楚尾吳頭數往回頻年壯志未全灰寄人門戶常招忌嗜我丈  
章亦召災蓬穎荒涼孤客觀江山搖落幾人才一官未就身先  
死冷澹生涯絕可哀

雨雪關山性命微臨危仍未息塵鞿廿年宦早身猶賤五葉門  
衰事已非骨冷無人爲易簣天寒有母尚縫衣傷心九月初三

札苦道西冷信息稀

祖道東門手忍分別時早已悔離羣似聞垂死猶呼我何意重  
來竟哭君蕭瑟頭銜題素旆叢殘手冊認朱紋夜深敢憶當年  
事細雨銜前共論文

總帳何人一哭臨故人爲乞買棺金女牆月黑鴉啼急茅店霜  
黃鬼氣深歸骨虛營三日莫託孤未了九原心人間已覺羈縻  
苦只恐泉途更不禁

生太無聊死已遲茫茫何地著孤兒飄零如此吾猶在出處俱  
非爾早知若見先君應慟哭爲言弱弟苦支持夕陽衰草臨安  
路痛絕歸舟欲發時

祀竈後三日移伯兄遺殯回里風雪孤舟百端交集愴然  
賦四絕句焚其柩旁

燭影搖搖慘不青  
郵程猶記昔同經  
夜深腸斷瀟瀟雨  
隔一重棺各自聽

不能牽袂只憑棺  
遺篋叢殘感百端  
藥裏書塵未零落  
檢來都作在時看

孤舟遙夜泊江村  
雲水淒涼有淚痕  
一樣飄零風雪裏  
人間地下盡銷魂

暫時魂影得周旋  
如此同歸忒可憐  
猶勝白楊邱壠畔  
祇隨山鬼語寒煙

將爲楚游與里中諸子飲白門酒樓感賦長句爲別

秣陵城西多酒樓  
樓中山色蛾眉脩  
茫茫萬古一江水  
日夜與人添別愁  
酒杯壓愁酒無力  
并向臨歧助秋色  
隔江遙指楚帆來  
萬里風濤慘將別  
秦淮女兒停畫橈  
喚來樽前吹洞簫  
簫聲

哀怨入波去滿江風葉俱蕭蕭故人勸我只宜醉此別何時復  
相對夕陽哀笛滿黃墟試問前游幾人在酒酣風起秋橫天紅  
樓簾卷辭歌筵我時扶醉彊起立萬山旋轉青樽前酒徒日莫  
各揮手我獨擔囊迫奔走此時蕉萃官道旁只有征夫與衰柳  
問渡蒼茫向水濱西風不繫轉蓬身憑君莫向柴門說猿鶴山  
中愁煞人

春夜與姊婿諸十一孝廉

可賓論詩即題其璞齋集後

乾嘉以後矜詩派那識朱王格律尊先輩風流誰接武此君才  
調獨銷魂繁音百變無琴雅短褐重逢且酒樽我亦年來吟思  
苦一編悽斷不堪論

有感柬諸十一

飄零真作無家雁照影空江惜羽翰一往情深感吾子幾人高

義恤孤寒，銜前舊夢，如塵墮鏡裏，遺形掩淚看。君藏有先回  
大夫遺象

首謝庭半寥落，五更簾外雨聲酸。

### 登黃鶴樓

載酒閒臨黃鶴磯，樓空日落鶴何依。未妨狂醉拓金戟，忽漫賞  
心來鐵衣。常州許漢代文章鸚鵡冷，吳鄉消息鰕魚肥。甚時了

卻風塵事，歸卧白雲同息機。

自漢陽放舟至潯陽日莫值大風雨三更後天霽望月作

### 歌

朝辭漢陽渡，夕泊潯陽江。日落未落天，地黃萬山秋色攬不盡。  
滿眼但覺波茫茫，忽然風挾水頭立。元雲垂天太陰黑，江山黯  
慘夔魅愁。千年老蛟不敢泣，江天一霎成台并。睽電閃爍雄雷  
轟青冥，石裂迸飛雨。女媧大叫天爲驚，此時江水更沸鳴。若有

萬騎空中行馮夷搥鼓聚百靈鯨喙聳碎訇三更以後萬  
籟息起視江光一痕白江光愈白天愈青不知月在波中明一  
龍翻波攫月出月方搖搖波力奪斗然一落千丈平上天下天  
都是月何人弄珠海上來瓊田貝闕參差開湘妃漢女踏波舞  
金支翠羽光裴回江霧既漠漠江風更淒肅萬里蒼波帖寒玉  
五更遙別匡君平明日秣陵城下泊

哭施叔愚廣文

建烈四首

豈謂三年別歸來竟哭君龍蛇迷曠野猿鶴拜孤墳江濶惟多  
雨天高但是雲蘭陵相送處木葉已紛紛

卅載參戎幕高歌祇自哀故人半霄漢塊獨卧蒿萊夫子誠無  
怨朝廷自愛才精靈應未泯風雨夜深來

大雅久寥落中原板蕩餘斯人不可作吾道定何如亂世生原



贅名山事總虛一編留罪草誰與上遺書

祇與一生醉天心故靳之敬通空有婦伯道竟無兒斗酒我來  
奠重泉君詎知黃墟今尚在腸斷日斜時

將赴四明臨別感賦

更欲游何處高堂已白頭妻孥同一哭風雨獨扁舟大野莽無  
際長河寒不流登艫一回望烟樹向人愁

月湖賀公祠追悼會稽王子詒

繼毅

子詒爲子獻孝廉之弟以殉孝死月湖

悽絕西風酒一尊黃墟舊侶渺何存澹烟喬木唐人宅秋水幽  
花楚客魂溼鼓沈雲聲不起斷碑卧兩字多昏年來我亦傷孤  
露并向山陽笛裏論

寒夜思歸寄家人三首

朔風戰庭木蕭蕭嗥老鳥日莫離不歸時來枝上呼哀聲慘入  
耳使我心躊躇遙思長病母望我雙眼枯柴門寒氣深冰雪摧  
肌膚呼兒不在側此際悲何如豈知遠游子流宕塗路隅明知  
倚閭悲未得歸須臾願母勿復念養我徒區區登高望江南白  
雲渺何徂感念梁山詠淚落如連珠

宛宛同枝鳥朝飛莫歸早嗟我亦何爲辭家涉長道明明有兄  
弟歲莫不相保貧賤幻別離千里營一飽愧無多盤飧爲汝起  
枯槁昨來一封書言語頗草草上云親更老下云歸來好

今夜故園月凝輝鑒幽房娟娟閨中子攬衣起旁皇遙知小兒  
女嬉笑弄月光夜寒就母宿瑟縮擅帷旁忽若有所思問耶游  
何方勸兒勿絮絮徒令母心傷食荼方知苦衣葛方知涼不作  
關山客焉知道路長願君化明月使我長相望

得澹如先生書知已由杭返里矣有感於懷報以長句  
悲臺多風野蕭瑟前唬青狻後蒼鶻自憐歲莫猶不歸忽聽公  
歸轉愁絕白頭賣字尚可活那肯低眉事刀筆茫茫世變未可  
知從此掩關不須出湧金門前柳堪折祖道幾人來作別有車  
幾兩馬幾匹道旁父老應歎息見公破帽衝風雪

明州試院小集湘文太守有詩索和依韻奉酬一首

男兒五十未爲老萬里騰驥快此時豈但循良最天下即論風  
雅亦吾師狂歌擊碎鐵如意醉座潑翻金屈卮一笑君宜寬禮  
數杜陵蕉萃只能詩

有感疊前韻東孫峴子

故人漫許凌雲筆如此文章豈入時半世行吟空有淚十年孤  
學本無師蒼茫時事看棋局冷暖人情問酒卮誰寄當歸勸將

母草堂重補白華詩

再疊前韻贈峴子即書其春絮詞後

闕湖別後復相見一笑鬚眉猶昔時  
風月皆成不速客文章已悟無言師  
春愁柳絮白於雪酒影桃花紅滿巵  
寄語耶溪小兒女安排越紵繡新詩

湘文太守詩來謂效稟盒體此與東坡之效山谷同一狡獪也三疊前韻酬之

奇外無奇更出奇崢嶸坡谷又同時  
新聲漫道學黃體狂草已看追素師  
時以草書見貽白杜分題八九子  
青山勸飲三千巵夜深官閣且休掩  
怕有糝花來索詩

與子獻峴子夜話四疊前韻

太息鑑湖兩狂客一般蕉萃不逢時  
誰於四海識奇士我欲扁

舟隨釣師寄恨惜無青玉案澆愁聊把黃金卮才人自古感淪落搔首蒼茫且賦詩

雜感五疊前韻東湘丈太守

酒杯一擲少年去我亦朱顏非往時豈有黃金酬漂母那堪碧海失琴師聞澹如先生已歸隋珠入夜愁按劍明鏡貽人任蓋卮多謝

廬陵珍重意一編獨嗜宛陵詩

寒夜寄懷澹如先生里門三首

可悔當年典釣舫歸來無地著樵青朔風一夜鵝湖雪應在漁灣結網聽

卅年浪跡賸孤筇一笑移家入九峯好與朝雲多釀酒玉罌花下過殘冬

脫卻朝衫換一簑澹公澹癖近如何莫言世外蕭閒甚畫債詩

禪事更多

子獻日常鬱鬱有憂生之嗟歲莫將歸越州臨別向予乞  
生輓詩其容甚戚予哀之而不能應也作此慰之

臘鼓寒鐘逼歲除故人臨別意踟躕都將杜甫無家淚并入王

微告弟書

近以祭弟  
大見示

滄海橫流猶未已山莊舊業定何如他年

得踐煙波約賀監湖邊共結廬

死生渺渺忽疑仙攬鬢荒江黯自憐衛玠風華多已盡謝莊家

世本無年

子獻三代  
上皆早世

愁多偏種白楊樹名在應傳青簡編我

願鍾期永相守肯教容易絕琴絃

秦兩生行贈叔固湘臣

一生磊磊如白石一生稜稜玉山立歟然雙劍開紫芒雷雨青  
天下相逼洞庭湖水高拍天九峯接尾龍宛延山川積秀久不

發風雲蟠鬱三千年中原文獻幾塵土風會遷流問誰主兩生  
奮袖氣激昂欲闢榛蕪壇宇空山獨立秋蕭蕭老鶴叫月霜  
天高西風滿地草木怨吾方痛哭歌離騷不知造物是何意只  
把窮愁壓奇氣十年淪落風塵中末路方爲著書計兩生於世  
百不憂千秋絕業同研求夫容湖頭弄秋水期爾直到滄溟游  
仲夏訪澹如先生鵝湖寓廬感賦長句

自我別公已三載白雲空寄山中書竭來挈舟始相訪飄然一  
葉浮鵝湖門前繫纜日初落倒影動蕩青珊瑚樵青應門報客  
至自理麥顆炊松墟草堂相見一大笑復念身世同躊躇憶初  
依公聖湖住九峯窈窕開精廬暇陳琴酒互歌歡山花池鳥相  
鳴于忽然秋風起蕭瑟頓觸歸夢思尊鱸浮雲萬里蔽白日黃  
鵠一去誰能呼歸來無地可容却回車痛哭真窮途圖書鬻盡

典池屋花鳥徒爲他人娛即如先公三畝宅遺址猶在城南隅  
故家喬木日零落至今風雨迷榛蕪山邱華屋一炊頃爲公追  
昔重嗟吁我聞睿皇威文治左右輔弼皆鴻儒侍郎大采照中  
外輝輝寶氣明璠璣湖山樽俎互掩映繡節所指人爭趨遙思  
風流尚興起豈但文字供規摹維公繡衣嗣家法清風亮節無  
差殊獨嗟身世已苦晚抱負鬱鬱無由摅廉節猶爲世俗忌罪  
言輒受權豪狙攢眉漆室慮時事手無尺柄將何如乃知世運  
有衰盛白衣蒼狗才須臾騏驎非時不須出徒令光怪驚羣愚  
不如投劾竟歸去掩關高卧歌黃虞青山隨處可結屋王尼之  
歎胡爲乎茲中此時一樽酒列坐且喜皆吾徒謂蘇良叔酒酣  
邀我更讀畫明月夜開碧羅厨草廬如此足可樂便思拔宅依  
公居只愁此願不能遂風塵滿地猶饑驅相期歲莫更相訪



花同酌三千壺

始見白髮有感

依舊百無就蒼然鬢欲皤飄零猶未已出處定如何故物眼中  
少新愁眉際多老親期望意禁得幾蹉跎

八月初五日得內子書並所寄秋衣有感

八月涼風起白露沾衣裳思歸感蕭序游子心旁皇客從故鄉  
來手携紫羅囊貽我閨中書宛轉數十行上言君別後老母身  
康彊妾亦耐苦辛眠食皆如常阿蜨能讀書阿圓始負牀阿雪  
白於雪眉目宛清揚最得大母歡解索梨棗嘗時時抱母頸問  
耶在何方兒癡誠可愛妾意則已傷男兒事功名安能處閨房  
君今果何事年年去其鄉豈無骨肉戀母乃衣食忙昔爲牛與  
女今爲參與商猶憶君別時紅蘭春始芳相思曾幾日露結將

為霜女子在閨中，焉知路短長。欲飛恨無翼，欲渡愁無梁。聊因越人便，貽君黃竹箱。箱中有秋衣，是妾手所將。衣以衛君體，願君慎臨涼。時時著此衣，如妾日在旁。纏綿別時語，君意應未忘。妾身何足言，無勞繫中腸。須念白頭母，朝夕門前望。此言誠可痛，此恨尤難量。將書三復看，使我心悽惶。吳山何業業，越水何湯湯。舉頭望雲漢，鴻雁方南翔。

申江酒樓追悼姚臣

去年花落黃浦春，與君醉酒悲春申。今年花開客黃浦，欲問故人渺何處。花開花落風蕭蕭，春江萬斛銀蒲桃。青蓮一醉不復起，赤鯨倒卷蒼波高。回思江頭送君日，十萬桃花亂紅雪。東風轉眼各天涯，豈料今生遂長別。登樓一歎白日徂，危闌迴倚青霄孤。我今歌哭誰與俱，去去適足皆窮途。羨君飄然歸太虛，縱

游八極無所拘，況聞天上多。酒徒斗酒可以相，宴娛此時化鶴歸矣。乎翠鞋絳旂，光有無。

送舍弟越游

親幃迫衰年，我歸爾又去。豈不戀骨肉，欲留竟難住。宛轉謝隣里，倉皇逐徒御。猶恐傷家人，徑去不回顧。出門更牽手，慟哭日將暮。孤鴻爲裴回，班馬慘如訴。人生有離別，端以貧賤故。應知慈母心，長在爾行處。迢迢越江水，黯黯吳山樹。行矣崇令名，無爲感行路。

次韻呈澹如先生

出處分明追昔賢，由來萬事只憑天。等身著述可千古，散髮煙波今幾年。時會難難誰底柱，主恩容易許歸田。一竿且作鵝湖長，位置樵青賃釣船。

初夏病臥表君葆良

廷舉携酒過訪感賦長句報之

連旬苦雨不出戶一室閉卧如虛螺門前水深人跡絕四壁但  
覺青苔多儵然長餓對妻子累日不食塵生敲古琴在篋未忍  
典再三太息仍摩抄城南表生我良友憐我枯寂頻來過入門  
一笑鳥驚起涼風謾謾搖庭柯家貧無物可娛客祇有古意供  
婆婆感君情深與君語不覺雙淚交滂沈回思平生數師友行  
跡散落猶蓬科或從夷門訪朱亥史或向燕市尋荆軻揚東山  
安石況已老翁吁嗟吾道將如何里中小兒炫奇服陸離長劍  
冠義義讀書但慕速化術一往自詡龍騰梭聞人談道輒大笑  
居然有口如懸河咄哉君卿古辨士此輩今復揚其波并蠅甕  
雞各天地妄意萬物皆么麼鸞皇秋秋偶一敵斥鷃側目鷦鷯  
訶由來斯道苦梗塞舉世相習成衰頽誰能獨力掃塵翳徑從

天際揚雕戈九門誅蕩象緯肅碧空皎皎懸羲娥嗟予有志惜  
未遠況復身世多坎壈一名猶且落人後閉口遑敢言其他今  
朝幸有一樽酒願君痛飲聽吾歌男兒既負雅頌手便當清廟  
賡猗那不然長揖請纓去絕塞萬里馳明駝胡爲鬱鬱抱書策  
坐令壯志常銷磨騏驎服箱牧豎笑鳳鳥振采虞人羅乾坤舉  
足盡憂患不如僵卧空山阿酒闌歌罷白日落兩人相視朱顏  
酡吾生飄轉一蓬梗安得與爾時委蛇山中夙有結隣約相期  
宅依煙蘿出門揮手一笑粲毋令此志仍蹉跎

賦得道旁柳

門下諸子賦道旁柳辭旨芬惻各有所託觸我懷抱因  
而繼聲

黯黯章臺路濛濛大道塵依依如有怨裊裊不禁春看盡往來

客愁當南北津君能惜顏色攀折敢辭頻

東風問流水流到幾時停昨夜才飛絮今朝又化萍無情尚如此何處不飄零識得飄零苦柔枝莫再青

一程還一程煙雨不分明思婦樓頭意征夫道上情長條堪繫馬短葉欲藏鴛鴦休說腰肢好年年勞送迎

春色黃泥店秋光白下門江南千萬樹此樹最銷魂眉黛讓人巧眼波和雨昏託根在歧路幽恨共誰論

除夕和韻三首

新城王考功有除夕三詠一和杜公杜位宅守歲一和戴叔倫除夕宿石頭驛一和羅隱除夕光緒癸未於四明郡署度歲長觸羈緒亦依體和之

獨客有何喜明鏡還作花寒聲沈去雁夜色澹棲雅望裏南雲

迴愁邊北斗斜柴門小兒女知否憶天涯

掩關誰與共形景暫相親病眼看新厓窮塗託故人流庸千里  
淚憂患百年身体笑老蹊醜欲迴天下春

三十明朝是屠蘇彊自傾乾坤餘敝褐風雪逼殘更閱世才將  
老當歌氣未平迂儒抱孫憤誰與叩通明

武進劉亞康書



願升全集卷二

金匱鄧 濂石瞿

醉歌行贈許中甫孝廉

班

即書其東海乘槎圖後

中甫爾今在空谷憐爾家無半畝田一椽屋居不得安飯不足  
胡爲獨抱天下憂披髮九州日歌哭爾曾東游秦岱西峨眉胸  
中萬里千崔巍稱爾抑塞磊落之奇才胡又掉頭不肯住拂衣  
長嘯歌歸來歸來兮何苦空山無人兮緩狄與之處綠蘿冥冥  
兮鬼嘯兩山中杜若無可貽悵望靈脩兮渺何許忽然一去不  
可攀發興雪浪煙濤間赤脚醉踏魚龍頑蓬萊仙人控雲轡一  
鞭遙指三神山雖然茫茫弱水那能渡只恐神山亦歧路鮫人  
淚作瓊花紅目斷扶桑不堪諱今爾東游來越州越州城中多  
酒樓美人如花樓上頭一笑便可三年留況有二百八峰好眉

黛可以銷爾萬古宛轉不盡之春愁不然爾既不能上書挾策  
干明主又不能彎弓射天狼赤手縛猛虎滔滔海水方橫流我  
輩憂時竟何補中甫中甫我今酌爾金叵羅願爾安坐聽吾歌  
男兒四十猶坎坷可憐壯志終蹉跎九關崢嶸虎豹惡大澤決  
泝龍蛇多爾看人間何地無風波女媧鍊其石魯陽揮其戈紫  
皇無言赤鳥笑力盡雲天將奈何嗚呼中甫吾且與爾歸去山  
之阿

溪上重過亡友張麟洲故宅

依舊一樽酒論文隔九京山邱餘痛哭風雨異平生念此天涯  
客應傷地下情竹林搖落盡腸斷莫猿聲

寄恩旄樊雲門庶常增祥並索題孫蓬雲海冊子

昔在鄂州把君作風雨欬然疑有神奚囊負之渡江去夢魃失

色蛟龍噴鑑湖狂客才藻新

陶子綰編修

琅琊少年亦絕倫

詩塔詩選

廉各分壁壘張其軍此時三峯鼎而立定有光氣干星辰吾也

落落蓬蒿人常思披髮駢騏驎恨無奇文壓雄怪願君寫作垂

天雲

寄懷子綰編修即用其定州道中望西北諸山韻

楚天南望碧崔巍萬里煙濤浩浩開吳樹霜清蟻嘯斷漢皋木  
落雁聲來蒼茫身世餘塵缺哀怨江山出賦才黃鶴樓頭相送  
處知君日莫尚裴回

江夜

夜色蒼然起行人喚奈何客愁江上濶鄉淚月中多水落聞魚  
響雲低棹雁過蘆中容借卧合眼夢漁簑

贈楊豫庭觀察

叔澤

四首

一代循良選如公，孰與齊文章。高海內家世，本關西有子是青  
兒。其才雄碧雞，當前逢泰岱。咫尺幸攀躋。

痛絕我先子，與公交十年。當時侍闈幄，此地正風煙。廉吏死誰  
恤，孤兒生可憐。登堂容一拜，含淚告重泉。

天地抑何窄，飄零空自哀。倚樓一長嘯，風雨萬山來。歧路且休  
恨，使君方愛才。從今惟努力，不敢怨蒿萊。

奔走徧吳越，非公誰見知。孤生遭酷罰，多病負明時。身世竟何  
託，饑寒難久持。請看轅樞下，蕉萃絕塵姿。

謝湘文太守草書

當時翰墨誰最雄，蟻叟書學顏魯公。尚嫌羲之逞姿媚，筆力直  
欲摩崆峒。蟻叟去後數來者，筆妙乃有東林宗。書家紛紛凡幾  
輩，秋蛇屈曲何能工。此君揮毫始妙絕，一掃萬古凡腕空。明窗

嘗見作一卷筆縱字大墨氣濃青天無雲白日靜四壁何以垂  
蛟龍昨朝貽我一執扇動搖懷袖生秋風雙鉤小字更精妙并  
恐蟻叟難爲功繫予少小喜弄筆摹寫終落形相中東家簪花  
不自醜一見環燕憎其容竭來幸得奉清秘湘簟犀軸常相從  
惜無好句誇墨妙九原喚起黃涪翁

子鎮編修自楚南視學歸攜詩過訪賦此酬之

絕代嬋娟子飄飄氣不羣才名徐僕射詞賦鮑參軍帆度鏡湖  
月衣留衡嶽雲遙知碧湘上芳草尚思君

日莫登樓望渚宮雲不開苔荒賈生宅木落定王臺使者蒼梧  
返新詞白雪哀至尊方側席珍重濟時才

聞杜子貞貧甚賦此慰之

杜陵一生窮徹骨至今留胎到兒孫傳家長物復何存白木長

鏡喜尚存哀壑槎牙虎豹怒老湫蟠鬱蛟龍尊丈夫不合趨風  
塵山川荆棘纏其身朱門衆婢賤羅綺空谷牽蘿徒苦辛天公  
與人何怨思猗頓獨富黔婁貧君知此意不可解掉頭且看西  
山雲

壽蟻石歌

吳梅心廣文

履剛

得奇石於姑蘇瑞光塔下名之曰壽

蟻邀予作歌

咄哉蟻公太作劇古貌荒唐學黃石頭角鬚鬚毛矻矻跌坐蒼  
崖面青壁問何幻此承蜩形應是防他射虎客嘯雲有侶何處  
去補天無才還自惜倘逢逐客徒取憎幸遇老顛愛成癖我昔  
越游曾見之拾粟相隨共晨夕一朝別我忽飛去回首白雲更  
無跡初疑匿影羅公圖或者潛踪到溉宅誰知來赴石公約攬

蔓巢松此棲息化身空勞越女尋說法聊傍生公席跳盪嘆咄  
極幽趣皴瘦玲瓏逞奇格如八公變化真入神幸我摩挲尚能識  
雖然此路多險巖漫恃靈蹤恣騰擲徒令冠被漢人笑終恐身  
受秦鞭斥矜奇鬪捷空爾爲遠處深棲始爲適世上大抵多勞  
勞山中無爲怨寂寂題詩我獨賀石遭長嘯一聲萬峰碧

泮山雙柏行用少陵古柏行韻爲梅心廣文作

泮山之前有雙柏氣鬱蚪龍體盤石巖巖直欲窺萬仞矯矯居  
然挺千尺託身豈許凡木齊得地當爲至人惜蟠枝濯雨千年  
青老幹封霜太古白即今春色來自東吹香已滿宣尼宮孤撐  
天地格彌上飽歷滄桑心轉空幽森豈無真靈守峭直宛有烈  
士風乃知羣生貴自立咄彼造物原無功三吳靈秀鬱文棟顧  
影亭亭互矜重翠冷何愁晚節彫根深豈怯迴颯送已教雄氣

壓金虎行見神霄下丹鳳當年瘦杜空自嗟材大終爲廟堂用  
題黃石齋先生手札奉同貴筑中丞公用倪鴻寶韻並效  
其體

冶麗不能媚僉壬不能容浩然歸去來北山喜相逢談經紹新  
建宰木悲故封披髮見高皇夢躡蒼精龍

緹騎倉皇色赭衣黜澹容斯文苟未喪此別應重逢園扉碧血  
澆講杜蒼煙封哀唼激漳水風雨嗚古龍

袒髮鄴園祭天地皆改容燕都事去矣龍漢身親逢割肝痛國  
難喋血連藩封尚憶平臺諱何由挽髯龍

閩嶠尚堪國孤臣聊自容麻鞋赴徵召末路君臣逢自天重學  
行入地猶衰封絕筆記丙戌厄運悲蛇龍

高鑑無遺照纖翳不可容古魂出紙泣真面今始逢絕學傳法



乳微言闢塵封寫本亦奇筆鬱律蟠蛟龍

呈陸春江師 元鼎 即次其江寧留別詩韻

江城何處唱瀟瀟搖曳春愁柳萬條花外夕陽申浦水笛邊晴  
雪子胥潮銷魂紅雨剛三月回首青山戀六朝知否練江諸父  
老早從雲際盼王喬

吾師治行古循良袖有清風鬢有霜練職久爲當軸重退閒猶  
事著書忙麋城日莫平蕪合鶴市春深秀麥荒近歲吳儂憂不  
細那堪揮涕問農桑

頻年契濶負琴尊蓬轉天涯豈有根老女蛾眉誰復惜虛名龍  
尾更休論幾曾白雪誇高調賸有青衫記淚痕自分焦桐成棄  
物猶隨桃李列公門

元亭一笑尚依然師弟情深總宿緣結契直同溫雪好愛才誰

似陸雲賢茶煙禪榻論文地花兩重簾中酒天且解琴囊好將  
息綠楊暫繫使君船

贈吳福茨觀察

引孫

風流誰似延陵季四十功名尚黑頭早歲文章超八代而居威  
望冠諸侯側身天地今清晏坐領湖山古甬句東閣梅花一樽  
酒二分明月話揚州

我已風塵懶曳裾青氈寂寞意何如囊中豈有匡時策門外空  
多問字車飛檄漫誇枚叔筆薦賢終愧孔融書

謂薛叔耘星使

自憐三  
徑蓬蒿滿敢屈旌麾下草廬

將歸吳門留別梅鷺爲臣

之子宛陵後詩名誰與儔有才堪接武無忝是窮愁憶昔從淮  
海

謂澹如師

看山到婺州至今於邑水猶傍釣臺流

抱瑟更誰詣無端而來四明匆匆過短至落落又長征紅燭今宵  
淚青尊舊雨情試聽江上笛即漸作離聲

送貴筑公移任鄂州

虛堂澹無人獨坐撫瑤瑟商聲激離絃中心忽如失躊躇欲相  
送奈此幽憂疾寒裳未能從卧轍焉可得遙憐諸父老祖道正  
悽感寒波咽瀟吹落日黯行色目送南鴻飛思公此何極

璞齋相攸得其鄉鍾希洛秀才瀟以薏苡分甥女字之暇日  
出其近作示予愛賞之餘喜書於後

千秋又見相如出希洛與子同名喜說凌雲賦最工我以廣談知衛虎  
君先皋廡歛梁鴻嬌兒解詠庭前雪此子猶餘正始風青眼高  
歌吾老矣讓渠秀譽擅江東

書沈子復孝廉嘉澍魯歸紀程後

頻年辛苦事蟲魚千里羸騰尚著書魯壁金絲春草裏秦臺石  
碣劫灰餘歸心綠水長洲苑古道黃塵短轂車曾是倦游還病  
渴可無眉黛伴相如

時君將有  
量珠之聘

辛卯五月應南皮尚書之聘將之武昌璞齋以詩贈行並  
貽畫扇賦此報謝即以留別

一樣漢江客而今成獨游薦書勞北海舊夢憶南樓聚散十年  
事飄零千里舟銷魂團扇上畫出楚天秋

別有憂時淚憐君薄宦身蛾眉原易嫉龍性詎難馴海內方多  
事高堂況老親因時勉努力凡百慎緇磷

留別諸氏姊兼示諸甥

離思忽酸苦江城梅熟初秭歸嗟不已客去意何如且忍尊前  
淚常通別後書相看俱老病臨發更踟躕

落拓過三十勞勞何所成文章難一第屬望到諸甥采艾此佳節飛蓬方遠征牽衣憐阿玖謂九甥女亦有渭陽情

贈北平陳嵩佺司馬壽昌

同是高陽舊酒徒黃壇回首渺愁予春明尚憶當年事秋水新成傲吏書著有莊子箋司馬凌雲原不忝元龍近日意何如崑西百

姓方蕉萃願乞棠陰護里閭曾宰吾邑

一曲離歌百感增湘絃初咽指初冰歐心休學李長吉病臂已同虞永興曾對幽蘭題楚畹漫將片石豔韓陵最賞子駢體文他時燕

寢凝香處定有相思付剡藤

楚游襟別

莽莽關山挾策行風塵牢落此餘生只知白社堪終隱誰遣青驥更遠征藥餌扶持新病骨蕙纒鄭重故人情江南五月梅花

落腸斷離亭玉笛聲

越江煙水接吳天  
泛宅浮家幾播遷  
賤謁諸侯原左計  
身經多故況中年  
征衣尚漬  
依人淚  
生業聊資  
賣賦錢  
橡栗俱荒  
兒女瘦  
故山猿鶴倘相憐

孤生那敢怨勞薪  
自別邱園已幾旬  
我恐熊兒常廢學  
人疑犬

子未安  
貧擔囊漫擬分  
蕉萃滌兒屢請侍行  
負米終當識  
苦辛  
但使汝

曹能努力無煩惜  
別戀衰親

久拚身世老魚蟲  
低首書塵藥裏中  
不分漢南大司馬  
還來吳下問  
梁鴻  
笛材何取  
孤生竹琴  
擊偏收  
半死桐  
見說胡床相望  
久危樓迴倚楚雲東

故人才調擅鄒枚謂諱仲脩謝鍾英屠靜山諸君  
沉直征南幕  
府開早見荃蘅

開楚澤  
新傳文藻繼  
蘭台漫將芳草  
怨遲莫  
別有名山  
容廢材

獨恨黃墟消歇盡夕陽殘笛不勝哀

世事浮雲不可論前游寥落幾人存  
靡蕪重賦生離別梨棗空

懷舊弟昆陟屺已成終古恨

壬午先太宜人在鄂感疾登樓猶奉侍返里遂罹鞠凶痛哉

有未招魂

去冬斐卿從兄歿于楚北

燕支嶺畔多陳跡待拂蒼苔檢淚痕

細柳新蒲傷客心女兒節裏悵分襟  
料量琴劍辭吳市收拾雲

山入楚吟萬事難憑詹尹策百年願傍女嬃砧

謂諸氏姊臨歧莫作

消魂語扇底離歌已不禁

姊以詩扇贈別

### 呈南皮尚書

南皮夫子天人姿文章經濟皆吾師  
古今縱此筆一枝鐘毓誰

道天無私方今風雅道久隳藝圃榛棘荒不治  
獨公力掃千年

墜濯磨萬象輝兩儀偶然興發爲文詞  
幽管秘削爭瑰奇青冥

破裂雷雨垂蛟龍百怪纏躩踞況復字字根  
孔姬渾然元氣何

淋漓當其簪筆蓬萊池風采隱然動四夷一篇偶出萬口推謂  
唐燕許或庶幾洎乎奉使玉節持星輅萬里勞驅馳夜光文貝  
豔陸離珊瑚網所舉無留遺貢之明堂世所希矧公忠愛結主知  
在帝左右如皋夔身當明威心憂危往往拜疏陳丹墀聖后動  
色天子咨授公節鉞專兼圻公亦披瀝酬恩慈精力於職百不  
疲經營九服奠四維直欲舉世成雍熙往者犬羊擾邊陲珠崖  
瓊海臨嶮巖樓船戢戢笳鼓悲妖星慘澹蚩尤旂公時鎮粵陳  
軍麾直以談笑當熊羆登壇粹嗟頤指揮敵騎不敢窺藩籬圖  
懸蛇鳥士虎貔磨厓遂勒燕然碑忽然旗竹荆楚移遠帶三湘  
控九疑漢南楊柳碧十圍昔何嫫娜今離披游女行歌樂且嬉  
喬木鬱鬱棠陰肥戟轅風清擁虎皮雖容裘帶羅尊羹杜陵廣  
厦夙所期時新初兩湖書院尚書自  
言昔年視學時即有此志標采雋逸搜幽微精廬窈



寵湖之麋萬瓦倒映青琉璃紅蘭含笑碧杜滋使我三楚皆光  
輝繫子蕉悴蓬門資敢隨衆女敷蛾眉竭來涉江吟杜蘿幸得  
大雅爲依歸既登龍門慰所思感激不覺零涕洟楚山第鬱江  
逶迤登臨倘許相追隨補生之賦崔郎詩我雖才弱猶能爲無  
言鶴骨瘦不支風塵振翻今其時

答譚仲修山長獻時主經心書院講席

行行江上折芳馨流水無心合楚萍同是倦游還作客未忘結  
習且談經蒼茫萬事催頭白料理千秋託汗青此亦山川奇絕  
處卜隣願傍子雲亭

附錄原作

譚獻

盈盈懷袖尚馨香意外行吟江漢長逝水不隨者舊盡高文  
終與道心妨看雲眼底千秋事擊筑聲中五月涼祇是相逢

同一笑浮屠多少舊時桑

贈績溪程蒲孫吉士

秉釗

暫向天涯息玉鞍  
燕臺回首路漫漫  
花濃上苑春將暮  
月到瑤樓景更寒  
湖海銷磨豪士氣  
風塵蕉萃侍臣冠  
別來顏色應無恙  
攬鬢尊前子細看

附錄和作

程秉釗

記從京雒策征鞍  
瑤想瑤思水渺漫  
淮鼎丹成雞犬樂  
緱笙音迥鳳鸞寒  
且吟楚澤秋蘭佩  
更理仙人竹葉冠  
等是朝真愧先至  
閩風高處待君看

尋黃鶴樓故址追悼貴筑公

黃鶴如何去不回  
白蘋騁望幾裴徊  
分明老子婆娑處  
賸有羊曇痛哭來  
花月傷心聊縱酒  
風塵扶病彊登臺  
無須更聽山陽

留喬木荒煙總可哀

贈錢唐諸肖鞠大令可權時宰江夏

廿年作官鬢初霜未了名心爲北堂如此江山供吏隱最難子弟盡文章行車麥秀添新雨卧閣香清夢故鄉可惜惠連今遠隔謂璞齋愁人草色滿池塘

兩湖講舍未竣肖鞠大令留居縣齋賦此志謝

瘦策寬鞵自在身卻來江上拂征塵敢隨龍尾充名士未免豬肝累故人下榻偶煩陳仲舉行吟聊拊屈靈均當年曾有論文約試把清尊證夙因

雨窗閒遣

四壁苔痕嬾不除涼陰黯黯雨疏疏掩闕聊託相如病退筆慵修叔夜書茶臼泉喧深竹裏芒屨香潤熟梅初胸中儘有閒邱

壑何處青山許結廬

喜晤謝鍾英孝廉辛

記否黃墟把酒時湘簾銀燭夜題詩  
曾同在貴幕府偶然韓孟生同  
世近者孫洪亦可師話舊忽成千古恨論交應悔十年遲  
箸書共抱名山志愧我談經鬢已絲

兩湖書院觀荷偶憶吳門舊游襍題九絕句

水檻風廊結構清此中聊可寄浮生  
旁人莫笑頭銜冷新署蓮花博士名

蘋波吹雨洗塵裝煙水依然愛此鄉  
忽憶江南好風景一簑涼月夢滄浪

畫鼓朱旗映水寒元戎小隊到湖干  
翠禽見慣不飛去閒立水蘋花上看  
是日南皮尚書亦以觀荷到此

水閣風涼酒醒時  
蘭紅杜碧耐相思  
分明秋影詞人筆  
一角湘

紉畫楚辭

璞齋畫扇  
曾作此景

雨後湖天卵色青  
涼陰如墨罨池亭  
桃笙夢起閒無事  
收拾幽

香注水經

搖碧齋中結社時  
越姬解唱鬧紅詞

十年前客西泠  
屢與澹鴛如先生  
結鬧紅詞社

鴛零落盟鷗散  
誰問美人湖釣師

子別號也

一樣青山似六朝  
香南葉北殼魂銷  
未忘鬢影青谿舫  
斜月蓮

花第四橋

畫船風露夜遲遲  
漸覺蘋漪漾鬢絲  
趁此月明吹笛去  
短篷移

泊水仙祠

顧影湘波碧可憐  
墜歡如雨落鷗邊  
風流不見蓮池長  
瘦盡紅

衣又一年

貴筑公主講蓮池  
書院曾種荷數頃

蒼頭老吳歿於試厲詩以悼之

予已不得意汝今何處行魂歸漢陽渡腸斷秣陵城亦有思家  
淚寧無戀主情天涯妻子在猶自怨郵程

試畢將歸厝老吳於白門鷲峯菴泫然賦此

瘞汝一坏土古菴秋草空荒階孤拜月破屋鬼嘯風委骨蓬蒿  
裏招魂道路中青燈聞夜哭似與泣途窮

贈屠靜山孝廉寄

白雪高詞久不聞寥寥粉杜感斯文九州浪跡知誰偶絕代銷  
魂是此君長嘯來看江上月征衣猶帶海南雲相逢共證千秋  
業可許名山一席分

將回江南留別武昌諸故人

杜詩韓筆彭陽檄少日詞場偶得名抱璞猶爲知己重碎琴自

悔進身輕朱門怕作重來想  
漆室原無欲嫁情此去清涼山色  
裏打鐘掃地足平生

金淮生同轉

武样

攜詞過訪即送其重游粵東

窮巷經時絕過存忽聞剝啄到柴門  
袖中白雪新詞卷海外紅  
蕉舊夢痕自昔品泉曾有約至今聞笛獨銷魂  
此行好作尋幽計宦海悠悠且莫論

東風吹上郭門船唱到留公意惘然  
萬事銷磨吾輩老千秋寥  
落幾人傳夕陽草色旗亭路冷兩梅花  
病榻禪嶺海交游如問  
訊爲言蕉萃杜樊川

酬王少谷大令

念祖

不作金門吏來尋南國春  
采蘭堪奉母典笏尚留賓  
縣古川原秀山空雀鼠馴  
此鄉足泉石知不厭清貧

身全集  
瀟灑陶元亮清狂顧凱之高風問誰繼經術况吾師宦蹟名山  
記詩情小吏知嶙峋一卷石原是出塵姿

士有不得意頻年橐筆行蛾眉苦謠詠蠶尾復縱橫俗薄文章  
賤塗窮姓氏輕非君善調護何處託餘生

舉首乾坤窄相知尚有君何因辨雌覓便擬薦雄文熱淚磨塵  
劍佳書負練裙何當奉談麈長此接清芬

錢叔懋孝廉

承煦

招同棗蓀良秦岐臣湘臣諸君集齋中

賞鞠醉後賦長歌報之

十日不飲塊磊生詩腸老作饑鶴鳴故人憐我太枯寂邀我花  
前載酒行入門已覺四壁豔禽華錯落圖書并搜芳濯秀見經  
濟直移香國來書城老紫嬌黃各自媚疏香冷豔難爲名中有  
一枝頗偃蹇澹不可狎疑無情孤標不求世俗賞瘦骨獨與風



霜爭有如漆室老處子自願不嫁全幽貞雖然我獨爲花惜濁  
世那得容孤清況今白藏正肅殺萬木交戰皆商聲此花秉質  
縱貞秀其奈風雪纏榛荆繞花裴回忽三歎冷香熱淚交縱橫  
主人勸我宜彊醉亟調翠管提銀鬯吾曹萬事貴適意且散鬱  
勃歸和平餐英何妨學楚客避世亦可師泉明悠悠時事豈足  
道對花太息花應驚此時主客盡起舞萬枝紅燭秋崢嶸花雖  
不言意如會玉顏映酒生微頰危時芳讌不易得況復入座皆  
豪英酒酣一笑向花揖滿階香影隨欵傾明年此會倘堪續更  
結山中冷澹盟

送宗湘文觀察備兵甌東

碧幢熊軾竟長征萬馬蕭蕭海上營采蕨原非今日事登車猶  
見古人情畫旂楊柳銷魂色戍角梅花變徵聲此去東甌資保

障行看談笑奏澄清

茫茫四國黯風煙衰鬢相看絕可憐豈謂窮途猶作別不知良會更何年登樓那屑依劉表蹈海終思學魯連豈願時清復相對從君華蓋揖飛仙

得杜子撫嶺南書聞從兄仲熊之訃賦長句哭之

木葉卷盡霜風枯白楊蕭蕭曉訓狐病卧荒齋慘無懌腹痛忽得天南書一官迢迢數千里不信吾兄竟長已十年遷謫真可憐八口飄零復誰倚五羊風土豈不祥如何三世終炎荒棠陰

治譜竟寥落於乎天意何茫茫

先祖資政公先叔太守公皆歿於粵

人生榮悴真

難必我亦生涯苦蕭瑟久拚白首淹敝廬直恐青山厭窮骨紅  
輸墨笛金叵羅當年羣從歡游多豈知一旦盡彫謝留此浮生  
將奈何君不見黃蒿刺天白日莫前有毒虺後猛虎太行孟門

百嶮岨不知託足何處所君幸返真歸太素道山兜率皆樂土  
縱有夔魅那敢侮況復叔季同一處骨肉九原永團聚天上差  
樂君勿苦人間萬事何足數

懷璞齋清江幕府

五十勞勞尚遠征可能攬轡竟澄清高歌未免悲諸將近有擬  
杜諸將  
詩長揖何妨狎老兵斷角斜陽吳下壘戍旂殘雪楚州營倚闌  
有母頭俱白莫更軍前請繫纓

將歸里門盼璞齋不至感賦一首

羽檄倉皇萬里傳風霜驛路滯征旃天寒倦鶴行將返江上歸  
鴻尚邈然傷亂已同劉越石談兵誰識杜樊川茫茫家國愁何  
限并入梅花雪夜船

四十初度與家人飲梅花下口占一首

乾坤何處寄閒身忽忽年華已四旬尚喜煙霞供老病暫將名  
氏託詩人春回草木猶黃瘦家有琴書未赤貧且與兒曹謀一  
醉玉梅花下度生辰

秦淮題壁

又到秦淮按竹枝人間煙月此何時本無科第容風漢那有心  
情對雪兒六代關河征騎急三韓烽火羽書遲綠沈零落身俱  
廢莫向頽波照鬢絲

廉惠卿秀才泉出示近著並以古書名墨相餉因賦長句

報之

國初以來數風雅吾邑傳者曾幾人廉郎晚出最雄俊如古揚  
馬生峩岷竭來示我文一卷古色滿紙吹天芬紅蘭當風靜窈  
窕青峽巉雪奇嶙峋我抱朱琴久無和空山歌哭誰相聞語言

文字稍自異鳩媒娶詈何紛紛君獨胡爲喜相就問奇繆欲隨  
芭菜緗奩犀軸輒分贈紫雲入手真銷魂豈惟文章焯一世更  
覺氣誼真而醕方今世事益頽壞顛倒珠礫迷蘭棹燕牙按絃  
鄭衛笑蛾曼入室春瘤頤吳中小兒弄姿媚禿襟窄袖紛成羣  
青樓白馬恣游冶醉墨亂點湘羅裙其中豈無稍雋異兔園一  
冊誇奇珍六書喜撫漢魏體八股乃仿齊梁文偶然得意取科  
第意氣直欲凌昆侖虎皮高坐亦何物爭取窳朽充羹尊山中  
處子獨不嫁倚柱而嘯徒悲辛眼中人忽見吾子矯如健鶻摩  
蒼雯手揮羲娥破幽曠頓使萬象回清新功名得喪良細事始  
雖夔屈終龍伸雖然願益自鏃礪六經三史加精勤染蒼染黃  
視所近幸葆堅白無緇磷梁谿老輩久零落且喜斷簡今猶存

惠卿近得梁谿文  
鈔擬集資刊之

網羅散佚吾輩責毋使練素蘊良塵草間僵

卧一窮盡看君述作垂千春

短歌示璞齋

璞齋居士年五十猶有一官吾不如獨憐蕉萃百僚底舞參短  
簿徒區區我曹識字應窮途莫嫌小兒畏詩書何當棄觚學擊  
劍市上悲歌從狗屠

登樓

東風吹不盡萬里墮春愁芳草欲迷路好花偏近樓倦飛江上  
燕冷眼水邊鷗爲問往來客日斜何所投

德清俞階青孝廉

陸雲

以新詞見貽率答一首

墜歡如雨夢如煙怕讀黃門悼逝篇倚柱沈吟徒自怨登山痛  
哭更誰憐功名豈盡金閨籍身世同悲錦瑟絃莫爲春愁損年  
少危時珍重祖生鞭

程稻村太守招同張筱菴給諫嘉棟張誨齋廣文思訓吳

竹樓筠孫夏伯瑾敬瑜兩編修小集郡齋即席賦謝一

首

白髮依然橐筆來春風座上暗裴回隆中敢詡真名士海內誰  
知老秀才難得使君今許郭偏從佳客譽鄒枚須知文字能招  
忌且對青尊口莫開

長孫阿筠生喜賦一首紀之

此亦翩翩小鳳雛廿年前憶洗兒初但教老子能彊飯尚可他  
時見讀書先世高才多未達後人繼起定何如慙卿慙長都休  
言祝盼親傳此五車

在璞齋玉峰官廨觀劇感歎而作

風塵忽見老萊衣回首吾生事事非眼底看人開畫錦夢中何

身會集  
處覓親闈書畫堂日暖歌聲細故壠雲深鳥跡稀此際九原應太  
息孤兒頭白尚相依

長歌贈錢唐張子虞太守 預

聖湖奇秀甲天下中間作者推腹廬藻績山川麗日月直以萬  
象供筆驅昔年衡文到南國畫旂徧歷三湘區絕代輜軒一照  
耀至今蘭杜皆芬敷三載歸來謁京闕帝命重掌蘭臺書時藉  
不用雅頌手遂乞五馬來三吳金閭亭邊握君手頓覺爽氣生  
眉須崇蘭堂稿出贈我入手不啻千明珠知君傳世別有在餘  
事猶足淩歐蘇平原內史敬愛客梅花東閣張琴觚退談時事  
各太息酒酣擊碎紅珊瑚方今世道益龐楮豈惟文字多榛蕪  
當途爭崇泰西學拉丁圖籍資規模高談富彊豔蠻貊意氣直  
欲無唐虞猩言但爭口舌巧蜉羽自詡衣裳殊橫流滔滔不可



返吾儕於此當何如飄然時危一腐儒青衫蕉萃朱顏枯未能  
上書學賈誼但可蹈海隨申徒今逢使君一傾倒益信吾道無  
歧趨兇離窈停世所愛偏從慟哭知唐衢遂令病驥亦振竦矯  
首欲與浮雲徂使君風流絕世無使君才望今夷吾使君今且  
建隼旗澄清一世公等在我今不歌而哭何其愚烏虜我今不  
歌而哭何其愚

哭宗湘文觀察一首都一千二百有六十言

今年客姑胥太歲逢作噩涼宵掩關卧風過疑剝啄恍忽來故  
人形容宛如昨依依欲與語夢枕忽已覺披衣暗裴回顧景悲  
落寞白楊風蕭蕭怪鴉悚人魄凌晨得素書手戰眼昏瞶傷哉  
我良執逝矣不可作初看謂非真細視良已碯仰天一哀呼萬  
象慘昏錯烏呼我湘公天才最雄偉龍虎胸鬱蟠風雷氣磅礴

少時尤作健清談兼馬稍結客多俊英論兵擅發畧盱衡天下  
事自比管與樂劫運丁紅羊赤眉肆凶虐楚甸方舉烽吳闔亦  
傳柝誰何一將軍勢位殊顯燦珠玉羅廣庭鶯花媚行幄擁兵  
祇自衛所至任鹵掠君時依府主苦守廣陵郭恨無三尺劍鼠  
子急斬斯艾蘭身自防奏草手頻削誓當挽尺組爲國縛莊躄  
廣陵既不守間道走芒屨白骨填馬蹠青燐鬪螢爝哀哀國  
殤熱血奠一勺遂招溫序歸不負季生諾僉曰金石交惟君庶  
無忤高名動當途長揖見衛霍往來護儲胥出入司管鑰輸攻  
與墨守一一爲籌度薦剡方交推聲華益照灼從今會風雲萬  
里翔一鷲左符臨三衢五馬始騰趨時當大亂後壤土瘦礪磻  
荒衙嘯夢魘虛棟巢燕雀山田廢不治遺黎雜蟻蠶君也善拊  
循苦心問民瘼教士安誦絃勸農事耕鑿一朝起罷敵風氣返

敦樸世情嫉殊尤吏道殊駁榮紛紛諸牧令僕邀何足數論事  
工委隨當官弄咿媿獨君氣慷慤古劍淬霜錫抵掌大府前正  
色吐蹇諤龍性非不馴蛾眉忽謠詠以茲更數郡竟未一超擢  
最後遷四明文教尤卓卓萬金構精舍古色耀丹堊四壁藏圖  
書百家示矩矱彬彬六齋長文采麗金薤羣才奉陶埏六藝歸  
橐籥遂令句東士罔不奮於學走也一腐生氣骨最頽薄文章  
召奇窮身世悲落拓出門拙趨走那不罪腰腳乞食到四明生  
涯益蕭索饑來抱書泣一字不堪嚼忽聞太守賢愛士意真慤  
叩門欲通謁吞吐羞齟齬君乃倒屣迎招延入東閣翩翩兩公  
子才藻豔花萼君命從吾游朝夕共磨琢讀騷擬三閭作賦矜  
五柞有時值豐暇高會騰觥爵上客皆應劉雄才盡枚朔而予  
茲其間羊豹并一鄴酒酣角柔翰我實愧孱弱君曰班范儔非

徒邁盧駱極知言獎假實感懷誠恪比子遘家難瘦骨祇一搨  
朱顏泥黃土往往廢頰濯飄零白越衣蕉萃青油幕君獨哀其  
窮慰存意尤渥自憐一孤露無地寄歌嗚幸今得知己貧賤不  
隕獲歸來語妻孥拭涕互歡躍無何法越亂蛇豕怒相搏鐵艦  
窺蛟門風濤恣凌連幸君能鎮靜談笑狎鯨鯨臨江戰魚雷列  
戍排虎落閒來頻過我置酒共談噱關心雞籠戰扼腕馬江約  
誰歟急和戎竟成六州錯人生有離合飄轉如飛蓬逮君以憂  
去我遂失依著淒淒別句甬鬱鬱走荆鄂誰知風雅場跬步皆  
峭嶮衣冠幻夢猶懷袖隱蜂蠹紛紛炫燕石幾至喪吾璞所以  
亟掉頭長歌謝黃鶴歸來更無賴蓬梗任飄泊那不思佳人采  
此芳杜若訪君尚湖居儵然遠氛濁金石工度藏池臺妙疏淪  
夜深啟高館爲我設杯杓話舊同悲辛談新互笑謔酒闌忽不

憚長歎撫干鏤自云薑桂性不耐世酬酢萬方况多難國病不堪藥吾將抱白雲從此老邱壑此志竟屯遭海氛一何惡當途迫君起其義不容卻慨然上征艦雲水愁絲遡海色明畫旂邊風咽哀角壯哉觀察使威信結甌貉簡書固倥傯精力猶矍鑠日盼君政成歸來手重握平生所著書一一待商榷更期婚嫁畢結伴游五嶽何意一刹那死生竟成各賓朋俱痛悼父老盡驚慢惟留韋丹碑萬手爭磨斲方今國步艱世運丁窮刺海鯨磨其牙龍蛇競拏攫君今謝塵去瀟灑脫羈絡不須憂觸螫無用問龍蠖蓬萊與方丈隨處可行樂獨予頓塵網身世危一揮迂怪叢世尤支離受俗縛故人今已矣生死雙寂寞絕軫空自悲囊書更誰託當悲欲一放心淚苦已涸烏咽裁此詩聊以報冥漠庶幾魂歸來哀吟下寥廓

寄唁宗公子子戴

故人竟作千秋別腸斷西風孝子廬白首同歸今已矣青山卜  
兆近何如交深忍釋臺卿服病久猶遲范式車寄與皋魚應痛  
絕素箋墨淚不成書

斯文

憂患尚如此誰云生有涯斯文殆將廢吾輩復何爲日月纏妖  
氣江山入酒悲不須商出處雙鬢已先衰

季遲六甥郵呈雪夜見懷詩依韻酬之

聞爾耽吟日掩關古香四壁澹苔斑愁生北渚春蕪岸夢度西  
冷夜兩山病鶴依人猶自舞孤鴻覓食幾時還風烟海國方多  
事慙愧吾曹盡日閒

附錄原作

諸以仁

飄零詩賦滿江關四十才名賸鬢斑紅豆填詞朱秀水青衫  
對酒白香山天涯芳草春來去雪夜探花夢往還最憶滄浪  
亭畔屋破書擁卧故蕭閒

春感一首仍用前韻寄季遲六甥鄂州

東風事事不相關卻遣楊花點鬢斑生以窮愁銷白日老將詩  
骨託青山唐衢痛哭原無賴王粲飄零且未還幸有佳甥能酷  
似聊憑翰墨寫蕭閒

客夜懷滌兒上海

莽莽將何適悲歌越水濱嗟予方失路憐汝亦依人爲客計原  
拙欲歸家更貧勞生從此始莫便厭風塵

哭程稻村太守四首

潦倒天涯百病身更堪末路失交親不知白髮今誰主先爲蒼

生哭此人江上煙波添慘澹道旁父老話酸辛遂初竟負平生  
願猿鶴山中定愴神

少小追陪翰墨場中間相隔幾星霜喜公談笑猶豪健顧我容  
顏轉老蒼被放尚爲羅隱惜憂時偏愛杜陵狂窮途何物酬知  
己賸有青衫淚數行

藥裏琴牀小病中貽書約我到向東只知良會從今始誰信交  
期自此終留客但餘傳舍在論文頓覺酒杯空茲行猶得班荆  
話莫向寒郊悔轉蓬

彊對靈筵薦素琴虛堂風雨晝沈沈生前豪飲猶能否夢裏重  
來可賞音華屋山邱千古痛文章金石百年心遺孤養炬何時  
到莫使寒霜葛屨侵

重客四明慨然賦此



客裏愁懷彊自寬一枝棲息幾曾安  
箸書漫作千秋計乞食難為八口餐  
多病何堪逢亂世當年誰信老儒冠  
歸來雙鬢渾如雪多恐楊枝不忍看

真會集卷二

武進劉亞康書

顏升盒集卷三詞

更漏子

擬溫庭筠

柳飄煙花泣雨春在畫闌深處  
羅帶緩夢都斷情比吳絲更亂

歸國謠

擬溫庭筠

春曉深掩畫屏金了鳥起來還  
棠紅小雨晴鈴索悄杏梁雙燕

臨江仙

擬南唐後主

紫蘭庭院東風緊斷紅無力猶  
腸斷畫樓西明月不知人已  
依依曉寒窗外無賴亂鶯曉

相見歡 擬南唐後主

起來獨把等枝恨誰知自向杜鵑聲裏立多時  
言不得畫難出是相思祇笑鬢邊添了許多絲

應天長 擬韋莊

記得去年初別愁絕楊柳已如煙亂雅噓月曉寒天催起繡幃  
前今夜綠檀枕冷誰省日漸減腰支蜀箋未敢教伊知怕更  
著相思

醉花間 擬毛文錫

留君住勸君住留也終須去落日馬頻嘶草草將離語  
綠苔迷院宇更著垂楊樹今夜夢歸來記取門前路

謁金門 擬孫光憲

留不得留也祇能今夕一片亂鶯噓落月曉來依舊別  
從此

紅牆千尺隔斷絳河消息門外更無郎馬跡斷腸春草色

好事近

燭底乍相逢似有相思待訴彈指一聲紅淚卻依然無語  
夢  
回猶自不分明怎忍便分去苦乞麝篝殘篆把倩魂黏住

踏莎行

紅雨樓臺青蕪巷陌登樓誰念天涯客江山如夢送春歸鷓鴣  
聲裏斜陽碧潮落平沙帆迷遠堞茫茫萬里春愁直不知何  
處是江南東風剗地楊花雪

齊天樂

秋聲

西風吹得天都瘦淒淒更聞涼雨吳樹霜空楚江月黯不辨秋  
來何處蕭蕭欲住又木落荒灘斷鴻悽語萬頃枯蘆捲愁不去  
捲秋去天涯驚起倦旅蟲聲鐙影裏幽恨同訴故苑疏砧高

樓畫角別是傷心無數鳥嗁怨曙正鐵馬嘶寒并成淒楚漸漸  
無聲越秋深越苦

玉漏遲

夜來人意倦熏篝素被自憐幽婉簾角風來枕底愁絲先顛一  
片銀屏月好被滿地碎蛩嗁暗蓮漏短玉釭照淚一痕紅泣  
已教病過殘秋便瘦盡腰圍也無人管莫展湘筠暗裏朱顏漸  
換央及西風且住恐撩起玉釵幽怨愁夢遠依稀數行哀雁

西溪子

一縷杏萼斜月一角梨萼殘雪畫闌前春自去鶯不去嗁到亂  
紅深處一聲聲不堪聽

六醜 梅花下作

對一枝瀟灑看絕似江南春色憐春問春宵來誰弄笛吹墮明

月記取當年事如塵如影甚欲尋無迹何郎漫道工詞筆眉減  
煙青鬢添絲白春風也是愁格把一襟幽恨沁染花骨東閣  
寂寂漸落英雄堆積拂滿雙衣袖多是雪碧雲千里遙隔悵綠羅  
裙遠芳音遼絕頻回首斷橋孤驛萬一被驛使因循誤了斷紅  
消息相思事翠羽能說問夢回斜月梨筍院可曾聽得

淒涼犯

春風吹瘦桃等紙殘黃盡似秋葉紅黏鼠淚碧生蟲篆翠銷魚  
墨幽塵半篋聚多少零煙斷月冷蕭蕭猿聲滿紙似有楚魂出  
莫問人間世春草池荒夢沈無迹紅簫未築怕苔花易侵吟  
骨夜壑孤吟定憐我湘弦欲折鮫綃萬古豔此一縷血

憶舊游

秦淮感舊

記清簫喚玉豔墨題裙多少歡場一水秦淮曲問甚時流盡賸

粉愁香萋迷斷橋西塊殘綠畫斜陽更碧換樓陰紅消闌角羅  
綺全荒 茫茫渡桃葉聽何處紅樓鈿管吹涼丁字簾前月牘  
白頭笙伎猶說蕭梁故巢更無新燕夢鎖鬱金堂況照影青谿  
西風柳色如酒黃

摸魚子

恨無端燕瘖花瘦匆匆催換韶序一溪煙雨涼如夢病了翠汀  
鷗鷺波暝處忽展到吳箋澹墨加餐語相思細數道紅雨幽簾  
白蘋隣社無奈獨吟苦 年華莫鏡裏蒼毛幾許而今也厭塵  
組老紅荒徧花南屋待縛香茅重補歸尚阻定又被湖莊西子  
句留住羅裙鈿柱且悄與朝雲共敲釵玉細唱冶春句

燭影搖紅

元夜卧病

繡幕垂雲試鐙風細春星亂隔簾蟾月悄窺人人在深深院聽



到蕭慵鼓倦玉篝涼銅街自暖不知門外何處車聲嬌雷乍轉  
拚卻春眠畫屏蠟淚紅猶泫香衣蹂影半橫斜畫出相思怨  
爛錦年華漸換夜沈沈愁長夢短闌珊螺墨怕續何郎斷腸吟  
卷

菩薩蠻

繡檀香枕棲雙鳳錦花壓被春愁重殘夢落天涯東風吹柳  
屏山蛾岫遠燭淚銅荷泫幽恨竟誰知畫裙紅折枝  
綠蟬秀黛春無色鏡鸞愁攬珠樓月釵燕倘能飛試將情訴伊  
曉鶯啼不住一枕梨筍雨不是戀鴛慵起來終是愁

八聲甘州

卻更從何處拂征衣淒淒滿塵沙漸闕河搖落西風殘照吹老  
邊笳撩起斷煙離緒柳色澹棲雅滿目登臨地秋在誰家此

際倚間望極正紫萸簪鬢秋染霜華數故園兄弟如雁落天涯  
誤闈中玉人凝盼料近來顏色似黃萸關心處蜀箋消息誰報  
秦嘉

一萸紅

夜沈沈正蛟鼉愁卧大澤闕頑陰亂菽搖風衰蘆戰雪并作秋  
氣蕭森漸雲外頽峯月黑起一天涼雨楚猿吟那更城笳和將  
鄰管攬入村砧 回首故山何處怕鏡中蒼黛愁滿煙深魚氣  
凝寒雁聲壓醉歸路夢也難尋想今夜妝樓擁被聽滿階風葉  
定關心應是玉缸曉怨敲折瑤簪

瀟瀟雨夕陽

大旗搖不定颭斜紅一片落中流正山光欲暝笳聲乍起帆影  
初收賸與澹黃柳色冷畫六朝秋待下西牆去猶自淹留 回

望故宮燕麥弄離離金粉滿地皆愁又酒人歸晚扶醉過西州  
暈風前一鞭寒色算傷心都在灞橋頭歡筵散恨黃昏近獨下  
江樓

憶舊游

又吳裝背雨越紵催霜飄泊征途數盡南來雁悵故人天未依  
舊無書客心落日同遠秋色送平蕪甚懶賦長門慵梳短鬢漸  
老相如 蓉湖渺何處料倦柳殘陽猶照荒蕪昨夢江南草恨  
謝池廢綠骨冷難呼任教獨伴黃鶴身世楚雲孤待典卻征衣  
千山木落無酒壚

河傳

金井秋靜近三更幾處涼砧未停淒淒斷鴻唳月明難聽繡閣  
無此聲 愁裏畫屏天樣隔銀燭黑影也將人撒怕無眠越無

眠鎧前夜長人可憐

瑞鶴仙

漏瓊侵鈿瑟正依依夢到小坊幽陌屏山畫蛾碧甚煙皺黛暝  
也添愁色苔階翠疊怕重尋雙鴛賸跡恨鸚籠玉鑲猶闕不遞  
碧城消息 淒絕燕釵墜玉鴛盒零脂伴人烏邑房櫳乍黑羅  
幙外況無月算曉鶉殘淚斷鴻心事賸有西風知得正消凝一  
枕梨雲夢回無力

疏影

秋雲

涼雲澹白正梧階過兩宿靄猶積鏡裏濛濛黛感煙顰遙嵐淺  
暈如墨湘天低壓寒江暝帶一片昏雅欲黑看重樓遠處疑無  
黯了粉紅顏色 多是沈沈雨意溼煙澹未化雲水淒碧涼偏  
湘籠暝入重屏夢痕尋也無跡不知來雁羅雲裏可曉得夕陽

消息更銷魂冷葉關山淒欲澹黃隴月

淒涼犯

題陶子鎮編修湘廩館詞卷

驂虬忽逐埃風去  
瑤天蹴破秋色君山片黛獻愁供恨鏡蛾凝  
碧湘絃欲折染多少  
曉鵲豔血漫沈吟歸鴻怨緒且共楚魂說  
牢落悲身世蕙帶纏哀蘭橈蕩魄孤雲望斷捲西風素衫吹  
雪錦瑟無言任塵黥相思畫篋夢湘皋澹澹似有太古月

翠樓吟

玉京道人墓

碧草愁春紅簫瘞玉祇陀寂寞香土畫蘭人不見更休問湘皋  
殘譜琳宮無主賸懺夢青鴛曉魂翠羽琴心苦故宮遺恨玉絃  
空訴是處楊柳依依祇亂雅流水板橋西堍春燈彫豔影算  
猶有秋螢低舞愁煙顰雨況金粉飄零銅仙都去茱萸路野棠  
紅冷一鵲淒語

感恩多

小屏蛾影綠妝鏡  
曉紅溱花好不思  
看曉風寒燕子朱檐角  
私語惜春殘  
落盡鶯桃玉窗猶未還

臨江仙

有限韶華無限淚  
絲絲流過花朝  
舊愁新恨肯相饒  
藥爐煙寂  
寂蔽帳雨瀟瀟  
見說玉窗人更瘦  
春來減盡柔腰  
梨萼魂細  
不禁銷  
莫添無益恨  
權遣可憐宵

戀繡衾

鮎窗夢醒鐙尚留  
舊衣寒香燼玉篝  
想一翦如眉月悄無  
言猶挂小樓  
重來燕子應添恨  
甚簾櫳閉了翠鉤  
看默默楊花雪  
被東風慘作細愁

浣紗溪

青粉牆陰點綠苔濛濛細雨畫簾垂玉階盡日有誰來 燕子  
懶傳愁裏信海棠偏向淚邊開知他春去幾時回  
翠被香寒夢起遲輕塵如雨雨如絲春愁祇有落紅知 繡榭  
苔生人去後畫梁花暗燕歸時不知何事費相思

秋波媚

幾絲垂柳趁風斜可可著樓雅春愁一片漸吹漸亂絕似楊花  
昨宵朱鳥窗西坐茜月澹銀紗斷煙淒雨矮蓬殘燭如此天  
涯

摸魚兒

最銷魂綠陰門巷濛濛只欲成雨畫樓雙掩歲華鏗誰與東風  
爲主樓外路賸三兩吳鷺忍淚看春去逢人暗訴道莫再開簾  
好春只在煙草可憐處 還記得渺渺綠波前度杏鈿零落無

數春愁除是花能解猶傍玉尊低舞春也苦問底事當時錯信  
曉鶻語如今且住試留取殘紅玉京墳畔羸我斷腸句

綺羅香

與燕分愁瞞鶯作夢單枕暗憐春冷雨點顰山猶閣去年幽恨  
愁見月羅幙嫌疏嬾凝妝玉篝推病把相思訴與花知還防鸚  
鵡背人聽 梨雲欲度無力況是風簾霧幔翠昏香暝減盡腰  
圍除卻榴裙誰省金鴨小肺瘦辭香玉蟲低膽虛疑影便春魂  
消作楊花曉風吹不定

聲聲慢

蠟牆落粉蟲網黏花春愁撩亂秋千香徑重來東風綠瘦蕪煙  
曲池乍開妝鏡照何人理鬢窗前斜陽外指朱藤一架曾冒花  
鈿 不惜斷腸重見為如雲好夢如水流年一翦紅蕖而今開



到愁邊尚疑落釵聲細卻花枝低觸箏絃誰更管守花陰燕病  
可憐

玲瓏犯

一抹丁簾正簾外遙山淺黛低映總爲浮名負卻燕釵蟬鬢纔  
得一度銷魂早添了玉窗離恨只月明猶在花陰莫誤靚妝人  
影春蠶身世秋蟬命況年來爲我消損犀帷夢怯春寒怕愁  
得枕鴛都醒此際麝冷熏篝便起來有誰同凭願他生化作金  
猊廝守蕙幃人靜

采桑子

春來只自多風雨天也恹恹人也恹恹夢也無聊欲化煙 晝  
簾四窳斜陽裏燕也無言人也無言風定楊花盡日間

蝶戀花

春寒坐湘煙閣

燕子日長春事靜一抹輕陰先作闌干暝小院月明風不定滿  
衣繡徧楊花影 夢裏春愁渾不省無奈曉鶉只喚梨雲醒放  
了珠簾猶道冷繡牀閒伴狸奴病

浪淘沙

夜雨添寒春人乍去翦燈有憶意在春江煙柳間也

連日雨瀟瀟春已無聊金猊香燼又重燒料理葺帷須早起明  
日花朝 枉著柳千條不繫蘭橈東風可也覺魂銷吹冷畫船  
銀燭影何處今宵

浣溪紗

細雨霏紅溼繡茵花陰燕子鎖重門茸衾扶病度殘春 澹墨  
鮫綃奩畔字畫衫蜨影夢中人別來何事不銷魂  
小雨梨萼獨掩門綠陰如夢悄無人便無人在也銷魂 鴛錦  
暗消金枕淚蛛羅愁眉玉箏塵儘人無賴是黃昏

摸魚兒

題復堂填詞圖用稼軒韻

聽聲聲鷓鴣曉兩班  
離江上休去綠陰換  
盡天涯樹忍把華年  
重數君且住看門外  
關山何處非歧路  
紅襟寄語柰說盡飄零  
春風不管身世逐飛絮  
蛾眉好翻使嬋娟耽  
誤東鄰莫更相妒  
金徽本是無情物  
一點琴心誰訴  
翹袖舞怕瑤佩珊珊  
容易淹塵土  
相思最苦便結就同心  
西陵松柏也是可憐處

虞美人

杜鵑聲裏東風瘦  
只恐春歸驟  
綠陰如水雨冥冥  
且與碧桃彈淚過  
清明家家門外垂楊碧  
做盡銷魂色  
數枝金嬾不勝雅卻會牽人殘夢到天涯

平蕪綠徧江南道  
客淚知多少  
小樓燕子尚無家  
不信一生蕉悴伴楊花  
年年總爲看花瘦  
爲問花知否  
春來愁夢幾曾醒

夏 會 集  
索向紅粧枕畔寄餘生

憶舊游 見燕有感

儘飄零倦了恁向東風無力猶飛繞徧天涯路看夕陽芳草無  
處堪棲今年何事歸晚春色已全非只細雨關山鶯聲未老相  
見依依 樓西斷腸路悵巢痕換盡等影都迷綺夢無尋處  
褪紅簾幙猶污香泥碧桃零落誰管眼底舊人稀更莫問盧家  
玳梁月冷烏鴉亂曉

高陽臺 落梅

縞月微茫嬌雲澹沱斷橋野水無人雪滿閒階暗香猶溼鞦韆痕  
笛中已是春消黯況曉風吹化湘魂傍苔紋欲掃還休靜掩重  
門 綠珠自昔真珠豔甚墜樓容易碎作香塵敲落珊瑚枝冷紅  
墮處誰聞南枝賸有青禽在抱餘香啼到黃昏悄傷神老翠荒

灣淡不成春

憶舊游

甚鴛鴦小社鸚鵡閒籠門巷依然略記湘簾底正學臨唐韻小  
試麋九長憐玉兒妝瘦寫影入冰紈算斷碧釵痕啼紅袖色猶  
染闌干 娟娟畫樓月只孤照琴心何必重圓莫傍桃萼立恨  
鶯聲老盡換了晚鶻舊箏怕翻新弄觸指綠塵寒况苔影萋迷  
欲從何處尋鈿轅

無愁可解

鸞印緘紅螺墨戀翠瑤箋并寫離思坐看羅帶長楚腰近日漸  
細軟倚啼妝明鏡裏蟬鬢亂也慵理悵燕子不解情便有紅豆  
倩那箇寄 不道倦客天涯行行望刀環難商歸計碧花凝淚  
痕排日征衫自洗有夢尋將蝶去矣記墜向茜紗屏底暫強制

別怨將鴛被溫又簾外曉鐘起

浣溪沙

纔見天涯柳色新東風何事染愁痕子規聲裏又殘春  
碧草籠煙疑是夢紅簾吹雨細如塵縱非離別也消魂  
六扇湘櫳霧影浮雨聲打過小紅樓簾紋燈暈不宜秋  
今夜相思消未去一分如醉一分愁夢回況是五更頭

卜算子

那有燕棲梁但見蛾凝岫一角旗亭似夢中柳色黃於酒  
淺醉幾曾收歸計如何就越是秋深越是愁人比西風瘦

菩薩蠻

絲絲淚織星星雨暗蛩學說傷心語紅燭欲斜時一雙人影兒  
被池寒浸雪拚忍終宵立馬滑曉霜濃繡屏殘夢中

碧陰如睡湘煙暝繡簾淩亂楊花影花外轉嬌雷鈿車何處回  
商量隨蝶去細把相思訴蝶苦不能言枉教羅扇憐

清平樂

春盡日作

綠陰庭宇日日吹香霧天也厭厭無意緒只是忽晴忽雨起  
來繞遍等叢夕陽暈作愁紅不惜柳綿吹盡今朝猶算春風

好女兒

桐院沈沈淺醉閒吟問干卿何事難成夢只幾絲秋雨幾聲秋  
雁幾處秋砧欲把蜀箋題怨知難會別時心料閨中此際應  
相憶正繡簾風細藥鑪煙裏翠被寒深

浣溪沙

幾片殘花蓋鏡池捲簾無奈燕歸遲褪紅闌角立多時懶擣  
金泥描蝶影怕翻繡篋配鴛絲小箋香管寫相思

高陽臺

茜榻留香湘屏墮玉歲鞋深鎖重門夢境闌珊東風幾片梨雲  
綠蕪迷斷樓前路任馬嘶冷雨殘春更消凝鴛鴦檻風淒蛾岫煙  
顰消魂不爲南樓笛爲裙長水皺鏡掩銅昏鸚鵡猶呼重來  
也勝無人棗紅簾幙微黃月認墜歡如影如塵莫回身怕見桃  
等故泫啼痕

清平樂

峭寒侵袖欲醉偏無酒一院月明人靜後花影滿衣如繡東  
風深鎖重門門前一片秋塵認得雙鴛立處東風休損苔痕

浣溪沙

短短紅牆小小門半籠纖月半斜曛碧桃等下又黃昏閒向  
蝶裙題影事忍開鴛帕檢啼痕燈前誰是昨宵人



菩薩蠻

垂簾盡日飄絲雨畫梁燕子閒無語鏡裏欲回身一等紅向人  
薰爐煙斷續苔檻新陰綠乍起又思眠晝長春可憐

燭影搖紅

梧影搖涼苔紋泣雨幽廊溼不關情處忽相思曾記雙鴛立斷  
夢飄如墜葉月昏黃房櫳靜黑宵寒猶賸素被空篝伴人淒寂  
莫倚闌干錦鴻過盡無消息醉魂能得幾回銷鏡暈樊川雪  
只怕蕭娘怨別也無端殘蟬減碧闌珊影事祇有樓頭紅鸚能  
說

玉漏遲

客夜聞隔院琴聲

淡雲迷院宇玉缸紅斷照人酸楚誰在銀屏按到紫瓊新譜不  
是鶯聲曉陌是絕塞歸鴻悽語還認取洞庭月冷瘦蛟低舞

茂陵病已經年，悵典盡、鷓鴣裘。翠絃慵撫，蠟淚鑪灰，最憶畫樓深處。驚起羈雌，斷夢訴、遙怨冷煙殘。樹聲更苦，淒淒蜀桐吹雨。

掃花游

野塘楓醉，墮幾片殘紅，暗催霜序。斷橋西挽，賸蕭蕭柳色，楚腰慵舞。瘦馬斜陽，何減長安倦旅。向前浦。又木葉滿天，冷雁孤語。行徧湖上路，怕渺渺煙波，夢來猶阻。故人何處，算青山一片，不曾同去。斷壁積黃塵，滿旗亭舊句。自凝竚。記曾聽畫船風雨。

漁家傲

蠟炬紅銷，蟬錦盡、紫瓊彈冷。梨雲譜斷，帶鴛鴦愁，不語誰寄與。翠毛桐鳳，銜將去。夢影低迷，三里霧。畫旗盡日飄靈雨。待向瑤空尋玉圃。天忽莫、楚魂冥合蒼蚪舞。

暗香 用白石韻

畫苔怨色認土萼繡滿當時銅笛明月不來竹外幽花怕人摘  
重寫孤山舊影早零落逋仙吟筆空賸得一片寒香吹恨上琴  
席江國夜初寂甚細雨墜紅廢徑猶積楚魂暗泣待把遺環  
寄相憶今夜鶴歸何處應倚徧瑤天寒碧問此際腸斷也可曾  
知得

疏影 用白石韻

湘屏墜玉算舊時翠羽猶抱花宿怨入東風也似啼鴉愁紅染  
遍湘竹零星韻事無人記漫再說香南雪北便依然月色能明  
無奈夜寒人獨檢點香鑪茗椀故人縱尚在眉換秋綠翠老  
雲荒病鶴無聊苦守山中茅屋蒼梧雲遠招清些且一按鴟絃  
哀曲悵羅浮斷夢難尋枉對斷腸橫幅

浣溪沙

寂寂簾櫳細雨斜更無春色到窗紗小桃紅減一分等 繡被  
薰篝思夢笑畫屏銀燭惜年華東風吹客又天涯

浪淘沙

瘦騎踏危空影落千峯一天黃葉壓秋鴻同是無家歸不得相  
見匆匆 故國莫雲中只見青楓茸衫和淚怨西風暈入江南  
殘照色都作愁紅

賀新郎

悄覺茸衫冷算天涯風尖月細祇宜幽病春夢無聊隨雲去墮  
入一川花影奈仍被亂紅吹醒欹枕瀟瀟紅樓雨甚而今自掩  
船窗聽銀燭短有誰問 春風不惜秋蓬命悵年來飄零吳楚  
飛棲無定花謝鴛湖歸心急除是曉鷓能省便歸也只添新恨  
柳色如煙煙如夢怕春愁染到徐孺髻且消取病中境

桂殿秋

蘭燭暈麝煙輕玉簟春寒夢不成  
羊車聲過銅樓去閒傍珠簾  
看月明

甘州

數天涯芳草已萋萋  
拂衣更長行任鶯邊曉月馬頭殘照老我  
征程遙望綠蕪煙雨春色澹孤城回首江南路一髮山青底  
事飄流荆楚歎消磨多少短驛長亭勸行人歸去多謝子規聲  
只無奈楊花身世被東風吹倦不時停登樓處落鞦韆曲更不  
堪聽

點絳脣

夢怯春寒矮簾深鏤廉纖雨柳絲無數吹過重樓去  
一徑苔陰綠暗分攜路無人處不防鸚鵡學說消魂語

賀新涼

吾本窮民耳十年來孤兒寡婦熒熒千里故產池陽都割盡茅  
屋數間而已更休問舊時兄弟春草池塘春夢冷也飄零乞食  
黃塵裏天地酷有如此 故山邱墓荒荆杞只天涯蒸羹麥飯  
旁皇家祭痛絕菟裘猶未築三尺桐棺猶寄定憐我欲歸無計  
遙望冬青成一哭又悲風寒日蕭蕭起驪唱促我行矣

齊天樂

春愁撩亂如香絮濛濛暗飄金井鏡古波昏屏低黛遠深鏤一  
簾幽恨東風做暝又愁入槐花月黃添暈小別蘭缸蟬紗看度  
玉蟲影 芳期甚時才準問碧鸞天末誰寄瑤訊虬箭沈初麝  
煙膩後依約舊時風韻羅巾翠冷贖一縷曉痕斷紅猶印夢化  
湘煙小風吹未定

山筇子

落盡香泥燕壘空春歸底事太匆匆飛絮飄零何日定問東風  
鏡奩猶黏眉葉翠筵衣吹落口脂紅賸與梨花同蕉萃月明  
中

蝶戀花 春陰

小院東風寒恻恻放下珠簾不管蟬紗黑夢裏湘天如澹墨幾  
絲花氣濛濛白 牆角苔衣迷暗碧溼粉闌干黯了輕紅色隔  
着垂楊誰擷笛黃昏吹醒梨花月

漁家傲

盡日珠簾閒未捲東風無力游絲軟忽地楊花如雪亂春不管  
畫羅衫袖吹都滿 情問花陰雙語燕佩環可在深深院盡曲  
紅廊多繞遍尋不見碧桃筇外天涯遠

點絳脣 新月

窄窄蛾眉那能禁得愁如許  
等陰閒步都是傷心處  
三五秋  
星伴着同悽楚  
愁無語  
烏啼欲曙  
獨下西牆去

哨遍

蘇臺愁雨

春不成春秋不成秋  
萬綠俱蕭瑟  
甚滋味  
一點越梅酸  
便釀成  
傷心時節  
潤偏枕屏涼  
侵簾罅  
夢瘦渾無力  
但遙指江南  
淒迷  
煙樹都化畫圖殘  
黑待暗將幽恨  
訴嬋娟  
奈瑤樓遮斷  
無消息  
倚遍闌干  
那堪重記舊時明月  
更休道青門紫陌  
芳草今如  
積亂紅飛去  
楊花飄盡  
誰收拾  
何況苔階一重重  
綠無復  
玉勾  
遺跡只新蒲細翠  
若榴豔血  
算頻番  
愁雨又愁風  
尚賸得  
消魂  
顏色此情知有誰  
憐除與鏡中人  
說問伊何事  
鬢絲先白  
那更  
幾聲怨笛  
願來朝吹破  
重雲散  
相思碧雲空濶



臺城路 雁字

少年曾賦驚鴻影如今瘦毫都倦夢  
淑題紅蘆碣飛白寫出楚  
天清怨西風故伴怎才結同心一繩吹斷涼墨模黏愁雲點點  
望中滿 蕭闕萬里秋勁訝傳來急羽兵氣淒黯結陣誰工書  
空自笑寂寞凌雲詞翰纖波皴染奈目斷紅樓箇人天遠畫徧  
相思綠沙湘水岸

水龍吟

桐縣和璞齋

朝陽澹到無聊碧陰陰地香籠霧梨雲罷夢蘆碣未雪縞妝誰  
侶別樣嬋娟生來肯入羣芳圖譜待南薰借力伶俜身世便扶  
上鸞阿去 不是琅邪豔句 王漁洋衍波詞有郎似儘消魂誰  
桐花妻似桐花鳳之句  
憐儂汝將春避了不愁更被楊等嬌妒金井風微銅鋪月暝聊  
容小住化香雲好與綠毛么鳳護雙棲處

齊天樂

以下七闕續搜所得以不成卷附此

旅夜讀暨陽蔣鹿潭水雲樓詞古恨今愁一時交集因拈此解悼之猿吟斷腸鶻淚成血不足喻其淒怨也

君山愁黛含江綠尋君水雲深處白石幽情碧城豔眷換了一  
坏香土瘦蛟倦舞幸有个湘妃驂霞同去此際雙魂定隨山鬼  
嘯春雨 秣陵吟侶尚在廢壚秋草滿舊恨無數楚竹曉煙邊  
簫喝月續得斷腸殘譜騷心最苦算合與靈均執蘭低訴我亦  
飄零古絃悽自語

百字令

題金粟香先生冰泉訪古圖

漫郎去也只危亭猶在綠蘿深處如此江山供吏隱洗盡軟紅  
塵土古寺愁多泉喧夢靜一枕枕柳雨泠泠漱玉冷光飛上詩  
句 當日選勝林阿斜簪散髻都是神仙侶自與山中猿鶴別

爲問白雲誰主流水年華搏沙身世分付閑鷗鷺瘦藤無恙甚

時來訪桑苧

時訂惠麓  
品泉之約

### 秋霽

何事西風把十里蘆花吹作秋色瘦策行吟征衫殘淚病餘倚  
闌無力斷鴻信息楚山一帶傷心碧渺故國誰問白蘋江上倦  
游客 還念白社石老雲荒夕陽無言人影俱寂更休提秋歌  
夢舞蘭成年少已頭白幾度思歸歸未得正斷腸處又是一片  
猿聲背人曉徧冷楓山驛

### 八六子

恁荒遐白雲飛盡幽禽喚客停車悵霸業空殘越豔遺宮誰弔  
吳娃屨廊半斜 當年何限繁華夜夜青箏唱月朝朝紫曲分  
花試問者青山爲誰蕉悴秋波怨黛總隨流水空餘病葉紅迷

谷口秋波綠徧谿  
涯映朝霞臨流有人浣紗

丁香結

紅淚殘衫綠塵孤騎消盡  
雨昏煙曉悵江南夢杳聽杜宇偏說  
不如歸好海棠蕉悴損無人處背影獨笑東風何恨造次便把  
韶光瘦了 潦倒只鏡裏花枝曾見樊川年少髣髴零舊紅  
闌畔忍看斜照天際萬點春愁和亂紅飛到待因風寄與無奈  
碧雲天邈

少年游 秦淮夜泊

秋風吹淚上蘭橈紅冷藕華潮斷碧殘山疎黃倦柳何處認南  
朝 夜深誰傍闌干立人燕共無聊夢裏簫聲愁邊月色并做  
可憐宵

木蘭花慢一解

湘文詞長以重過惠山舊作書紈扇見貽祇院已廢荒  
苔繡春晝燭銀櫳墜歡如夢反覆吟誦迴腸宕心即拈  
木蘭花慢一解聊誌淒感即以奉酬

問天風何處又吹落九峯雲想楊柳灣頭顰煙恨雨瘦不勝春  
紅樓只今已改况當時花影倚樓人贏得秣陵詞客拈毫題徧  
榴巾 憑君莫再說前塵怕提起更消魂自釋達池荒華鬢切  
冷化盡湘羣惟餘野棠如雪共斜陽紅到玉京墳淒絕畫羅扇  
底遠山低蹙眉紋

真金集卷三

武進劉亞康書

顛升盒集卷四 詩補

金匱鄧 瀛石瞿

酬裘大葆良

清夏愜養疴結荷傍溪曲空宇澹無人古苔上階綠出門偶延  
眺暝色在茅屋牆頭幾尺山澹抹煙一角自憐常卧病幽夢阻  
林麓美人隔溪雲相思怨山木九峯有嘉招良會庶堪續白鷗  
沈遠心碧蘚圻幽躅欹枕且卧游茶簾夢初熟

寄懷葆良

花月照滄澗奄忽隨驚波青春去荏苒良會倏已過灼灼夫容  
萼託體山之阿抱質豈不好繁霜一何多與子結交密胡為隔  
關河瑤華不可寄歲晚將如何

鬱鬱對蕭晨悠悠思遠道美人期不來誰與玩芳草出門見行

跡苦緣不可掃別時已傷心別復如何好平生誓金石百歲永  
相保此意君豈忘相思爲君老

盤盤九龍山其下多邱墟嗟我先人墓亦在山之隅孤兒遠行  
役荆棘闕翦除歲晏不得歸白雲渺愁予君如過山下爲我少  
踟躕試問山中人松柏今何如

四顧習不樂悲歌仰屋瓦自謀猶未遑胡獨憂天下妖鯨覩重  
溟哀雁唳四野慨然望中原長嘯無和者天寒風雪緊裘敝誰  
肯假睠焉念同心沈憂不能寫

雜感

浩浩大江水萬古無回流人生一飛蓬風吹幾時休登高望原  
野百卉萋已秋離獸出求食哀鳴顧其儔孤鴻本無家日暮將  
安投對此習感觸俛仰令心愁



去者日以多來者日以偪出門臨曠野四顧無所適窮冬百草  
盡薇蕨焉可得多謝賢主人猶聞勸加食歸來語妻子歡笑雜  
烏邑何以持報君奮飛恨無力

大雅不可作慨然念吾師乾坤莽蕭條孤魂渺何之平生禮樂  
才身去安所施縱有千載名冥漠詎能知謂善必有報善人乃  
如斯白雲閔幽翳萬世徒嗟咨

客從故鄉來別我將南去澗水方橫流挂舟不能渡天寒朔風  
勁白日慘將暮青鯨磨其牙蛟龍鬱煙霧人生值多難六合盡  
歧路西北多浮雲幽憤誰與訴

山下有香草人多日以蘭不辭獨蕉萃自別榛艾間佳人既不  
偶孤立良獨難脉脉隨羣姬蛾眉敢爭妍承迎反予怒唬笑難  
為顏君子渺何所誰聞此長歎

葆良以詩見貽依韻奉酬

危柯警弱羽窮壑悲枯鱗物生各憂患蕉萃良有因我昔不得  
意乞食越水濱窮筋束老骨趨走苦不仁疲策歸去來冷抱西  
山雲山鬼頗窈窕含睇來媚人幽憂既成疾寂處聊與親蓬蒿  
隱歌哭猿鶴窺喜瞋靜念平生游芳草忽已陳感君貺嘉藻使  
我佩古芬願守歲寒約壽此空山春

右五言古體十有一首

寄舍弟源時依姊壻諸十一楚中

七郎五月送我行滿目關山愁獨往半年兄弟無一字越水吳  
雲夢餘想深秋慈母頻傳書知汝楚行方首途此行為汝喜得  
所轉念遠別心躊躇昨者客來自申浦道汝客游未知苦蓬頭  
齒足行市中黃葉秋衫不堪補後來消息到柴荆始知汝已牽

舟行家貧弱婦歸依母身賤孤兒學課鋤涼宵忽夢龍山月山  
色深黃月深黑夜靜愁聞越鬼啼霜寒吹折桓禽翼我以校文  
游四明忽聞兄病來西冷窮途兄弟不相值朔風慘絕孤鴻聲  
前游回首秋時節豈意真成死離別齧指何從解母愁招魂空  
復收兄骨臨風憶汝重欷歔汝尚有兄吾則無清明世業日寥  
落吾曹此後知何如兄亡弟弱百無擇自撫平生太蕭瑟性命  
空依白木鏡風塵漸老青衫色今我將歸營父墳一篇寄汝彌  
聲吞何時同向山中去麥飯冬青哭墓門

小姑山寄內

若有人兮隔蘭渚愁如汜人怨湘女凌波獨立悄無言秀黛娟  
娟閱今古我行江上思家苦空對青山憶眉嫵丹崖嵯峨白雲  
阻湘蘿采得誰寄與夢入江南腸斷處白蘋花開曉翠羽美人

含睇方欲語環佩九天起風雨覺來一笑秋茫茫依舊蘭橈泊  
孤嶼

欲別不忍別一首留別秦三楊五

欲別不忍別欲留亦難留大江日夜流不盡中有萬古離人愁  
問我游何處越江迢迢今越山阻青衫蕉萃黃塵高臨別方悲  
此行苦秦郎年少惟掩關平生未知行路難鐵峯近歲有遠役  
爲我起立愁關山關山自古多離別若箇男兒不烏邑天涯此  
去意何如搔首旁皇那堪說君不見小人有母真可憐臨行送  
子柴門前門前極望惟寒煙班駝一蹶已數里但覺哭聲猶繞  
青林間人生養子娛莫年我胡常在道路邊山中况乏桑麻田  
高堂饘粥誰周旋故人飲我一樽酒媿我飢寒迫奔走征夫歲  
晚倘未歸請酌魚羹壽吾母

苦寒行 日暮行奉化道中作

白日欲盡天濛濛萬山蒼莽雲連空我行日暮尚未已馬忽不  
進知途窮枯桑蕭蕭野燒白妖廟慘慘宵燐紅怪鴉碧眼出窺  
客嘯聲只在身西東壞山月黑蹲老熊振策欲過心忡忡回看  
徒旅去尚遠帽影出没荒林中此時獨立不敢進忽覺萬感來  
無踪我家乃在夫容峯田園雖貧芋栗充尋常此際草堂宿妻  
孥環坐春融融有時苓箬挂驢背川原窈窕漁梁通或借孤舟  
釣寒雪一竿絲裹梨萼風豈惟游泳足可樂山中雞犬俱從容  
今胡飄泊如斷蓬披裘帶索行倥傯不知前路宿何處但見冰  
雪高穹隆安得歸尋桑芋翁看山隨意巢雲松詩成且倚短鞵  
卧山城臘鼓催萼萼

送秦澹如都轉

細業

解組歸里

走也十年客吳越未嘗一刺干公卿夫子文章世山斗相逢獨  
以國士稱草堂置酒論時事痛飲乃見公平平生居恒憂國頭白  
盡漆室坐歎懷神京菟裘雖辦不歸老蒼生情重青山輕今胡  
一旦退志決短轅別我將歸耕大賢出處繫天下豈與末俗爭  
浮名羣公耳不辨蛙黽焉知爲國留耆英鵠鸞逝矣鷓鴣雀喜惜  
哉吾道終難行昔者元黃苦屯蹇赤眉青犢交縱橫半壁江山  
付鹿走九州豪傑思龍騰毅皇揮戈造日月旁求牧帥資南征  
臨淮大將受旗鼓更開幕府陳干旌柳營紅燭夜高會酒酣直  
搗姑胥城公時年少氣颯爽軍門長揖來請纓黃龍縛袴醉起  
舞摩崖上勒燕然銘張華平吳妙畫策韓愈入蔡尤知兵功成  
大帥上勲簿錫公身服朝明旌專車出拜轉運使牢籠山海謀  
豐盈四場十監盡奉法雖古劉晏難爭能浙西山水天下絕繡

節所至民風清畫船越女好眉黛爭將練素圖公形桐君拍肩  
子陵笑萬山長爲仙官青方今四夷事未靖犬羊奔觸羣思爭  
嗣皇徇齊太后聖深宮宵旰憂勞并紛紛疆吏擁旄節但知粉  
飾成太平北府荀郎是何物東山謝傅徒虛聲公雖貞亮世不  
用空撫國事心忤忤未能上書叩魏闕徑欲解組歸柴扃知公  
北望定歎息白雲千里迷觚棱自維歷落笑桓茂况復蕭瑟如  
蘭成草間負杖日歌哭罪言欲上豪強憎紫琴三尺亦將碎公  
今去矣無人聽九峯五瀉幽絕處水仙山鬼俱有情時衰焉望  
鳳鳥出身廢聊與鷗鳧盟願公繫纜且緩去秋風待我同揚舲  
對雪酬葆良用東坡聚星堂韻

連朝欲飲無竹葉冬心寒貯太古雪是誰力挽陽春回譜作幽  
蘭韻超絕美人娟娟隔巷居相思待把瑤華折門前屐印已將

銷襟上酒痕猶未滅

數日前曾過故廬小飲

忽然硬語盤空來老筆縱橫

瘦蛟掣直將奇麗驕清寒暈碧裁紅豔如纈此時空宇方沈寥  
側聽回恣尚蕭眉轉嫌玉妃力已倦天際素蚪去飄管詩情賸  
向灞橋尋賦筆須從梁苑說相期酬和送殘年聲應聊同方響  
鐵

東坡生日追憶詠雪樓壽蘇故事感歎而作仍用聚星堂

韻

老髯量怯三蕉葉獻壽聊供一甌雪去年高會詠雪樓山谷詩  
孫興豪絕當筵大呼斗酒來起舞不覺綸巾折方期觴詠常流  
連誰道丹青易泯滅每一集俱以詩畫紀之主人忽跨玄鶴行遺墨空餘  
凍蛟掣醉痕在袖綠生塵淚眼看筭紅泫纈自憐身世比搏沙  
何況飄零成寄屑黃墟懽譙曾幾時逝水東流日西瞥汝南故



事誰復賡吳下重來那堪說何當更約紫裘人醉倚霖等吹怒  
鐵

歲莫感懷三疊聚星堂韻

百年生計蠶仰葉萬里游踪鴻印雪涂窮日莫思回車四顧茫  
茫真慟絕築居苦乏茅三重行路險如坂九折可憐爨下桐半  
焦何事懷中刺都滅殘年急景徧匆匆天際六龍不可掣祇將  
瘦骨敵寒威那有綺茵圍錦纈竹林日落風淒淒回首前塵更  
酸屑時得黃子壽師武昌之計人間何物足把玩萬事如雲一轉瞥交游漸  
少彌堪珍世事猥多莫浪說悲來倚柱歌激昂擊碎昆吾三尺

鐵

雪夜夢借諸故人游寄暢園四疊聚星堂韻

飄然不覺身如葉踏碎千峯萬峯雪忽從鶴背逢故人笑指園

林景尤絕初聞隔竹泉琤淙不辨臨溪路曲折何人屐齒先我  
到苔印斑斑青未滅疏楊照水眉乍舒古木鉤人肘爲掣幽厓  
一花知我來特作新妝豔春纈更從深谷覓璇題閒聽詩人譚  
玉屑不知何處鐘梵聲清景朦朧去一瞥夢情應有白雲記芳  
事聊憑翠禽說湖舫尚憶載雪游倦枕鳳琵琶老鐵昔年楊整  
盒有湖舫

載雪圖予  
爲作記

### 右七言古體九首

#### 午日泊舟申江作

曉起繫吳榜煙波漸可親客中逢夏午江上話春申人醉紅蕖  
酒詩題白葛巾臨流采芳杜爲弔楚靈均

#### 過黃州

何處繫扁舟西風發棹謳江山淒白露烟月黯黃州老鶴幾時

返蒼龍終古愁夜深臨斷岸蕭颯不勝秋

將赴四明舍弟送予登舟悵然賦此

不久我當返無勞相送頻亟須歸勸母莫更念行人涉世應知  
險因時自惜身趨庭有遺訓慎勿厭清貧

送黃研芳孝廉歸姚江

昔與了公見高樓共論文

予識尊甫蔚亭先生於鄞之海曙樓了公先生自號

別來常憶

我歲晚更逢君家學有班史交情追紀羣故人蕉萃事歸報爾  
翁聞

題杜子久表弟遺像

孰謂斯人死形容宛入神通眉如欲語握手竟無因尚憶聯牀  
話何堪盡室貧孤兒餘葛屨相對淚沾巾

重至甬江有感

身會集  
誰云游已倦歲晚又長征身世終何託飄零不計程黃塵支病  
骨白首悔狂名日莫忽淒絕蕭寥風雪聲

曉行

哀角起何處驛門微有霜烏啼天澹白馬影月昏黃古堠疑人  
立疎林帶客裝前途渺無際萬感接蒼茫

盼葆良書不至

昔者金峨下論文最起予蒼茫千里別契濶十行書絕業風塵  
裏孤生患難餘故山蘿薜在猿鶴近何如

右五言律八首

遣懷一首用旅夜有懷東子獻韻

瘦盡腰圍孰護持加餐聊復慰衰慈卻憐窮巷回車日正是高  
堂搔臂時客裏愁多憑醉遣夢中家在恨歸遲年來壯志消都

盡怕向風前理鬢絲

白門秋感

白門柳色已蕭蕭客裏相看倍寂寥  
鶯語畫樓尋昔約蟲聲小院又今宵  
夢回遠岫初聞雁人渡空江正落潮  
曾是當年腸斷處楚魂哀怨不堪招

夜聞諸十一彈琴用春夜論詩韻

冷然洗盡箏琶耳琴德愔愔器自尊  
木落楚江起寒籟月明湘水語冤魂  
忽聞絕調疑無譜難得涼宵共舉樽  
來日刺船雲水去獨弦哀怨與誰論

旅感疊前韻

忽爲鸚鵡洲邊客低首塵埃道不尊  
翠被難尋鄂君夢紅蘭都是楚人魂  
本無佳思歌金縷漸有閒愁到玉樽  
如此江山文藻

盡茫茫身世更休論

懷史七大梁

日莫空江木葉多  
遙憐之子隔煙波  
千家夜色漢陽樹  
萬里秋風瓠子河  
楚客行吟聊復爾  
梁園舊侶近如何  
故山猿鶴俱無恙  
期爾同歸話薜蘿

南樓聞笛

誰在高城弄長笛  
行人日莫盡襄徊  
白鷗風起落何處  
黃鶴樓頭聞幾回  
江水不將歸夢去  
夕陽無數亂愁來  
何須更怨南征苦  
如此關山絕可哀

登鄂州城樓

幾日欲行猶未行  
登樓一片大江橫  
白波澹澹孤鳥沒  
黃竹蕭蕭哀狄鳴  
故國雲深不可見  
征夫天末難爲情  
漢南楊柳半搖

落那更城頭殘角聲

過彭蠡

一帆夜與匡廬別萬里西風放棹回彭蠡水昏如夢過秣陵天  
遠有愁來孤煙野戍寒無色積雨山城曉不開爲想十年征戰  
苦數聲畫角使人哀

壬午秋試落解書懷

西風又報三年息對此茫茫喚奈何得失豈關天下重飄零尚  
覺此身多空江日暮愁芳草老屋秋深怨女蘿滿眼不勝搖落  
感自攜古瑟哭山阿

九重側席待羣英喜見賢書達玉京我輩底須感淪落幾人真  
不負科名治平空上劉蕡策慟哭誰知賈誼情向晚那堪頻北  
望一天風兩雁縱橫

除夕有感

畫檐風雨夜蕭蕭如水年光黯已消  
枕淚衾熏多故事漏聲燈影又今宵  
閨中錦字無消息客裏杯盤總寂寥  
此夕祭詩誰與共故山猿鶴渺難招

夜坐示婦

經時扶病擁羅篝  
筆格茶鐺嬾不收  
顧影可憐如我瘦  
低眉休更背人愁  
竹聲敲戶碎  
疑雨花氣入簾涼  
過秋此際幽情誰會得  
一痕月照小樓頭

附和作

秋  
湘韻

為怯新涼近玉篝  
紅簾四窳雨初收  
幾回共向星前拜  
百計難消鏡裏愁  
耿耿明河斜入戶  
娟娟纖月澹宜秋  
夜深且自憑樓看  
牛女無言在上頭



湘臣諸子屢過問疾賦此酬之

我是毘邪病居士蒲團佛火伴閒身賞心幸得嵇阮侶妙手惜  
無秦越人年少漫爲遠游計吾儕只合在家貧

湘臣近以家貧亦有遠游之志

山中靈藥倘堪乞便擬穿雲尋列真

寄懷表兄杜子搗孝廉

學謙 粵中

孝廉亡婦已經歲况值長途易愴神釋服子荆愁見客登樓王  
粲尚依人江山絕域書難達哀樂中年感漸真極目五羊城畔  
路異鄉花草盡沾巾

渡錢塘作

隔江山勢鬱崔巍落落長雲萬里開吳樹遠隨沙島沒胥濤怒  
捲雪山來金牛終古消王氣鐵券何年失霸才擊柝莫生興廢  
感清秋風景已堪哀

試燈夜與故園諸子小飲感賦

滿地毵等雪擁門強燒紅燭話黃昏江聲有意喧鞀鼓月色何  
心照酒尊青眼高歌君等在碧山舊侶幾人存今宵祇合曹騰  
醉萬事悠悠且莫論

南園

南園垂楊綠更好小鳥翩翩弄其枝獨憑闌檻看春水此意幽  
絕無人知壯士山中卧未起美人日莫來何遲舉頭一笑問黃  
鶻萬里落落將安之

三月初七日作

春寒夢閣雨蕭蕭繡被紅香半已銷無賴東風撩舊恨有人生  
日是今朝檀龕寂寞承塵冷椒酒辛酸和淚澆日莫等前紙灰  
起倩魂如雪不堪招

走馬

荷戈萬里玉門回京兆街前走馬來文采猶誇鸚鵡賦簫聲閒  
在鳳皇臺頗聞夷甫曾當國可是平津果愛才孔雀屏閒歌舞  
感昆明莫問劫餘灰

將游金閭示靚雪

煙波一舸到姑胥正是鴛桃結子初私典金釵供服散憤燒銀  
燭伴修書文鴛託水原同命倦燕愁風未定居累爾金錢頻問  
卜茂陵何日起相如

哭杜子貞二首

海上吹篴不復聞白頭相望各酸辛孤生多難餘今日病骨窮  
途哭故人八口飄流羈嶠嶠百年筋力盡風塵篋中遺草應零  
落寄語朝雲檢點頻

彈劍蒼涼起百憂側身天地欲何求生來早已傷孤賤老去無  
端復遠游暨豔嫉邪甘自黜方干憎命問誰尤可憐辛苦收兄  
骨贏得蓬蒿合一邱

汪竹卿二尹

穎琛

以嘉肴爲饋賦詩謝之兼以誌感

風雪巢枝苦未安卻勞良友勸加餐情深真比桃花水福薄猶

虛苜蓿盤

予注籍冷曹補官無日

易主樓臺餘燕糞累人口腹愧豬肝舊

游且喜君還在松柏蕭蕭耐歲寒

十年曾同客上元宗湘文觀察幕中

重游明州張二尹招飲杜校書妝閣醉後感賦

此鄉煙水是溫柔倦客曾因一笑留千里依人生白髮十年無  
夢到紅樓交游且喜逢張緒老去何堪對杜秋況是江南腸斷  
曲瀟瀟暮雨不勝愁

江上思歸

細雨孤帆江上舟夕陽畫旂江上樓登臨欲問古來事山自無  
言水自流有母有母白雲邈日歸日歸黃葉秋平沙萬里北風  
惡日莫飛鴻何處投

右七言律二十有五首附錄一首

劉鶴笙大令

頌年

出示惲王二家畫冊爲各系十絕句

孤郭映寒流蕩漾花深處不見白鷗飛水香澹如雨  
著書秋色中臨水結幽閣美人期不來白蘋自開落  
西風梧葉零秋氣入書幌涼月滿階流時聞雨聲響  
野曠雲氣昏水墨漲岩洞登樓不見山春江黯如夢  
萬松夾幽溪日莫寒濤起遙指一山來濛濛空翠裏  
山水多清暉獨立如有悟詩思邈難尋只在微茫處  
古木帶寒煙西風日莫天棲鴉如有意相約灞橋邊

秋清四野高木落千峯出古道行人稀疏林見斜日  
寒雲出深寺時帶斷鐘行忽遇樵風起秋林有餘聲  
秋色收不盡蕭蕭滿山麓木末幾人家柴扉點寒綠

右南田

夏木森千章山氣晝疑暝獨坐古竹根飛泉自為聽  
古屋閔榛莽中有千年春薜花隨意綠日莫斷無人  
秋光着秋山澹極不可寫漁人去未歸繫棹寒林下  
自與九峯別好山都未逢畫中如可住即此巢雲松  
石氣寒更青池光澹逾白落日明苔陰照見古人跡  
雨過山盡浮空濛化煙靄時見綠簑人移舟水雲外  
急雨灘上來叢蘆散蕭瑟夜半忽無聲涼星照秋雪  
寒山杳靄中天色澹將莫風雪滿空林故人不知處

山中結構幽窈窕，間雲木他年來著書願。借一間屋，  
秋色渺無際。支筇時往還，平生游未遠。聊對畫中山，  
右石谷

山行

前行益微茫，後顧無來者。萬木風蕭蕭，蒼然日西下。

即目

日莫山蒼蒼，林深不知路。卻見采樵人，微茫入雲去。

曉入普濟寺

凌晨入山寺，秋氣淒以肅。雨後無人行，古苔滿階綠。

江眺

日莫秋風起，行歌不可聽。雁聲何處去，滿眼楚山青。

右五言絕句二十有四首

重來

一徑春蕪碧化煙重來門巷盡堪憐  
瀟瀟暮雨紅樓裏小着相思已半年

淡月幽坊獨自行舊家簾影尚分明  
畫屏東畔消魂處玉枕熏籠似隔生

秦淮夜坐

娟娟風露玉階秋銀漢三更澹未收  
一種閒情何處着白蘋篔簹木蘭舟

留別秦淮

秋風無賴送蘭橈愁煞秦淮水一條  
幾度停舟未能別澹黃柳色小紅橋

壬午秋暮省母鄂渚時值重九愁霖悵然  
檐雷浪浪終夜



不瞑感事述懷得絕句二十二首東錢唐諸肖鞠大令

可權姊壻遲鞠孝廉可寶並留示會稽陶子鎮方琦編

修恩施樊雲門增祥庶常求屬和焉

去年來時春草香今年來時秋兩涼行人照影楚江水顏色可  
憐如酒黃

客况羈愁百不堪依然蕉萃到江潭人間多少平楊色第一傷  
心是漢南

一曲高山淚萬行平生同調半淪亡寒蕪綠徧琴臺路時有歸  
樵話夕陽

袖刺年年祇自哀芳洲日暮更徘徊一篇鸚鵡誰相賞黃祖當  
時卻愛才

無意重尋黃鵠樓舊題名處墨猶留紅霞天半笛聲起知是何

人在上頭

補衡李白已千古騎鶴仙人亦莫招不是琅邪擅才筆楚天雲  
水忒無聊

征帆欲別不忍別美人道來猶未來碧天萬里秋水濶日暮相

思又幾回

謂子鎮  
雲門

數盡虬更絕可憐強扶病母坐燈前夜寒相向愁無夢聞撥鑪  
灰說往年

西風寂歷響疏櫺半穗蘭缸瘦不青繡佛一龕花作供澹香剛  
靚淨名經

故園兄弟幾彫零况我頻年滯客程從此無心愛佳節任他風  
雨滿江城

漢水繞堤閒不流兩行斜雁碧天秋憑他飛過秣陵去天末有

人方倚樓

料量家事學牽蘿老屋斜陽草色多翠袖漫矜人絕代天寒日  
莫可如何

香燼羅篝被未溫秋衫只是惹曉痕滿階落葉聲如雨租吏不  
來權掩門

眉痕添皺鬢添華兒女相思未到家最是夜來風雨緊累伊幾  
徧夢天涯

鶴糧垂盡事難堪苦味年來略已諳乞得桃花五升米明朝料  
理寄江南

絲竹東山事已陳謝庭風絮澹無春那堪羣從飄零後重對青

綾幃裏人

謂女  
兄瑜

青衫蕭瑟幾經秋真覺人愁我亦愁况是朝來風雨急滿天木

葉下寒流

是夜鄂垣放榜

征衣多半化緇塵不辨年時舊酒痕一片西風萬楊柳關卿何事又消魂

星房露檻悄然秋誰按銀箏唱石州記得秦淮腸斷處好風如翦月如鉤

歲歲天涯作重九風光今又一番新五更兄弟對牀話滿地寒

蟄愁煞人

時舍弟亦在鄂城

夜寒漸覺入深秋醒本無聊醉亦愁正是客心孤寂處四山風雨叫鉤輈

百種離懷只自知愁痕多化鬢邊絲蜀燧湘管俱零落獨對紅

蘭補楚詞

過黃州

洞簫吹破碧天秋十丈寒濤拍岸流入暮江山已如夢澹煙斜  
日指黃州

蘇仙一去幾時回寥落千秋作賦才風月依然人物盡我如孤  
鶴卻飛來

除夕不寐得三絕句寄婦

料理葺帷敵峭寒梨筭吹雪上闌干眠人紅燭樓頭影三度消  
魂客裏看

翦盡蘭缸不肯明合衣小睡又三更朦朧才入江南夢無那紅  
鑪爆栗聲

歸期曾約早秣花待得花開未到家今夜閨中應守歲小屏無  
夢落天涯

感舊

金鵝屏映玉窗紗曲曲紅廊認謝家鏡裏分明人對影一重羅幃即天涯

別後春衫染酒紅前塵回首已朦朧消魂此地重相見燭暈釵光似夢中

蘭夜缸等瘦不青蕙鑪閒對菜珠經畫簾忽着瀟瀟雨只許離人獨自聽

長記珊珊照影時纖眉秀靨映花枝門前一幅羅裙水流盡春光總不知

漢皋散步見河邊斷柳依依向人悵然賦此

商歌誰倚玉玲瓏落日旂亭寂寞紅莫怪來楊易蕉萃細腰宮畔又秋風

湖上秋感

日暮西風作意吹行人何處繫斑駁夕陽紅過斷橋去楊柳一株黃倒垂

偶題

湘簾四窳風悄然曲屏低枕花便娟小紅闌外銀黃月照見墜釵雙鈿蟬

重過湖上追悼斐卿從兄

底事斑駁去不還柳枝蕉萃未堪攀消魂欲問當年事何處重尋李讓山

書諸氏女甥阿玖詠月詩後

時年十三歲

閨中賦月擅才華希逸江東未足誇想見微吟擁雙髻忍寒倚遍玉梅花

有所贈

半臂輕籠杏子紗風情無際嫩年華退紅簾外玲瓏月照見南  
朝玉樹筇

一翦橫波入鬢流矜嚴消盡見溫柔月明風細人初靜愁煞當  
筵許散愁

新詞重疊寫鮫綃酒暈脂香豔不消忽憶燕臺筇影裏滿身風  
露試紅簫

廿載飄零白練裙酒闌斷笛不堪聞人間無處容長揖祇合焚  
香拜鄂君

亂書中偶檢得廿年前舊名刺慨然題二十八字

落落朱門詎可干十年潦倒愧儒冠人間不識羅昭諫莫怪當  
關白眼看

留別汪竹卿



策蹇蕭然出四明羣兒車騎正縱橫豈知風雪旂亭外尚有汪  
倫送我行

八月二十五日招同章定安陳夢雨吳孟斐梅鷺臣徐子  
敬張竹軒諸君飲媚香室分體得七絕十二首時定安  
將有津門之行即以贈別

今年詩人太蕉萃一春不到酒壚旁朝來扶病出門去柳色可  
憐如酒黃

重認蘅皋步履痕寒蕪如夢欲黃昏夕陽花底偏知路紅到枇  
杷白板門

自覺吟腰瘦不支近來真怕見花枝可能更畫旂亭壁門取黃  
河遠上詞

湘簾銀燭夜迢迢醉擁紅兒吹玉簫莫笑老顛裂風景向來等

月忒無聊

漫說文章豔色絲頻勞紅袖乞新詞江東淪落無人管腸斷雲  
英未嫁時

西風日夜吹楊柳雨態煙姿作意妍莫更依依說張緒風情也  
不似當年

徐陵翩翩才藻新元龍豪氣亦絕倫一官老去隱門卒我惜神  
仙梅子真

吳郎年少才縱橫高談雄辯四座驚朝朝被酒紅蓮幕醉弄桓  
公作老兵

章君磊落真吾曹對酒當歌意氣豪臨別美人結羅帶征衫斜  
繫赫連刀

羯鼓空候雜運前金尊入手且流連澥紅簾外銀黃月照着關

山便可憐

香銷燭冷夜如何曲罷吳姬淚更多不奈明朝江上別調箏重  
唱定風波

故人大好題襟集况是綠楊蘇小家勸爾一樽宜強醉玉闌干  
外即天涯

右七言絕句五十有八首

南湖先生訪得龔盦舅氏佚詩二十有九首如寄懷葆  
良五言古體四首雜感五言古體五首葆良以詩見貽  
依韻奉酬五言古體一首用東坡聚星堂韻七言古體  
四首盼葆良書不至五言律一首江上思歸七言律一  
首飲媚香室分體得七言絕句十有二首皆遺藁所未  
見至可珍貴僅酬裘大葆良五言古體一首載於藁中

身會集  
已有增改曩時未以編入以仁釐訂舅氏詩詞遺稿持  
例過於矜慎刪餘尚夥緬維南老刻意搜求之雅因重  
加料檢補編一卷其間亦有以仁寫定後別從他處覓  
得者送秦澹如都轉解組歸里七言古體一首即為其  
一安石碎金不復能以年月先後為次分體錄存都一  
百三十有五首參之正集以仁纂述之旨可以略見焉  
辛未孟夏以仁謹識

願齋集卷五

詩續補

金匱鄧 濼石瞿

江上春懷

數日不出門，春色忽已老。使我千里心，淒然滿芳草。美人渺不見，遠在碧雲杪。東風落桃花，亂紅不可掃。聞尋夢中路，未識江南道。燕子故有情，笑我歸不早。飄蓬且莫嘆，美酒聊自倒。春水五湖舟，拂衣就同調。

落梅

空山春色淡如秋，花落青谿水尚流。南國魂消香雪海，東風腸斷綠珠樓。酒人欲去難爲別，驛使重來易着愁。從此相思明月夜，一庭鶴夢更無儔。

石齒嶺看桃花

出自北郭門行行及三里青山若相識招我白雲裏山容媚媚  
水粼粼此景何讓桃花津隔花女兒笑拍手十十五五來窺人  
是時韶光已三月滿徑桃花落紅雪不知身在花中行但覺衣  
裳總春色一枝拂帽東風顛杖藜相逢多野仙各攜美酒勸客  
飲醉倒便藉青苔眠我聞此中人妻孥永相保在山時多出山  
少一生衣食于桃花如此田園貧亦好自憐落落趨風塵枉殺  
好花空自春何當移宅入林表與爾來結由東鄰

舊事

偶提舊事一酸辛那有閑情說好春自古別原無奈事而今我  
亦可憐人斷橋流水愁中路素被薰篝夢裏身莫向小紅樓上  
望遠山如霧雨如塵

對雨

沈沈風雨掩重門  
爐鴨香消被不溫  
但有濃愁無好夢  
客中祇合廢黃昏

春盡日樓望

子規了却一春事  
滿目韶光爛漫收  
新綠可憐爭繞郭  
落紅如此悔登樓  
江山對我真無賴  
花鳥辭人盡欲愁  
我尚思歸歸未得  
夕陽望斷五湖舟

客感

萬感填胸鬱不平  
冥茫鎮日觸心兵  
此才豈是逢時料  
久客纔知涉世情  
千里關山消駿骨  
四更風雪入雞聲  
短衣長劍平生願  
敢爲窮途悔遠征

秋夜獨坐寄遠

西風何處來素景忽蕭索山館木葉深秋意在羅幕夜中出門  
望天地兩漠漠明月愁欲沉疎星淡將落孤雲動天末鳴雁起  
寥廓中道時一吟哀聲慘林壑霜嚴道路澗寒甚衣裳薄因此  
懷遠人吾心渺何託

曉行

荒荒雞亂鳴游子獨孤征曉月忽將落寒天猶未明萬山昏不  
辨四野慘無聲馬亦愁霜滑遲遲不肯行

秋暮寄懷諸十一

娟娟楚天月渺渺湘水雲美人隔千里鴛鴦不成羣昨得瑤華  
書知君在京國緇塵污素衣面目慘無色慨然忽歸來懷抱不  
可開短衣挾長劍時復登高臺高臺碧嵯峨勸君勿歎息寶此  
金銑才終當貢瑤闕只我負壯志潦倒塵埃間春花笑綠鬢秋



鏡愁朱顏朔風夜蕭索鴻雁復零落斷腸楚猿聲折翼桓鳥哭  
秋滿黃鶴樓日斜鸚鵡洲何當袖銅笛與爾吟高秋

古意二首

數行秋雁落平沙涼思飄來滿若耶却望浣紗人不見西風愁  
煞白蘋花

素簟生寒水閣清忽聞殘笛不勝情垂楊未悟行人意又作瀟  
瀟暮雨聲

秋夜曲

梧葉蕭蕭響高閣花末幽蟾背人落珠簾搖風冰簟涼枕花瘦  
壓金鴛鴦蘭煙著雨散幽翠烟是秋魂雨秋淚夜寒獨坐愁深  
更可憐無人知此情

送友人歸楚南

曩讀楚辭嘗欲爲湘中之行訪屈子自沈處因循未果  
適友人歸作此送之

君歸乎言往衡山之巔湘水之濱舉杯向我一揮手飄然去醉  
金庭春我昔誦楚詞因之懷楚澤悠悠蒼梧之大野慘慘黃陵  
之秋色青楓日落子規啼中有三閭大夫之古宅風蕭蕭兮雨  
冥冥似有國殤山鬼虛空行翩然其來帝子靈煙裳水佩飄無  
聲湘花作紅湘草青碧水九曲搖秋清欲尋靈均自沉處舉劍  
手磔蒼龍精窮搜魚腹出其骨 九辨藏幽局於乎靈均哀  
怨祖留得精靈化蘭杜我輩招魂亦徒苦何如散髮煙波自容  
與送君去爲君吟衡山何高湘水深請操此曲水雲裏颯颯天  
風猿夜音

秋夜讀九歌草堂詩

哀怨三閭裔飄零百粵身龍蛇迷野戰蟻豨泣微臣白海人間  
世紅蘭劫外春一編足千古豈止冠梁陳  
散帶嘯巖阿衣裳裊女蘿曇花憐法喜貝葉老維摩日月歸雙  
樹文章託九歌祇應化山鬼風雨夜來過

游四明山放歌

三年走吳越奇境多未窮飄然來四明携得七尺筇御風撥煙  
霧百八十里行匆匆中途忽值秋雨至撲面濕翠紛千重乃知  
山靈故爲出開合爲我洗出三百八十之奇峯或龍而鬚鬚或  
虎而角角或如馬銜轡或如鷹睨空或如壯士豪舉手揮牙鏃  
或如美人笑啟齒粲玉容上菁下菁奇而雄大韭小韭皴而濃  
東晦西晦兀立而巖嵒離奇變化不可以名狀欲掩衡霍欺空  
同犖确萬奇石當道若老熊幽荒虎豹宅黯慘夔魍宮翠帶裹

女蘿山鬼來叫風妖狐嘯碧火怪鳥啼青楓行人盡孤悽見此  
愁烟慘霧心中忡忡忽聞鶴唳聲喚我上躡青芙蓉直從絕頂一  
顧望逸氣吹作垂天虹白雲何處來鬱鬱何蓬蓬路隨碧漢直  
氣與丹霄通星斗滿頭繁數百珠子光玲瓏三山仙人騎六龍  
翻江倒海來洶洶蛟鼉百族走其下急浪欲擊蒼崖空絕壁誰  
所 石室一一青苔封上有五鬣不朽之怪松又有千年不死  
之大藥金芝瑤草圍千叢山中老仙白玉杖顏色盡作桃花紅  
問之不肯道所以但云此間日月猶黃農舉手告老仙入山有  
緣得相逢昔年吳越苦多難紅羊一劫悲沙蟲此身縱未被兵  
燹然已飄泊如秋蓬滄桑身世一炊頃豈能重困黃埃中我願  
爲君灑掃白雲室君盍貽我含景蒼精龍即當誅茅結宅來相  
從

金沙行弔外祖于西峯先生喬齡

先生宰相之子孫簪纓五世爲朱門流遺至公澤尚存翩翩兄  
弟皆青雲獨公依然四壁貧曉夜鍵誦專精神手揮虎僕扛龍  
文年小亦已張其軍秦書十上不稱意空山抱策徒悲辛平生  
半因子女累吾母爲長舅五人公獨愛女如掌珍授以圖史兼  
皇墳向平願畢忽已老寂寞甘作由東鄰九龍峯頭多白雲伯  
鸞溪內波粼粼公來結此山水因欲依愛女終其身於乎蘭陵  
國破走虎兕黑雲垂天白日死萬人皇皇將遠逝擔女呼兒滿  
街市我家嚴君浙東仕千里煙塵斷驛使嗟嗟吾母一女子八  
口無歸惟母恃守此孤城欲誰俟悲風蕭蕭水之涘一棹扁舟  
欲東耳臨行以公委舅氏金沙斗大聞尚存俾舅奉公返桑梓  
其時我年方齠齒見公欲別泣不止若知終古之別自此始茫

茫生死未可知何意人世滄桑竟如此十年吳越未息爭公家  
八口愁零丁年衰不堪烽火驚忽忽揮手蓬山行須臾舅氏亦  
化去一刹那頃皆凋零其餘流落不知處謂死非死生非生蒼  
松根頽白骨朽冤魂夜夜悲冬青吾母聞報萬感并仰天一哭  
天爲冥精誠豈畏兵火劫從虎豹藪尋歸程艱苦備經心力瘁  
奉公骸骨登邱塋一盂麥飯泣而拜欲使白楊風雨皆悲聲公  
今披髮叩帝烏爲帝痛哭言生平上帝謂公幽且貞報公玉食  
登紫庭願公精氣作星斗默佑吾母壽且寧雲車風馬公之靈  
酌公三爵公其歆

送春三首

我今久作四明客忽忽華年將二十可憐壯志猶無成如此紅  
顏有誰惜烟濤浩莽蛟龍國荆棘幽荒虎豹宅江城草綠無人

行極目何曾見春色寶刀生癭血花澀夜半嘯聲出四壁丈夫  
伏處悲何及君不見西山寇盜猶未息

平時望春不肯至今日見春覺可悲天寒野陰日離離山黛不綠  
蛾斂眉繁花經雨背人落顧影無復紅芳姿恍如怨女惜春去以  
袖障面吞聲啼枝頭百鳥說何事意若恐春從此歸幽音苦語盈我  
耳坐使萬象皆淒淒況予在客易生感即對風月非其宜春來春去  
偶然耳何苦哀樂傷心脾急須置酒且行樂對花歎息空爾爲

我恨不知春去處欲往從之萬山阻春歸我尚不得歸灑淚吳  
天作飛雨或言江南佳麗非從前春色茫茫但榛莽六代烟花  
變劫塵十宮羅綺成焦土得歸亦祇添淒哀杜宇聲聲真亂語  
春乎欲去爾且去我將散髮扁舟自容與

病起思食雞頭不得感賦一首用歐陽公韻

近來百味皆厭嘗病起忽然思芡菡山妻欲以他物代玉潔香  
清總難擬因思少小吳中居門前溪水碧無底菰絲藕粉皆不  
乏此物勻圓更無比綠苞初剝紅玉鮮配以水泉味如醴食之  
滿口生玉津別有幽香沁吾齒方今江鄉風景足菱女踏歌水  
雲裏浮波粒粒紅豆如纖手承來更妍美此間物品亦自佳適  
口奈非情所喜金盤分餉知何人空使歸心滿秋水

贈歌者鄭郎

鄭郎別我將何之贈爾垂楊碧玉枝畫樓綠被熏香坐如此風  
流能幾時我今欲落何足惜愧爾殷勤勸努力青驄一去路茫  
茫此後相逢那能得春花秋月豈常新願爾天涯自惜身試看  
崔九堂前客半作山陽笛裏人

古詩



秋風動羅幕四壁生微涼滅燭聽孤鴻繞砌聞吟蟹迢迢遠征  
人渺在天一方送別曾幾日野草忽已霜青苔没人迹伊威入  
幽房明月亦何爲猶來照衣裳對此感煢獨沉憂結中腸

我我白玉臺兀兀黃金堂危樓麗鳩鵲碧水棲鴛鴦當年盛歌  
舞歡笑樂未央金釵十二院珠履三千行一時人事改秋塵暗  
飛揚蝸涎蟠壞壁燕糞落空梁悲風何蕭蕭四圍生白楊物情  
忌侈靡興廢殊尋常寄言繁華子好樂慎無荒

別句章詩

黃菊丹楓九月天翩然歸棹越江邊青山猶是來時色不信曾  
經十八年

少小趨庭樂事賒藍田四壁墨痕斜贏他一縣人爭說父子文  
章屬庾家

四明狂客迥難群三絕應推鄭廣文東閣花開好觴客滿筵酒  
氣澹于雲謂賀大令瓊張廣文寶仁

燭影耀綸暈不消綠珠按曲紫雲簫酒闌憶着江南事自枕殘  
花夢六朝每有宴會輒以樂部侑觴

楊柳瑤臺艷上春無端風雨起秋塵却憐小史闌情甚猶把櫻  
桃說舊人予始賞鄭伶人呼之櫻桃後又賞周伶醉雲

自分焦桐實棄材枉勞賞識到塵埃文章得失渾閒事却爲劉  
蕢痛哭來謂程司馬稻村

壯志空成燕將錄新聲曾託楚宮辭此情今古無人會愁絕深  
宵掩卷時馮夫子可鋪賞予詩文以李杜爲比

詩囊爛盡錦花彫魂斷奚奴未可招孤轡天涯歸不易典琴爲  
爾卜紅簫小奚奴於月初客死爲卜葬於北郭外

往時曾識東吳精酒酣狂草何縱橫高樓風雨夜吹笛都作金  
戈鐵馬聲張大令胡雋工草書詩有幽并豪士氣

竹葉分來酒數罍風情較比女兒愁從今不憶鮪味歸向花  
田學種蚶句章人家自製酒名竹葉青品在女兒酒之右又有  
蚶子下酒最佳

小院沉沉靜掩闌涼花細草伴愁顏閑中幽趣無人會青粉墻  
頭數尺山

闕湖山色碧周遮石齒參差一徑斜怪底女兒顏色好一生衣  
食託桃花石齒嶺桃花最盛山中人皆種桃花爲生

爲外舅狄覲五先生卜葬感舊述懷得詩四首寄內

竹馬歸來日鱣堂幾度經談文雄七子延譽到雙丁鴻爪留殘  
雪麟亡感落星西州門外路薤露豈堪聽

沈厲伯鸞宅高風通德門有經傳弱女無處託童孫野曠悲孤  
轉天長有斷魂東林遺範在往事怕重論

秋草西州路茫茫落照中製碑書有道把酒酹无功鬼嘯青林  
古鴉啼碧火空蒿歌數聲起哀思滿西風

絕憶閨中婦終天恨百端紅簫思卜壤縞袖待憑棺馬鬣今方  
罷牛眠幸亦安他時征棹返爲爾話辛酸

舟中閒遣

篷窗棊几讀南華更約樵青來品茶遣得閒情消得醉滿甌紅  
雪嚼梅花

奉和梅鷺臣衢河錄

無復蘭橈啟畫筵祇添新恨到樽前笛中楊柳吹春怨被角蘆  
花擁獨眠誰解樊川傷別意枉吟繁掾定情篇玉釵恩重緣偏

薄草草消魂只半年

燭盡香灰夜已徂相思可奈雪盈途翠鴛不逸加餐字紅豆都  
成紀恨珠那有心情尋酒伴空將消息問箏奴明年春到桃花  
日崔護重來事有無

江船小集東澹如先生

挂席已窮三郡勝開樽更放百年歌坐中主客南皮威海內文  
章北面多豈許抽身歸澗壑暫容散髮弄烟波浮生合付曹騰  
醉好景休教荏苒過

我是三生杜牧之青衫依舊鬢成絲綠波雙槳迎桃葉銀燭三  
更按竹枝誰解風情憐白石自將詩句比紅兒忽忽盛會知難  
繼獨把殘樽住少時

閒情

自結蟬雲曉鏡前繡窗並坐恰齊肩偶將風格撩人意故洩柔情倚母憐豔極自應珠作價愁多翻恐玉成煙尋春亦有樊川約只要深紅待十年

眉成倒暈髻慵來一枕梨雲夢乍回鴛帳四垂羞月見蝶裙百摺任風閑慣邀入局拋金葉親與燃脂寫玉臺來往花陰仙犬熟衣聲帽影總無猜

小髻斜眉態絕殊杏花村店豔當壇只知碧玉猶無壻誰道羅敷已有夫嫩約虛聞鷓比翼重逢羞說鳳將雛早知事後多成悔合載扁舟訪五湖

繡簾珠閣望參差徐躡蓮花細步邊紫蜀屏前筵散後青半帳外月斜時籠移鸚鵡心猶怯帶褪鴛鴦醉未知一種春情不能說費人評泊比紅兒

可是仙人郭密香青蓮合稱道家妝纖纖重把簪花手曲曲誰  
憐束竹腸命薄自應身許佛愁多賸以影爲郎何須更話人間  
事小閣清嚴禮法王

不情天氣可憐宵魂在梨花雪裡消小謫久知因孽重真容親  
自帶愁描枉教虛諾藏金屋可有來生似玉簫淒絕祇陀菴外  
路隔窗殘雨正蕭蕭

似聞羅襪化秋塵消息傳來不當真蘭草無心悲帝子桃花有  
淚怨夫人愁中自續傷心中畫裏重尋隔世身此錯從今無可  
鑄朝霞當日只緣貧

小蟬慵縮鬢蓬鬆楚楚雙眉畫未工纔聽簫聲來竹裏忽看衫  
影出花中凝情羞唱白團扇著臂愁消紅守宮倘許他年乞如  
願五湖風月任孤篷

盡日掌拖懶暈妝却因聞喚到回廊苔粘繡屐弓弓滑風過羅  
衣葉葉香見慣猶應羞障面別來也合費回腸柳絲如夢花如  
淚可記長途送窈娘

沉沉畫帳對爐薰悄悄蘭缸暈簾紋樓暗靈妃曾喚月梁飛神  
女乍爲雲綠波桃葉春前別翠羽梅花日暮聞孤負東風闌十  
二更無人在立斜曛

小閣依然敞綺疏閒吟無復定情初碧奩繡牋雅頭襪青粉彫  
殘蠶尾書韓壽香消文簟冷何郎燭盡畫樓虛相思看取鮫綃  
淚哀豔秋棠恐不如

曾約看山繫越舸顛扶小妹上危亭藤絲罥髮愁難脫蘭息吹  
香喘未停瑤草自迎翹鳳綠黛峯靜學畫蛾青此情依約誰能  
畫空吮柔毫憶翠屏



纖軀瘦極細腰輕最小相逢已解情有約看星來七夕曾同搗  
月誓三生煙籠蠟炬猶羞影風曳犀簾自作聲可奈花冠催曉  
別顛提金縷刻階行

青粉墻南是鮑家一篇香茗擅風華背人記曲拋紅豆爲我籠  
詩剪碧紗料亦有心憐宋玉只愁無分比秦嘉 因 作他時  
恨花外雷聲夢鈿車

靜夜吟

空山有客彈幽琴天風蕭蕭吹玉音悄然獨坐萬籟息不覺素  
月懸青岑綠梅花下 靜女韻以淡勝無人尋詩人愛花抱花  
卧綠雲一枕香沉沉曉來紅雪三徑深南枝幽語來青禽山空  
月落人間世寄此寥寥千古心

斷腸詞二十四首次悔盒韵

覓遍蘅皋步屣塵斷腸時節可憐身荒唐楚客招山鬼憔悴陳  
王賦洛神原草綠迷金雁冷土花紅坼玉魚新憑君莫奏哀蟬  
曲落葉西風愁煞人

短短籬門小小溪翠禽三兩隔谿啼紗籠淺碧紋都換鞦韆印殘  
紅跡已迷峽裏行雲愁曉莫溝中流水怨東西夕陽好片消魂  
地斑馬重來不忍嘶

繡幕珠簾各黯然羅裙鈿柱也成煙尋聲約略聞珊珊入夢分  
明索寓錢青草荒陵人化蝶白楊古寺鬼啼鴉麻姑去後無消  
息海水何時更作田

繞遍長廊思不禁碧欄干外月初臨怕看孤影頻吹燭尚惜餘  
香戀擁衾翠枕難留將斷夢紅爐不煖已灰心昨宵燈畔朦朧  
見鞦韆袖顰妝怨尚深

寶鴨金猊青玉鳧玲瓏榻子碧油糊春痕泥雨銷都盡倩影疑  
煙抱卻無斑竹彫殘湘血黯紅蘭愁謝楚魂孤當年發想真癡  
絕願作蟬紗護雪膚

柳慵花韞意昏昏小極還來伴酒樽指甲紅纖黏更落腕闌翠  
冷握猶溫偶然觸撥都成恨不待思量已斷魂便使玉簫逢再  
世此生哀怨總難論

金鼎誰燒蘇合香洞房閑煞紫鴛鴦纖容依約思偏杳夢語迷  
離記更忘乍捲簾時風細細斷無人處月荒荒綠苔生閣塵凝  
榭第一傷心是謝郎

典盡春衣爲買山綠雲深處葬螺鬟紅簫有幸占佳龍翠盃無  
由覓市闌曉鏡離鸞終古恨夜臺化鶴幾時還誰憐舊日青驄  
客慟哭秋原夕照間

夜來風雨幾曾停只許愁人獨自聽蠟炬燒殘猶有淚金輪咒  
斷竟無靈鴛鴦替結三生願螺墨閒鈔百悔經淒絕鬢絲禪榻  
畔一琉璃火澹于星

紅冰一枕淚痕濃翠被文鴛溼幾重粉簡那堪尋指印纖毫曾  
與點眉峯敲殘紫玉釵雙股寫牘繚綾字半封一檢遺箴一惆  
悵夜寒愁壓繡芙蓉

路隔蓬山幾萬程銀河縹緲憶吹笙浪游應尚憐交甫幽夢何  
曾覩智瓊千里稠桑誰借問一鐙方丈若爲情暮煙別後知無  
恙可肯傳書報玉京

猶記盈盈步玉塔豔情索賦縷金鞋倦妝妮我攏頰髻祆識嗔  
人問斷釵芳草詞工和淚唱香桃骨瘦共愁埋當時照影橫塘  
水寂寞秋蘭尚被涯

瑤琴塵冷十三徽羽換宮移事事非寶鏡空留鸞影在壞裙都  
化蝶灰飛卷中墨暈新題字篋裏紅銷舊嫁衣今夜月明金井  
冷珊珊刻轂可能歸

尋常小別淚難乾點點猩痕污素紈癡語卻爲今日識虛幃還  
當在時看卸頭無復燈前影呵手誰分袖底寒絕憶秋宵厭檠  
處自修黃籙禮齋壇

仙最多情佛最慈而今何計護瑤枝緣猶未了身先盡生本無  
聊死已遲碧草獨尋人去後紅鸚還說嫁來時棠梨萬點相思  
血滴入重泉總不知

畫眉窗下暗低徊零落遺香滿玉臺總帳拼教終夜守檀龕忍  
向忌辰開風淒別樹蟬初去花鎖重樓燕不來記得曉妝親點  
額至今空惜壽陽梅

閒來擁鼻對花叢和我新詩句句工唾點着衣都化碧齒痕切  
臂尚留紅明明合眼人如在忽忽回頭影已空一樹海棠親手  
植任他開落粉牆東

夢雨愁雲幾暮朝誰彈湘瑟理秦簫畫圖影在渾難識環佩魂  
歸可待招燈暈低迷金麥穗簾聲閒蕩玉葱條寶啼珠唾無人  
惜贏得香塵漬絳綃

半臂猶留淺碧綾拋殘鬢棗與妝菱同心悔鑄綢繆印繫命偏  
無宛轉繩豈有消摩能愈疾翻用社語但知解脫便飛昇十年誰  
我紅蕤夢是夢原來不可憑

漫說羅幃拂弱阿覓楚詞一聲楚些恨偏多埋憂祇願依青冢  
積淚應教化絳河却月怕拈眉史筆隔花愁聽膽孃歌芙蓉一  
夜都搖落空向秋江哭逝波

西風獨夜攬征袍秋色蒼茫上鬢毛故物猶存青玉玦新聲忍  
指紫檀槽九原誰與傳璫札千里曾煩寄錯刀記得歸時深慰  
藉披釵沽酒興偏豪

衰柳寒煙滿陌頭風光還似昔年不驚霜斷雁頰毛羽拜月姑  
狐舞鬪髀鬼火淒迷黃葉寺人家冷落白蘋洲重來一望堪腸  
斷誰勸愁人莫倚樓

虛堂寂歷似荒庵瘦鶴伶俜不可駢絕代銷魂人已去百年多  
病我何堪生涯辛苦尋巢燕心事纏綿作繭蠶錦瑟一篇原有  
託後來誰識李樊南

翠幄淒涼對夕曛更攜桂醕弔湘君香名鸚母猶能喚牒斷鴛  
鴦合共焚小草本來甘獨活孤禽何用怨離羣此身願化相思  
樹歲歲輕陰護短墳

和湘臣厲言遣懷五疊聚星堂韻

荒林秃盡無一葉浩浩長空忽飛雪馬毛蝟縮噤不聲一望平原叫奇絕聲聲畫鼓寒欲沉獵獵筋竿凍將折不知何處飛弦鳴白羽疾追雲影滅玉腕神駟氣森爽金毛胡鷹怒飛掣將軍意氣頗自豪窄袖蠻鞞擁紫纈草間狐兔憑跼笑倚雕弓意不屑少年曾獵賀蘭山萬里山川一轉瞥歸路休愁醉尉呵雄心自對吳姬說此時四望射雕場颯颯風沙戰金鐵

屢得叔固三弟書偶書長句奉答

掩關自笑出無車樽酒誰來問索居一片綠楊寒食雨數行青李故人書江淹近日才將盡賈誼憂時願總虛正欲從君共商畧吾曹出處定何如

君家潛叔游應倦萬里依人事可哀短褐猶留太行色長歌獨



上粵王臺江山信美非吾土炎海何從見此才却道文園近多  
病東風挂席已歸來

才調翩翩楊鐵峯高吟身落百蠻中料應瓊海行都徧聽說文  
章氣更雄如此壯遊纔不負近來消息可常通煩君傳語羊城  
去我亦題詩滿浙東

花燭詞

花縣春濃菊籬秋豔適叔固三弟駕綺締盟羊車入贅  
冰玉交映笙歌合歡漫賦四章聊供雙笑何以酬我請  
于閨中金縷箱求之

畫堂碧月麗瓊霄小部春燈奏綠么贏得彩鸞諸女伴齊開簾  
幙看文簫

衛玠生來玉映姿自憐吟得髻成絲今宵早有人相惜紅燭光

中乍見時

盤龍開鏡畫眉齊  
螺子輕勻染粉題  
待到榜花書淡墨  
歸舟雙影伯鸞溪

絲竹東山舊主賓  
今來重醉謝家春  
新詩寫出從君看  
莫語青綾幃裏人

東齋集卷五

武進劉亞康書

類全集卷六

詩續補

金匱鄧 渡石瞿

元日

纔把琴裝卸旋驚節序新  
關山歧路客鄉井暫時人  
親老欣猶健身閒好在貧  
庭花生意足幾日又逢春

夜坐

剝落紅泥竈欹斜白板門  
星霜磨燼簡風雪對空樽  
奇字呼兒認寒衣共婦溫  
茫茫來日事愁絕那堪論

有感示婦

夢中啼笑兩無端心事羊腸有百盤  
欲展行期頻檢曆曲將好語賺加餐  
淒風鏡閣眉紋瘦殘月簾櫳髻影寒  
別有春愁撩撥

起青衫舊淚背伊看

夜坐與閨人話別

半疊衣裳半疊書夜深檢篋意踟躕生涯末路心灰後兒女重  
衾夢熟初有語終知言不盡此行未卜事何如明宵便是金閨  
道細雨昏燈伴客居

過駕湖作

放鶴洲前春草香傾脂河中春水長最是湖名賺人意移家只  
合傍鴛鴦

學繡女兒十三四雙眉纖細髮垂肩見人一笑掩門去拋得小  
桃紅可憐

山雲如黛水風柔料峭春寒尚未收新製吳衫拼貰醉逢人先  
問月波樓

吳興旅次秦淡如都轉細業以書見招匆匆束裝賦詩志

感

落筆何曾子建親胎書爲恤孟郊貧文章直有千秋翼兩雪旋  
回四壁春豈是臺官先識面不勞御史自呈身此行且免登樓  
感去作元亭載酒人

聞都轉極賞拙詩不知從何處見也

兩生行贈張兩生參軍

溥東

一生家虞山一生住梁溪相思不相見燕吾勞汝分東西一生  
峻負奇骨作畫作詩兩殊絕無端落拓百僚底盡道此才大  
可惜一生入世百不諳但于山水窮幽探朱顏欲改素衣化時  
時照影羞江潭臨安城頭一尊酒兩生相見笑拍手酒氣淋淋  
灑牛斗天青海白雲茫茫醉叱長鯨踏波走彼落落者知何人  
大旆拂天冠切雲前車後馬紛成羣兩生相視若不見日向湖

干縱遊讌君不見蘇小墓前春草多鄂王墳上餘銅駝英雄兒  
女一坏土我輩身世當如何黑貂裘紫騮馬何不縱橫走天下  
悠悠塵海萬人中試問誰如兩生者

臣里

臣里東家子盈盈十五年春情柔化水眉意靜撩煙金齒豔佳又  
屐香鬟垂兩肩逢人頻斂笑行到曲闌前

一笑

春風偶繫曲江舟萍跡翻因一笑留見說鴛鴦方待闕可憐燕  
子苦依劉珠簾隔雨猶通夢紗帳如烟不鎖愁莫道相逢了無  
意纔拋人去又回頭

生成顏色似朝霞碧玉何時出小家靜疊羅衣薰睡鴨新翻鈿  
髻學盤雅懷中墮處應如月鏡裏看來欲誤花聞道奇章能愛

士莫教杜牧怨韶華

春日客秦都轉小九峯精舍即事八首

拋却江南勝來尋西子湖吳衫拼貰酒越女解當壚春意催紅  
藥幽眠藉綠蕪蘇隄昔游處夢影有還無

幾日蕭蕭雨庭階碧已滋去家纔百里爲客久經時臨水愁眉  
繭撩花惱鬢絲夢中歸路近宵枕莫相思

未識元亭路今牽問字車湖山開白社人物比黃初薛壁讀殘  
畫竹墳搜古書論文一樽酒相對意何如

九點煙如黛奇峯鏡裏看石支詩骨瘦池暈墨花寒幽思纏松  
蔦香情託杜蘭山厨風味好櫻筍勸加餐

文字何奇偶榛蕪手自開不矜扛鼎筆偏嗜練都才古瑟無新  
奏焦桐實棄才非公能激賞覆甌亦堪哀

都轉善古丈而  
獨賞予駢體

我愛何無忌超然筆有神風流真似舅落莫尚依人詩畫成交  
契酣嬉見性真對床風雨夕共惜客中身謂張雨生

燈火孤樓亂宵闌人奈何野禽寒抱樹山鬼靜牽蘿生計憐鸞

廡浮踪任壘窩幸逢許丁卯載酒每相過謂許梅仙司馬

水閣延涼好臨波敞畫檣綺懷託毫素茶味話樵青纖月當花  
墮疎風倚竹聽此間幽景足不用感飄萍

淡如都轉招游西湖飲於兩宜軒薄暮登孤山訪蘇小墓  
而歸得詩一章即次其西湖送春詞韻

春嵐淡淡春雲柔綠陰曉啼黃栗留沙棠之舟木蘭楫一時賓  
從何風流雙隄雨後遊人少楊柳吹花撲汀草此間春色誰占  
多前有香山後坡老今得夫子真替人卓然大雅爲扶輪世間  
萬事不肯管朝衫自換梨花春盈盈越女好眉萼窄袖當鑪勸



春酌似笑春人來已遲看梅早負孤山約酒罷隨公放醉歌臨  
流不覺朱顏醜湖山如此美風景落日欲盡將如何懷古更尋  
蘇小墓思歸待學蘭成卧一聲杜宇動鄉心回首江南渺煙樹

江船夜飲

迢迢銀箭夜如何風閃銅荷蠟淚多垂髮女兒解人意調箏先  
唱定風波

藕花紅撲木蘭舟玉膩香溫滿舵樓只我當筵心事別蕭蕭暮  
雨不勝愁

辭家幾日別懷新那有心情泥好春記得棗花簾影裏背燈垂  
淚一雙人

桐廬道中

扁舟昨夜別西子一笑來訪桐君廬高士美人倘同傳淡妝古

身命  
貌定何如

空江雨過碧潺潺岸上人家溼翠間忽與謝娘鬪眉嫵額黃一  
抹夕陽山

濛濛細雨綠蕖寒時見漁童下釣竿領畧江鄉好風味白魚紫  
筍自加餐

瀟洒篷窗絕點塵青山鬢鬢水鱗鱗五湖總負烟波約三兩白  
鷗來笑人

有感示梅鷺臣振宗

豈與鶯花作主盟聊將風月託浮生韶年春女常多怨豔體冬  
郎擅夙名搜篋青山朝換酒當簾紅燭夜調箏水天閒話神仙  
事漸見瑤光近玉清

桂席花濃蕙帳開纖雲四捲月華來偶然顧影呈雙笑如此消

魂有幾回須識微臣真好色最難佳俠亦憐才瑤情瑟怨知誰  
省寄語旁人莫浪猜

將回江南秦公子光簡出其亡弟虎侯梅花風雪圖遺卷

屬題漫書長句歸之即以誌別

春草秋復綠客子將首途主人送客置樽酒半酣示我梅花風  
雪之遺圖自言有弟痛夭折其字虎侯負奇骨誰與敵者張桐  
君虞山惠山兩突兀忽報烟塵走赤眉遂同極浦尋黃歇故園  
回首多戰爭金戈鐵馬來縱橫臨江一作楚囚泣寒潮細雨同  
吞聲桐君意不樂云將遊四明其時交暮冬極天風雪迷征程  
梅花一枝手寫贈要與驛路消離情只言別後會相見誰料驂  
鸞先後歸瑤京我本傷心人展卷倍鄭重因君悲斷雁觸我鴿  
原痛羅浮花落翠羽愁獨抱寒香不成夢

先仲氏有羅浮夢梅冊子

施夫子

叔張參軍誦君家阿宜亦等倫姚披圖墨淡一揮灑可憐不見  
愚圖中人豈惟不見圖中人之三子者亦復散處如行雲何當天  
風忽吹聚重與把酒一酌梅花魂還君此圖三歎息明日思君

萬山隔

贈秦淡如先生次黃仲則呈筇河師韻

世間相馬多以皮珠韜錦轡誇瑰奇房星夜紅光陸離縱有神  
駿知者希繫予自愧伏櫪資分爲良樂之所遺忽逢公至洗刷  
之毛骨不覺一整治始而喜躍終生疑試請倒篋陳其詞小子  
少歲常苦飢不死實賴皇天慈窮愁所結寄以詩浣花一老真  
吾師古音獨奏無人知夔襄子野曷敢期讀公文章契我私直  
欲奉以爲矩規獨憐蓬華猶棲蓬茫茫白雲神與馳龍門不見  
空嗟咨年時聊浪湖之湄素衣著塵俱化緇勞勞苦爲世網羈

鶴骨瘦立將難支忽承公命趨軒墀意氣傾倒無分歧卓然詞  
翰藻采披古錦眩目情爲移更復說士甘於飴使我感激垂涕  
洩九峯草堂羅酒卮池花半落柳倒垂與公酬和兼邀嬉公也  
許賞撚吟髭如鏡鑑貌分妍媸維時寒景沉西崦忽揭沈悶爲  
雍熙竭來湛露傾三危從公幢節分所宜望公風教力主持我  
雖飄零學業墮或能佐公一措施民安俗茂四境夷車前拜倒  
竹馬兒爲政卓絕沙劃錐口碑一路傳頌辭况公夙抱青霞思  
擔簦應許相追隨手招白鳳騎蒼麋共入洞天采紫芝丹崖翠  
谷窮嶮巖題名石壁書淋漓從而後者非我誰公意不然顧曰  
嘻汝且文史精參稽一言告汝不汝欺瑤林自有棲鸞枝我聞  
此語聊解頤私幸才力猶能爲燈青劍白雙髻絲別公去矣來  
何時

秦都轉餞余於師竹堂并賦詩贈行奉酬一律

畫燭當筵暈不消  
匆匆驪唱又今宵  
踏槐我已經三度  
垂柳公猶憶六朝  
囊缺權辭姑篋路  
峭帆待看廣陵湖  
此行未必青衫換  
漫擬重來識孝標

附原作

之子文思湧若泉  
豈徒書記詡翩翩  
休爲王粲登樓賦  
正及仲華拜袞年  
此去好探丹桂窟  
何時同泛白門船  
青溪柳色秦淮月  
可似風光卅載前

七夕衢河錄別

盈盈一水悄然秋  
瓜果芳筵爛漫收  
最賞心時偏易過  
曾消魂處竟難留  
怕看短翼分勞燕  
漸見明灣隔女牛  
燭燼宵闌風露緊  
人間天上一齊愁

龍邱夜泊示友

新涼一枕夢初回何處西風玉笛哀我輩飄零成習慣又從此  
地聽歌來

蘭江道中

螺峯隔煙好淡如娥眉修山青水空綠蕩此沙棠舟尋芳涉錦  
渚拾翠臨蘭洲登舳一延佇頓消羈旅愁歌聲澌水月歸思吳  
雲秋桐君遠相待去矣勿久留

阻風遣悶

日坐篷窗聽水聲西風無賴滯郵程石尤作事真顛倒翻阻歸  
人不放行

西陵遙望暮雲遮獵獵商飈拂袖斜恨煞蒲帆難著力滯人夫  
壻在天涯

由嚴州至桐廬道中

纔過衢州又婺州茫茫雲物入高秋羣峯環作青綾障曲水皺  
如碧玉流待著羊裘樓釣澤聊從鷗渚繫歸舟天涯嘗盡征人  
苦如此烟波且小留

九月二十二爲郡母壽

酌君酒登君堂左鼓瑟右執簧但見堂中壽母綠瞳明明素髮  
長長錦筵高坐樂未央問母何所樂樂其有子才軒昂十五習  
詩書二十能文章三十遂從軍短衣長劍參戎行紫騮飄忽去  
萬里壯志所在安能量袖中要有治國手何必陳書挾策蓬萊  
鄉今春守湖州五馬何煌煌下車未三月合郡稱循良壽母顧  
而喜頗謂此子臧慨然憶當年家乏隔宿糧小樓風雨機聲添  
篝燈夜讀淡春光兒方讀母縫裳豈知今日得如此軒眉一笑



神洋洋梁溪溪頭碧水香東林西塞橫青蒼仙官入山去手携  
采藥筐金芝瑤草綠可拾持以奉母壽且康我亦有老親額髻  
蕭颯如秋霜願從仙官遊乞此仙藥嘗君試爲我挽回六龍轡  
我亦爲君滿進流霞觴坐使吾親爾親皆壽昌

登七里瀧用康樂韻

江山入秋清雲物展遐眺兩流石氣青風激灘形峭子陵棲隱  
處巖谷尚光耀渚野情山禽伴孤嘯數峯向人綠顏髻月  
娟妙嗟我塵中奚免北山誚將携青竹竿來從碧溪釣一笑  
白鷗前千秋倘同調

小詩奉贈湘文先生兼寄淡公杭州

牽舟又向十洲行喜見循良領四明久識文章高北海更傳經  
術掩西京災黎四野方多難絕塞頻年未罷兵麟閣燕然他日

事願君努力致昇平

病馬當秋氣不驕近憐伯樂亦無聊

謂秦漢如先生

飄零海國看雙鬢

蕭瑟江山話六朝此去養親求菽水行將遁世學漁樵茫茫身  
事君休問風雨歸裝賸酒歌

湘主人年方強仕而自稱老夫且作詩引六一翁爲例因

戲作俳體酬之解嘲之言勿以爲笑

昔者歐永叔四十稱醉翁詩中屢見之意氣頗自雄後來相沿  
若成例詩人狡詭無不同至今翁之稱且復加兒童世風浮誕  
實可笑意存狎玩口則恭禮云親在不言老七十稱老理始通  
君方強仕年氣盛才亦豐胡爲稱老夫自矜永叔之遺風知君  
作意弄狡獪故飾壯健爲龍鍾君曰數年來頗苦雙耳充有如  
木棉塞五藥不可攻稱老固亦宜况復面皺非春容我謂天公

特相悉恐君精氣用易窮自來聰明世所忌故特遣此丸泥封  
坐今讒人失其柄譁張百出皆無功茫茫萬事付一瞶可葆元  
氣游鴻蒙年來我亦同此病若拒萬籟來聽宮雖然曠曠計亦  
得亦免入耳驚秋風勸君從今勿言老試塞兩耳養太冲他時  
耄歲加矍鑠幽田當復還其聰耳神名此時莫乞杜公酒君不  
見人間卿相多癡聾古詩不忌重韻用亭林說

### 感事

南天銅柱鬱嵯峨萬里征夫尚荷戈自有金縢安社稷本無鐵  
牡鎮關河一軍空復勞彭越片語何人下趙佗見說盈廷公輔  
意盟書已許邳支和

### 東湘文先生

少文早得卧游趣何意陸沉黃綬間漆室常憂天下事緇塵漸

老舊時顏風煙絕塞頻傳檄鼓角嚴城早掩闕向晚不堪同極  
目南征諸將幾時還

誰道

去年家乏卓錫地誰道今年錫也無萬事蒼茫催老至一身憔悴尚饑驅科名那許容風漢天地何心著腐儒幸是主人情鄭重免教雙淚灑窮途

漫興一首

東頭借屋掩雙扉時爲春寒惜典衣青鬢幾時年少去碧山回首舊游稀尊前月色愁添暈海上濤聲夜合圍烽火南天正多事勞人何處息塵鞿

子戴賢弟有詩見貽詞藻斐然爲之狂喜九疊前韻答之

兼呈尊甫湘文先生

封胡羯末盡英奇兄弟文章此一時家有肩吾難作嗣座無尼  
父偶爲師乾坤何處容雙髻身世無聊且一卮莫費黃金圖賈  
島近來老瘦只能詩

湘公試院賦詩疊韻至六七頃又以奇兵搦戰勉整偏師  
以當大敵

鐵厓樂府擅新奇早歲詞華已絕時

近讀大集新樂府數篇最工足與老鐵抗手公少作

也桃李盈庭半佳士

時方枝士梅花一字亦吾師

凍爲公題鏡鮑瓦壽圖公爲酌定一

言畫簾風靜聞絃柱小閣春寒戀酒卮乍喜相逢許丁卯夜深

剪燭共譚詩

謂靜山

### 十一疊韻奉酬湘文先生

先生文字雄且奇一麾更喜逢明時關西名重楊夫子海內風  
高柳士師真覺輸君才八斗應須醉我酒千卮試看絲竹東山

會兒女深閨盡解詩

十二疊韻答子容昆弟兼示夔臣

私喜太玄諸弟子翩翩才調冠當時  
鯤鵬搏擊三千里貔虎縱橫十萬師  
訪道閒將琴作贊問奇各有酒盈卮  
更聞謝蘊鏡才思絮雪庭前解詠詩

題宗太夫人眉窗詩意圖用湘文先生韻

彎彎月子柳稍頭但照眉痕不照愁  
見說臨池師衛鏢未妨玩婦學高柔  
閒情偶結鴛鴦社豔夢同尋鸚鵡樓  
自是鷗波新眷屬十年詩思落湖州

秋雨難一首

入秋一雨不肯止子桑病矣將奈何  
黃蒿離離長屋角門前三日無人過  
頽墻破窰蛙黽滿深山大澤龍蛇多  
起來獨立看天

色憂時有淚同滂沱

小詩郵示子容子戴兩弟

揚雄老去耽寂寞閉戶草玄人笑之子雲後世縱復有快意何  
不生同時山中紫芝空自好海上朱絃誰更知窮來一字不堪  
煮問奇應愧菜芭師

乃翁落筆若天馬更喜二子才權奇文章一家有述作父子卓  
立三峨峒俗流久已厭韓愈諸郎獨解尊素滋臯比南面忽大  
笑衆星落落玄雲垂

題慧公房

粥鼓齋魚各悄然旋房曲室認便娟蒲團才悟維摩旨花氣熏  
人又破禪

寂寂雲堂散講經花陰澹白藥煙青流泉繞砌梵音動獨向青

山影裏聽

日暮山光滿竹林禪房青翠杳森沉  
詩情只在雲深處分付孤猿自在吟

天童山行

料峭東風欲暮天沉沉山氣碧如煙  
白雲過盡數峯斷卻放夕陽黃到田

雲深不辨路三义一抹青旂指酒家  
日暮無人問春色野塔開遍小桃花

湘文先生五十生長繪鏡勳瓦壽圖并爲長詞以自壽海內和者數百人幾於無美不備濂於暇日剏爲此篇雖愧穆如之風尚合比興之旨附之卷末以代壽人之歌寶鏡誰所製乃是百鍊成團團明月光中有萬象呈幽森夔魅



走閃爍蛟龍驚秋水濯芙蓉那許纖塵生千秋有冰鑑百物無  
遁情以喻君子德金精而玉英昭質常不虧方寸涵空明願君  
蓄光彩一照四海清

黃金爲君室白玉爲君堂如我何足珍亦登君子旁感君日摩  
娑使我生輝光朝霞麗金爵曉露霏駕鸞君看砥硤資曾經幾  
滄桑樵牧不能識賈駟不能藏一旦入君手俾君壽且臧紫宮  
起無極丹殿開未央他日貢天子爲君發光芒

絳霄懸日月寰海如鏡清與君擊瓦缶歡笑誦太平銅雀吹古  
芬迴鸞挂清景兩美倏合并時時寶光炯空谷有靜女顏色無  
人知願君作明鏡照我婉孌姿仙人有幽居雕甍燦華楹我願  
身作瓦年年蔽君屋嘉名錫仁壽古字傳延年爲君呈上瑞几  
席相周旋寶鏡常不缺寶瓦常不裂斲君壽千齡瀟灑同日月

寄題湘丈先生虞山別墅

園林幽靚別繁華  
解組歸來樂事賒  
休問揚州舊書記  
鬢絲憔悴尚天涯

虞山行訪宗湘丈太守作

昔者訪君游四明  
青山窈窕來相迎  
主人與山俱有情  
今來訪君尚湖宅  
亦有青山解迎客  
猿鶴看人若相識  
主人一笑來拍肩  
昔猶仕宦今林泉  
一邱一壑相周旋  
萬梅花中結詩屋  
花前兒女皆如玉  
况有圖書三萬軸  
登樓四望煙巒開  
美人淡掃青蛾眉  
煙鬟霧袖相徘徊  
美人招我入山去  
惜我飄零在歧路  
安得從君結廬住  
明發仍游越水濱  
青山依然誰主人  
相思愁煞山中雲

長句奉懷湘丈先生

素釋言歸不肯遲十年心事白雲知文章獨擅龍岡表歌頌猶  
留石相祠苔綠謝堂人去後月明空館酒闌時那堪重認題詩  
壁祇有蛛塵惹鬢絲

見說虞山秋更好林居幽興近何如佳兒况有王文度達士爭  
傳謝幼與憂國常時聞抗議退閒結習尚耽書當年五馬明州  
道可似而今薄笨車

嚴霜夜館罷高歌自歎黃門髮已皤身賤猶爲知己重數奇翻  
悔受恩多悠悠勲業看長劍落落生涯乞短策寄語故人莫相  
憶著書舊約亦蹉跎



蘇軾集卷七

文

金匱鄧 濂石瞿

虹橋老屋詩集序

虹橋老屋詩集三卷附病榻吟一卷吾師無錫秦澹如先生著  
嗚呼成連已去空留海上之琴向秀重來忍聽山陽之笛何日  
月之燦忽已風流之邈然餘懽莫尋墨淡俱涸皋蘭搖落難招  
正則之魂柯竹沉薶未絕中郎之賞傷心蜀州之作擁鼻洛下  
之吟對此叢殘能無潛結蓋濂年始逾冠即邀賞音識臨汝於  
租船進樊川於幕府列七子之會韻繼南皮學八家之文義同  
北面自依扶風之帳不翅溫雪之交士感知已懷此何極而况  
平原親懿大半淪亡元伯故人亦先彫謝問東山之軼事誰復

能詳訪北海之遺書竟知何日然則名山之託後死之責予小子固有不敵辭者乎方先生之官杭州也以淮海雋裔爲風騷主盟李元禮之名聲庾子躬之公府髯參短簿亦與言詩瘦可懶權時來讀畫歎侶既集勝襟益遐琴觴迭陳巾轄頻出攬三竺之勝笠屐疑仙踏六橋之春煙波俱笑品泉龍井之寺酌酒馬塍之花歌傳鬧紅齋靜搖碧固已極蓮社之嘉會繼蘭亭之雅遊既而綰符三衢宣力六察挈閱道之鶴囊琴而來見初平之羊具笏而拜攜賓載酒弭節明月之樓鑿險尋碑題名垂雲之洞煙蘿媚其宦跡樵牧話其清名山川益奇歎咏彌愜雖謝尚之在牛渚羊欣之在新安不是過也然而升沈之際仕宦所難堪鄉土之懷達人所不免是以臬明傲吏不忘三徑之思元子可兒致慨五湖之長况復逢時多舛入世寡諧徒博譽而好

修忍委美而從俗孫楚長揖乃積忤於老兵顏延直言竟不容  
於當世岸幘長嘯拂衣遂行蓋自三衢之歸先生乃不復再出  
矣惟是庾信之賦獨無小園史雲之家祇有塵釜郗參軍之難  
得于襄陽之不逢虛懷杜曲之田誰補檀橋之屋致使白頭賣  
字老作寄公絳幄談經紆尊都講療飢而餐橡栗忍淚而遣楊  
枝憂豈能埋貧乃為病吁何困也逮至泊宅鵝湖寢疴鴻廡入  
門過訪則惟有子與謂華遠秋丈擁髻悲曉則最憐通德然且停雲  
慕友落月懷人聽候蟲而感時拾木葉而題怨低徊病榻料理  
齋練越吟自哀湘竹俱裂此則吳蠶欲化始惜殘絲蜀魄將亡  
尚餘豔血而先生之詩亦遂止於此矣烏呼芳草猶碧而美人  
已遙夕陽尚紅而山鬼來弔發揚子雲之篋玄文未傳披桓君  
山之書琴道誰續茫茫歌哭詎冥漠之能聞落落簡編恐精魂

之尚戀爰舉遺什授諸木工亦刳後之星灰棄餘之斷錦耳然而謝傳出處之間翟公威衰之事杜老憂時之概賈生太息之情證厥篇章猶堪彷彿讀是集者亦可以知先生之爲人矣自維淪落慙負生平每憶彥和知音之言彌深廣陵絕軫之痛上韓吏部之狀尚有愧于李翱序王文憲之集竊自比於任昉云爾

### 冷紅館詩稿序

予年十五六時即與先生仲子姚臣交時姚臣方以能詩聲相與酬和甚樂其後姚臣諸弟皆來交予而其季湘臣遇我尤厚湘臣每爲予言先生於並世人鮮所許可獨見予詩而愛之既見先生則所以矜許之者皆如湘臣言及與商榷古今詩教威衰與術業高下十常八九合者然其時予方衣食於奔走與



先生不數見即其詩亦未暇請觀也既而從吾師澹如都轉游師先生之季父也益為予言先生少即精敏於當世之務靡所不究悉尤喜校讐金石文字訂譌正偽銖寸差失皆辨之而於詩治之益深能卓然具唐宋諸家之體予雖未見先生詩然知吾師之言不虛也壬午之歲予方家居而吾師亦解組歸里於是先生為主人棹酒船至龍山下訪寄暢園品泉於惠山寺歸而張飲於小金山時當秋暮山川蕭條草木黃落酒行以往相對悲歌予顧謂先生此樂當令常繼先生以為然乃未幾吾師即謝世子復羈窮顛賴託跡江湖蓋距今才三年而回念舊游已恍如隔世事獨先生尚優游桑梓於以俯仰今昔覽時事之變與人生之難久長則其詩又焉得而不工也今年春予客四明先生郵示其平生所為詩凡若干卷俾予論之且命為序鳴

身全集  
呼自予游先生父子之間忽忽已十五六年日月逾邁志業蹉跎而先生獨不鄙不文以此卷鄭重相屬其意有足愧者然則於先生之詩又安得無一言綴於末也故備述今昔往來離合之跡以復於先生且誌知己之感至先生之詩之工則吾師之言盡之非余所敢定矣

霜傑齋詩序

夫夔龍發聲斯笙匏過其響鸞鳳耀采斯綺繡失其華吐詞作日月之芒擣藻奪山川之秀良由秉質醇粹負才經奇落想青霞之間超神黃頰之表故能撐霆裂月接高唱於夔牙擺電奔雷飛雄光於翰府也然自風雅淪亡溺音騰沸或錦瑟湘波深詞以晦意或星心月脅幽奧以見奇粉黛飾壯士之容兒女少風雲之氣猶之白紵青吳非不諧婉與之聆鈞韶之奏則纖矣

碧桃紅藥非不織穠與之擷蘅杜之芳則俗矣手非天馬豈許  
籥雲氣讓蛟龍何能風雨苟不琴箏乎六際斷難黼藻乎八能  
秦君姚臣淵騫其姿雄秀其骨手鑿萬象氣吞九流星文雲籥  
窮搜宛委之書紫度赤斑盡發翰寥之秘胸積丹篆掌盈黑書  
凡汲冢遺編雲華斷簡青玉白銀之字龍威雞次之奇擷取精  
華咸歸鑪冶故其所作搏壯采於萬彙縱奇思於八溟勢海立  
而雲垂體蚪盤而鳳走落落清款作三山鸞鶴之聲晔晔麗暉  
壯六代江山之色身如游於陳芳國裏句可書於天帝扇頭誠  
李杜之嗣音韓蘇之後勁也然而王粲少年早經離亂休文身  
世長此棲遲朔風厲而鐵馬嘶殘雨哀而銅駝泣千家星散萬  
竈煙寒拾杜陵之橡祇益窮愁吹越石之笳空懷壯志時復江  
鶯辭樹沙雁橫秋夢故國之風花感荒郊之禾黍羈旅之情長

歡娛之旨短蕭瑟之音多藻麗之詞少也猶復殫精緬素頤志  
典墳闡藝苑之名言奮經生之絕業發揚霄翰鵠顧鸞迴揮灑  
丹毫煙霏霧結方將校書天祿訪道璇華鵬鳥搏雲振九萬里  
之翼鯤魚跋浪縱四大洲之鱗而乃奇律不采煇黃莫卜珠沉  
川而匿耀玉在匱而不光素衣瑟瑟惹京國之緇塵青鬢蕭蕭  
染秣陵之秋色撫劍不樂囊琴遠游嘯月三垂之岡躡雲九折  
之坂太行夜卧枕底峯孤獲鹿曉行馬頭雲擁爲之訪開遠之  
府弔臨汾之宮置酒郭景純堂譚兵淮陰侯嶺劍氣拂拂悲風  
東來笳聲淒淒殘照西下遂拓金戟發懷古之吟復調銅絃譜  
思歸之曲遂使闕前楊柳脉脉生愁笛裏關山聲聲入破矣且  
姚臣以班揚之才兼游夏之學升嶽浮海醉心六經研京鍊都  
罕視千古李陽冰是真筆虎董仲綏無愧儒臯凡所撰著若古

文辭皆輝麗萬有獨榮心靈者又豈止入詩王之國康水呈奇  
登騷雅之壇雕雲炳色而已哉僕與姚臣纔訂苔岑得觀瓊什  
以賈生之年少驚叔寶之神清時時佩君金錯之刀往往貽我  
瑤華之字今者秋風牽手慨乎將行依依南浦之船黯黯西牕  
之燭夢期識路同沈約之愁深意願為雲感昌黎之情重酒闌  
人散別思如潮木落山空秋聲如雨安得淪日鑄之茗攜雷威  
之琴結我芒屨共攬六橋之勝從君石室同商萬古之名此又  
序其詩而怳怳不能自己者也

### 丁氏家譜序

古者小史莫繫世辨昭穆譜牒之掌厥有專官

周禮春官宗伯小史掌邦國之

志莫繫世辨昭穆莫音定

速史遷著書自為序傳

漢司馬遷著史記內家世有列傳自序七十卷

術業罔不備書家譜之作其倣落也

爾雅釋詁倣落始也疏初始之異名也此段言譜牒

掌于春官迨漢以魏晉以降門望益崇學士文人各有著錄時

後始作自民間隋志王朗王則有若王肅家傳肅家傳一卷虞覽家記隋志虞氏家記五卷虞覽撰范汪

世傳隋志范氏家傳一卷范汪撰明彙世錄隋志明氏世錄六卷咸萌抵經

傳萌芽也抵根也經傳指聖賢所著書而言斧藻訓典斧藻修飾也揚子法言吾未

者也左傳告之訓典謂先王之書也鄧文茂記鄧亦作豐盛也昭往焯來昭光明也焯至

于韋鼎唐志韋鼎撰韋氏譜十卷徐商唐志徐商撰徐氏譜一卷陸景獻之倫陸景獻撰陸氏宗系

譜一且以纂脩姓名芬耀圖史譜錄之重自昔然矣此段言魏晉以後家

重譜益吾鄉句吳故封史記吳太伯世家太伯之奔荆蠻禮讓成

俗新門舊望隔代輝映唐書高氏廉傳責天下譜牒參攷史傳

戚退新門進舊望右膏梁左寒畯合二百名節風教為世顧矚

九十三姓千五百六十一家號曰氏族志舊唐書袁朗傳門第須歷代慨夫時更板蕩板蕩譏亂世也詩

人賢名節風教為衣冠顧矚皆言厲王之無道也唐書郊生戎馬老子曰天下無道戎馬生

疾風知勁草板蕩識誠臣於郊爾雅邑外謂之郊戎

馬猶言 文獻淪絕 文獻論語朱注文 縑帛散落 縑重絹而其色微黃者帛今謂

之綱絲織之總名古人鈔書 皆用縑帛此指書籍而言 家乏先賢之狀 隋志有海內先賢傳先賢集兗州先

賢傳徐州先賢傳交州先賢傳魯國先賢傳楚國先賢傳贊汝南先賢傳濟北先賢傳會稽先賢傳吳先賢傳零陵先賢傳等

裴松之三國志注引 士無舊德之傳 舊德先代之德澤也易食

名氏又見言劉 姬酉祁已莫詳其宗派 國語黃帝之子二十五

者必彭城注 祁已滕蒧任荀農商工仕多失其世業 尹文子全治而無闕者

傳姑僕依是也 易其業 有志之士盡然傷之 多舊族自經粵匪之亂則先人

掌故大都燼於兵 丁君雲軒少席華胄 席資也因也華胄謂顯

免 早標民譽秉張融之門律 南史列傳二十二張融有孝義忌

四十一卷張融傳張氏知名前 法陸煦之家史 舊唐志陸煦撰

有數演鏡暢後有充融卷稷 為丁氏家譜若干卷編次既竣 竣事畢也國語屬引其端

物之子惟宗濬既廢 古人分別嫡庶統系之制謂之宗 世風益

瀉瀉音綠 近士大夫厥有數蔽抗才金碧之上劉孝綽侍宴詩

行命爭妍紺素之末紺素謂書卷也古人寫本多用練素其染

愛玩發雌霓之妙解梁書王筠傳筠製郊居賦要筠示其草讀

無已霓霓霓霓霓之說五激反雲霓挺碧雞之雄辨碧雞神名又山

之霓五雞反喜筠讀音不誤也往祀歸而作碧雞頌文送劉

縣西南山有神祠漢宣帝使王褒往祀歸而作碧雞頌文送劉

孝標廣絕交論縱碧雞之雄辨注引馮衍與鄧禹書曰衍以為

寫神翰意則明城之說亦自謂逸才豐毓逸材謂起出眾人之

若此以來未有逸才彈見洽聞謂見聞之淹博也班固遠與湖尋

姓所由始受氏所自來尋即得之古字姓生也古者因生以賜

氏族也上古建國則有姓其支系別之為氏以次則曰孟孫仲

孫叔孫季孫之類或有以官以邑以王之諡與字為之故惟

貴族有氏平民則無左傳墜民亡氏言削奪爵邑而為平民也後世但有姓無氏氏不復分而姓亦謂之氏矣則瞳

目直視瞳音撐結舌莫對結舌謂不發言也漢書祖禰不別始祖

廟也周禮左祖右社父廟曰探三古謂上古中古

禰生稱父死稱考入廟稱禰探三古謂上古中古

歷



三古伏羲時為上古周文王時為中古孔子時為下古歸藏古

易名黃帝作周禮大卜掌三易之法一曰連山二曰歸藏三曰

周易一說殷易歸藏以坤為首象萬物之莫不歸藏於地

支派不明齊書是以具書其支派

談八瀛之遼闊宋書樂志澤初縱有林寶纂姓之博林寶唐濟

和姓纂九有化浮八瀛詎免籍氏數典之譏左傳昭公十五年數典而忘其祖

也言雖有譜牒而荒渺無攷者其蔽一也又此言雖有譜牒而荒渺無攷者祭祭門子文選

補亡詩祭祭門子如磨如錯毛詩曰祭祭衣服傳曰祭祭鮮咸

貌送注引周禮曰正室謂之門子鄭玄曰正室猶子將代父當

者祁祁措紳古之仕者垂紳措笏故稱宦族曰措紳文選潘岳

也豔蔡邕之製碑後漢書郭泰卒同志共刻石立碑蔡邕為文

郭有道無喜韓愈之諛墓唐書韓愈傳劉義者聞愈接天下圭

愧色耳愈金數斤去曰此諛墓中人得直欲乞彼鴻藻鴻藻言博大之

耳不若與劉君為壽愈不能止史記有玉牒書也乃至迷祖惠之頌即

世廟正雅樂揚光我滕牒滕緘也牒譜也乃至迷祖惠之頌即

德宗文選謝靈運有述祖德詩半出讐言讐言言不信也左傳哀上史歲之書

車

卷七

文

七

藏藏書之室也明大內都非寶錄漢書逸有良史之材其文直

有皇史藏財寶錄祕典其事核不虛美不隱惡故為

之寶錄私人紀先世之事亦曰寶錄如唐豈曰追遠乃邢昺述

李習之皇祖寶錄則記其先祖之事也

躬之賦魏書列傳七十三北史列傳三十一邢昺字子明太昌

官乃為迷躬賦初除中書侍郎加平東將軍光祿大夫時言冒竊官級

夫競尚清談世其蔽二也此段言富貴之家請人作永叔家穎

稱正始之風西陽修字永叔廬陵人終老穎之仲卿籍舒繫情

植表於瀧岡歐陽修字永叔廬陵人終老穎之仲卿籍舒繫情

於桐邑漢朱邑字仲卿舒人病時屬其子曰必求諸曩哲間亦

有之今則墨綬初綰綰綰綰也孔稚珪北山移文至其經金章

章墨綬秩銅符乍握銅符乃銅虎符之省史記初與郡國中相

五國家當發兵遣使者至郡合便已委故壠於狐兔委棄置也

符符合乃應受之握握持也便已委故壠於狐兔委棄置也

寒盟言於蟻鶴寒盟言謂背其盟言也孔稚珪

人去兮曉猿范蠡去越擁高資而不歸范蠡越人後浮海入齊

數十張祿入秦戀名位而不去范睢逃入秦乃易姓氏竟忘毛

裏之戀毛裏言人子之於父母也詩不屬於何有首邱之思

古人有言曰狐死正邱首仁也其蔽三也此一段言入籍他省古亦有之惟今希

榮而慕勢豔貴而醜賤自視高於穹蓋穹蓋天也言其形穹隆如蓋名心灼

於炎旭炎旭謂夏日熱氣威也羊豕遠跡諱言其祖宗漢書公孫弘卜式

之翼因於燕爵遠迹羊豕之貂蟬炫華誇耀其親懿漢書楚元

一姓乘朱輪華轂者二十三人南阮北阮以貧富為戚疏晉阮

籍居道南諸阮居道北北阮富南阮貧東裴西裴以聲華為誼

寂五代史裴曉傳裴氏居燕者號東眷是以高遵賤出必受侮

於宗鄉魏書八十九卷列傳七十七高遵字世禮渤海人父

喪杜甫窮愁將見遺於家牒馬永輝真子杜氏凡五房一京

四涇水杜氏五濮陽杜氏而杜甫一派不在五其蔽四也此段

賤則可通諸貧 况夫滄桑迭更神仙傳麻姑云接待以來已見東海三為桑田儲光義詩滄海

成桑田世人以喻 金石俱毀金石謂鐘鼎之屬石謂碑碣之屬古人於日用器物大抵鐫勒文

字又頌功紀事寓戒亦皆銘諸金石東漢而後則墓碑威行梁元帝集錄碑刻為碑英百二十卷是為金石文字著錄之始顧

其書不傳宋歐陽修趙明誠輩始事搜採著錄迄清代而大成金石之學遂為專家以其能識文字之源流訂經史之訛闕所

裨於學也悠悠世祚攷按無從遂使言劉者必彭城唐書高士廉傳唐至中葉

風教又薄譜錄都廢公靡常產之拘士七舊德之傳言李悉出隴西言劉悉出彭城悠悠世祚訛無考按冠冕早隸混為一區

可太言杜者必京兆魏書杜銓傳世祖謂崔浩曰京兆為天下 黃犢之

產或乞姓為章張鷟朝野僉記隋開皇中京兆章袞有奴曰桃符每征討將行有膽力袞至左衛中郎以桃符

久從驅使乃放從良桃符家有黃犢宰而獻之因問袞乞姓袞曰止從我姓為章氏符叩頭曰不敢與郎君同姓袞曰汝但從

之此有深意故至青窠之生或沿訛成馬莊子至樂久竹生青窠青窠生程程生馬

託梁公之齋遂竊告身宋史狄業傳卒有狄國賓者仁傑之後分仁傑告身與業業秦錄國賓一官而

自稱仁傑十四世孫 過郭令之墳特陳籩豆郭崇韜唐莊宗朝為樞密使自以為

子儀之後其伐蜀也何增高價徒玷名宗玷辱也盧亘文久玷中書名宗即名門有

過其墓號慟而去若欲挽其頽風必先昭其真派此即丁氏之譜所由

稱於時之若欲挽其頽風必先昭其真派此即丁氏之譜所由

望族也若欲挽其頽風必先昭其真派此即丁氏之譜所由

作歟此段言喪亂之後譜系大都偽僕伏處里閭唐書高霞寓

傳其先五代不久荒簡畢謂之簡札畢簡也古未有紙載文於簡

異居孝聞里閭謂之簡札畢簡也古未有紙載文於簡

佔畢今亦謂手札既無承天譜系之學唐志何承天又非倉曹

日手畢荒古荒字既無承天譜系之學唐志何承天又非倉曹

人物之志唐書李守素署天策府倉曹參軍通姓氏學世號肉

南白昔任彥昇能通經時稱五茲因雲軒之屬適觸所感遂放

經笥今以倉曹為人物志可乎茲因雲軒之屬適觸所感遂放

卮言莊子卮言日出注酒器滿則傾兼綴大凡書諸首簡定文

之誼雖愧於陳思曹子建與楊德祖善昔丁敬禮常作小文使

禮謂僕卿何所疑難丈之佳惡吾自得之求米之風差殊於承

後世誰相知定吾丈者耶案陳思即子建求米之風差殊於承

陳壽字承祚此段送用

丁姓典故以作錄語

卷七 文 九

此序作於光緒甲午是時福保二十一歲喜其詳贍典雅乃不揣搢昧而爲之注存之篋衍已三十餘年矣今歲將此注刊入譜內以便後之讀此序者民國十四年五月二號丁福

保識

集中駢文本無註此稿由仲祐送來以其詳贍仍之校者註

### 憶雲詞序

蓋聞雍門揮弦孟嘗君爲之掩泣桓伊撫箏謝太傅因而殞淚有觸斯發殆有不能自己者乎予自悼傷以來每讀昔人哀怨之詞則萬感之交集也今秋杭州許邁孫先生重梓其鄉人憶雲生所爲詞四卷而命余序之予觀其字必色飛語必魂絕雖皆緣情綺靡之作感遇怨悱之旨而使人鏘鏘洋洋悽然以思黯然而悲凡吾身之所直目之所接纏綿悱惻煩冤鬱積低回而不能自言者皆若於是編具焉楚之騷耶庾之賦耶抑漆室

之嘯而韓娥之歌耶雖然予聞之邁孫憶雲生家世王謝富埒  
陶衛則夫吳簫乞食之辱皋廡賃舂之勞固知免矣然而奇律  
莫采逸少終蹶茵溷飄泊關河棲屑洗馬渡江之歎琅邪登山  
之慟故以仰追往古俯感來祀况乎非介推之隱而竟罹焚山  
之災異湘纍之放而幾有懷沙之厄積恨銷骨古愁塞胸越吟  
自哀湘血彌豔其志其遇蓋可悲也嗟乎不爲無益之事何以  
遣有涯之生自序中語此其詞之所由傳歟且夫瓠梁託弦以流音  
思同調也山中聞樂而屑涕感曼聲也僕本恨人矧當瑟居水  
仙不來孤唱誰和山鬼獨對景忽絕目送浮雲心傷逝川寄  
愁何處埋憂無地撫斯卷也詎能不懷東山而斷腸望西麓而  
獻弔者哉若夫以代興之才而爲起廢之舉篤曠世之誼而抱  
絕軫之痛補白石之小傳訂碧山之遺音如吾邁孫者尤近代

所罕觀矣憶雲生安在乎吾將具杯酒以告之

菊隱山莊遺詩序

菊隱山莊遺詩一卷桐城吳大夫著大夫諱寶三字康之少應  
京兆試屢不第既老始由謄錄議叙得官爲山東知縣年若干  
卒桐城氣節文學冠於江南自方姚以來瑰儒秀彥颺起霞蔚  
清風盛藻豔古焯今大夫生長名勝抗希曩哲博綜流畧茹吐  
騷雅逸才豐藝有聞於時洎乎筮仕益著芬譽而標心託志全  
等塵外彭澤爲空流絃歌之聲幼與在官擅邱壑之韻其時同  
官山左有北平錢笠湖烏程施均甫山陰陳晝卿咸與解帶周  
旋倚輪講肄僉謂大夫清醇簡惠顧建康劉 肅之比矣而菊  
隱山莊者在龍眠浮渡之間大夫罷官後所卜築也方將畢景  
林岫頭情澗阿而逝暉不留芳草俄歇五嶽之約竟奪於龍蛇



九原之魂空招於鵲鶴嗚呼士不得志陸沉於俗一朝電謝終古煙暝雖使故交徘徊訪孟六之遺草當代鄭重求孔融之佚文而黃壤幽翳已無知聞青編寂寥何益冥漠可悲也已大夫既歿無子遺稿盈尺半委食蟬賢女紫英哀慕永思恐遂零落乃與其婿康泉惠卿摺摭殘逸錄爲一編陳留典籍特繕於文姬吏部文章幸傳於李漢子因惠卿之請爰擇其尤正者存若干篇并述大凡列諸簡首庶久而不泯垂芳將來

清足居集序

余與諸氏姊別十餘年矣戊子春姊婿璞齋移家來吳始見姊於姑胥寓屋別後顏色各揣瘦肥樽前笑言猶含歎邑尋兒時之雪絮感剗外之風華既成新篇兼眊舊製余觀其哀怨之旨擷芳於杜蘅悽清之音激亮於琴筑黯然未忍卒讀也若夫追煙

霜於昔游愴風雨於今夕離合之跡可得而言姊生而淵令長  
尤惠邁絳帷侍讀早受博經紫石鐫杉便傳慧業故兩大人俱  
鍾愛之當其時孝威孝綽盡號能文若憲若荀尚皆無恙每至  
鶯初雁晚葉早花新篁匏迭賡脂騰俱雅紅閨結社傲竹林之  
游彤管爭妍冠花萼之集余齒尚稚見而慕焉間亦學姊簪花  
從兄乞草習詩朱鳥窗下問字青綾幃中所謂清足居者余隨  
姊讀書室也瘦石支几幽箔上階擁書城高束管岫列新翠浮  
硯豔於騰羸古煙散芬靜於龍麝相與頤志文史瘴精典墳禽  
歌辨晨竹閣知夕惜惜乎穆穆乎弗自知其樂也既迺秦樓占  
鳳皋廡棲鸞璞齋以簫史之佚才兼高柔之嫵翫畫眉初罷分  
禮騰神擁髻無繆互擘瑟調便娟寫韻之侶娉媢吹笙之娛余  
於疇曩亦得請業鮑窗聯吟駕社弟兄總律郎伯齊名信極一

時之盛矣惜乎嘉會不常搏雲易遠姊從婚於鄂渚弟侍親於  
句章別離萬端實胚於此然而原鴿隴雁歌泣相聞楚尾吳頭  
江山相望猶未以爲恨也光陰電馳人事波駭分手背面幾逾  
十霜余又遭罹世迹奔走家難牢愁之骨委命於風塵同氣之  
儔接踵於泉壤桓鳥無可塋之羽蜀鷓有未招之魂姊雖遠阻  
川原未遑邁反而采采蘭訊偏匪赴之書多淒淒葛覃并言歸  
之望絕家國森乎千里骨肉滿乎九京此則紅心之彫同根俱  
痛黃蘗之苦在遠彌深者也嗟夫青尊相對誰料今生白首重  
逢恍同隔世星慘慘而將曙風蕭蕭而欲秋訪昔年之懿親黃  
土歷歷尋先代之廢舍白雲悠悠接於目者絕非故懽覲於夢  
者時得新鬼斯即道遙花月怡衍琴樽山川不殊顏鬢俱悴而  
入絲竹之座都疑離歌登綺羅之場有若蒿里蓋死生之故大

夏金集  
矣身世之感多矣輒念積瘁之身今日猶在傷心之事古人所  
無姊以先業零落門基漸衰猶復勗之以顯揚期之以科第庸  
詎知文章自累出處皆非憂患之餘已傷於涕淚著書之願亦  
左於窮愁殉名未甘傳世奚券今觀茲集足證吾生故爲叙而  
刻之以詔來者庶幾因女須之詈慨想於靈均誦道韞之詩兼  
傳夫謝過云爾

絢華室詩憶序

絢華室詩憶者俞子階青悼亡時之所作也其姊壻宗生耿吾  
既題詞簡端且以書來述階青之言乞予爲序子遲之又久未  
有以應也蓋僕亦傷心人也漆室之嘯顧影而自悲雍門之琴  
未彈而先淚况其含思淒婉託旨哀深以奉倩之神傷甘琅邪  
之情死平生離合之故疇昔倡隨之娛觸緒生悲過時猶痛者

乎然而失羣之鳥相隨並集下瀨之水迴復俱流同病相憐同  
憂相恤階青之意僕所不敢辭也則試即僕所曾歷者爲階青  
證之蘭堂祕幄雕房綺檻昔年合歡今則獨處凡夫一屏一几  
一琴一鏡左右位置皆如生前蕭蕭總帷中懸遺象或薦一果  
或供一花茗椀香鑪誓與終古明明相視微波欲流如何不言  
任我悲喚此情此景曷可言也若夫沈沈涼夜風露始淒蟲聲  
幽咽花影歷亂微雲淡其鬢色殘月肖其眉影出戶微步四無  
人聲倚闌徘徊若有所俟少焉淒風忽入空帷自開猶冀此時  
得聞太息至于夜已向曙佩聲杳然角枕錦衾淒其獨旦悲何  
如矣又若風雨之夕房櫳寂寥羅衾不溫抱影危坐窗櫺淒而  
沈黑燈火淡而搖綠撫視兒女嬌眠正酣忽然耿耿夢中索母  
此時悲從中來未有不潛焉出涕者也至於春秋佳節風日淒

麗涼漿麥飯哭于墓門紅淒近淚之土碧黯埋憂之隴忽焉風  
起木末紙灰亂飛若有倩魂來傍衣袂欲別不忍欲留不能顧  
瞻夕陽尤足以淒愴傷情者矣凡茲數端僕固躬嘗之知吾階  
青必有同焉者然階青以烏衣之貴游得紫玉之仙耦雖復曇  
豔難駐珠塵易銷然當其婉孌同居綢繆儷景金屋銀屏之豔  
鈿轅珠轂之遊固歡娛之日多愁苦之日少也若夫鸞廡賃春  
曾同辛苦牛衣擁寒互憐憔悴將愁度日飲淚爲餐回首平生  
殆有不堪追憶者此則僕與階青微有不同者乎嗟乎落葉哀  
蟬人間何世紅心久宿青髻俱彫忽感觸之無端幸斷腸之有  
侶墨枯淚盡聊復序之并示耿吾當亦有同慨也

誥授通奉大夫上元宗公湘文先生五十壽序

予少時侍先君子官四明即知上元宗公之賢讀其文章博辯

雄偉風發濤湧累數千言不窮子固已心慕之歎爲今世之魁  
桀矣既而聞越人士稱其政事不容口一若天下之爲吏者惟  
公賢子固知其言不虛而益以慕公也比長往來浙東西過公  
所治攬其風俗輒想見之焉其後數年重游四明始拜公於郡  
廨行其野原隰沃衍草木羣生之物皆怡然樂也已而游於其  
市則夷獠之所出入商旅百貨之所湊道路晝夜行不休然而  
各安於所業而靡有爭也久之觀其學校則禮樂畢備英奇秀  
偉之士多以百數皆曰此太守之所教也子聳然異之蓋其時  
公守四明才三年而風俗之美已如此此固予向所未見而所  
聞於越人士者今乃見之矣于是作而言曰大夫官至二千石  
有地數百里民戶數百萬趨走之吏自司馬以下皆屬焉位亦  
尊矣然爲天子守大邦撫黎庶一郡之事無大小咸決於一人

自僚屬以至胥吏罔不伺意旨爲喜懼其居恒一動一言皆世  
教人心政法所由興壞也位雖尊治則難焉惟公熟於當世之  
利病得失其爲政之要必本於天子憂憐百姓整飭吏治之意  
故所至罔不治嗟乎使凡有位者能人人如公則天下治矣若  
公者豈非古之所謂良二千石乎何其盛也何其盛也雖然以  
子默窺公之志則更有大焉者公平時嘗取古賢臣行治以爲  
法則而於近代尤服曾文正之爲人每與余抗論天下事鬚眉  
俱張意慨然思有大用於世其志誠偉矣而余之心竊又有  
感也當咸豐之季年寇孽橫發幾危天下幸朝廷聖明能任用  
材傑于是曾文正振起其間提劍一呼六合響應卒能翦凶逆  
鉏暴亂維社稷之安然自亂平至今天下實未嘗一日無事也  
何者夷狄爲中國患久矣幸而無事則猶與我安之一旦拂其



意將驅其犬羊之衆而恣其梟狼之心一發不可復制矣昔文正嘗以爲憂而未竟厥志天下憾之今公既有志於文正之爲人則他日佐天子撫臨萬邦必使名聲暴于四表威稜憚于九服無論海內外大小屬國咸讐服臣順於朝而後成太平興雅頌庶不愧文正之志乎然則擁符竹爲二千石官雖循績卓卓如此猶於公爲不足道也予依公久辱公知知公亦最深今屆公五十壽爰取向所知于公者書之以爲公壽蓋非特致其頌禱而已將爲天下望焉

勸孝廉堂種樹小引 代

昔楚客蘭圃嵇康竹林馨逸之風賈乎遠矣若夫通德之里作帶縈書素師之庭種蕉代紙亦皆眷情嘉卉藉助芳襟茲地精室杳窳旋房便娟樾翠通簾嵐青接戶固劉瓛檀橋之館仲淹

汾曲之堂也肄業諸君子琴箏百家戢香羣籍固將飛翰騁藻  
速春初之萬花吐齊爭輝奪元圃之積玉然而榛蕪迷畝絕少  
靈華竹素成園難尋香種無豔柯以交麗矚無密蔭以供憇游  
致使梧桐院寂雨不成聲楊柳陰疎月都無賴不其惜乎今願  
諸君子植柢珠林移根蓬苑分桑陰於野老乞蘭佩於騷人娉  
花媚竹各植一叢秋實春華不拘一種潤以仙人之水培以隱  
士之泥他日管城作花香國呈秀修幹繁穎爲瑯嬛助妍辛楣  
藥房爲宛委增麗某某當五花判畢四野雨甘亦將與諸君就  
桃李之陰話桑麻之事編緝蒲柳擷餐杜蘅則亦藝苑之美談  
明州之韻事也至若伸偃雨之幹倏成蚪龍挺干雲之姿鬱作  
梁棟則維諸君子共勉之可矣

上秦澹如先生書

澹如先生侍右前者辱賜書所以愛之者甚厚至謂論文之旨深得奧窔可進而至於古人此則稱許過當非所敢承於長者也迂儒言論久為世所唾棄今先生憫斯道之將廢以其有志於古慤慤誨勉之然則自今以往宜如何奮勵以副先生期望之深耶濂少駑鈍自度於他藝能無所成者於是壹意專志於文章在古人中尤喜讀太史公昌黎永叔之書學之十年而未能至也則竊竊焉知其難不敢妄有所論著及其偶一握筆見者多怪笑之謂其背于時也夫衣服人莫不喜其新也見有古衣冠者人且怪之矣蓋囿於所見然也然則如太史公昌黎永叔之徒使生於今之世其可怪不更甚哉世之人習為舉業文字上者取科第次亦博聲華獨好之士多困阨無所遇則古文者世方以為不祥之物亦孰有為者哉往與亡友姚臣言之未

嘗不爲之嘆息也姚臣於此事頗深雖朋輩怪笑之卒不易志故其爲文最醇雅得古人之意濂絕愛重之謂他日足以繼先生而起者惟斯人耳夫人於舉世所不爲之事獨能殫精竭慮窮日力而爲之斯謂難矣然而竟困阨無所遇以死使吾黨之士無所勸濂誠私心痛之蓋濂向之不專事古文非獨以其難也亦以有姚臣在也及姚臣亡始慨然憂斯道之將廢欲竭其心思材力而爲之然終歲奔走憂患卒卒未知其果能否也及今海內方多難時事有不可問者自顧無經濟才出而無所濟于世又迂濶不能投時好俯仰身世其無所遇合必矣然君子疾沒世而名不稱濂雖駑鈍尚思有所表見亦惟于荒江老屋求其可信者以傳之無窮使千載而下讀吾書恨不見吾乃爲休耳先生以爲能焉否耶久病不能爲文字茲感先生言聊佈

其懷抱維垂譽焉

致宗湘文先生書

光緒七年秋九月金匱鄧濂頓首上書湘文先生閣下曩在四  
明獲依有道惠問殷渥情文周摯校卷之暇琴酒互答遂乃蒞  
枕圖史激揚古今辨雌霓之諧聲逞碧雞之雄辯當斯時也鄒  
枚並集山葛同酣頓覺寒飈失威娟月如笑雖十日之飲有千  
載之思焉何則柯竹委路見蔡邕而貢其音代駒偃塵逢伯樂  
而振其步也辭別之後暄凄倏更而悠悠白雲依然望慕維侍  
奉曼福起居勝常幸甚幸甚濂自回吳下曾作楚游欲爲王粲  
之依人未遇荊州之好客且黃鵠既去仙人邈然鸚鵡不來風  
流盡矣顧此不樂悵惘而歸削跡山樊約及三月夏杪始得移  
南國之帆酌西冷之水耳今者青霜迎節白藏司時煙嵐清而

野景涼風篁淒而庭戶蕭蕭柳色映面皆黃瑟瑟蘆花縈愁  
盡白闕河顧影星露遙征羈旅之人能不落淚矧以萬憂拂性  
百疾叢身東陽之瘦可憐北郭之寒已甚素衣欲化何處尋家  
金綫無聊便如怨女卜歸期于千里空望刀環添寒緒于三更  
寧消砧杵不必高堂擊筑絕塞聞笳而已覺氣盡猿前魂銷雁  
底昔梁鴻發登岳之謠阮籍有回車之痛由來志士每值窮途  
莫不減壯采於黃塵凋華顏於青鏡而况早罹酷罰貌是流離  
喬蔭已渺于山南當歸空貽于堂北邱園搖落兄弟乖違夕播  
晨遷星離兩絕青楸霜落已拱楚窆之墳白楊風淒常有桓山  
之哭臨淵而望豈見泉塗入隧而觀偏多骨肉縱使逝川未迫  
靈鑠堪陳而撫念存亡何能自己夫以臣門寥落之年加之客  
路棲遲之會亦祇望故交分宅良友指困延此視息耳而比年

里閑親舊凋零流水不歸孤蓬奚託渺渺一世若秋雲之墮空  
煒煒一身比殘星之綴曉感茲人事愴予生平每當蕭序淒寒  
離筵近暮風涼笛脆日淡墟空便已扶路生悲停觴掩泣此則  
回風往日固難消楚客之愁載酒焚香獨甚此庾郎之感者也  
閣下海內風流江東獨秀敷韓延壽之教鐘鼓流聲握言子游  
之文弦歌起化加以天才風逸麗藻霞蒸工連林之瓌辭操雅  
豔之絕格凡夫羽陵落簡汲冢遺書龍威靈寶之編岐鼓瑯臺  
之刻莫不流譚若海著錄成帷豈直杜預有擅一之名許慎負  
無雙之譽濂早受楹書粗知雅訓亦欲極旭歷銳銀之志盡鉏  
植縱舍之長而近以危憂復多疴恙桐憐爨冷竹怨心空瘦如  
家今之腰綺盡黃門之鬢市酒三石豈足銷愁載書五車詎堪  
充食是以不因鍾子遂欲碎琴未遇士衡亦思燒研至于劉向

九歎昇之五悲雖有涉於篇章實無關於作述夙承知愛謬賞  
蕪詞倘其登駿骨以錦緹假蛾眉以明鏡則鮫人淚盡猶想成  
珠園客絲殘未忘作繭閣下其有意乎鱗羽不絕載佇瑤華赤  
城霞飛心與俱逝惟善蓄光彩益崇令名書不盡言當邀鑒答  
凍頓首

與譚復堂書

復堂先生有道鄂渚爲別屢易暄溽翹首玄亭靡時不眷前者  
知錦帆過吳亟出金閨門奉訪而繞岸窮矚罔測青蛉舟者煙  
水迷茫悵然而返朱明值序起居何如伏想神明益茂著述益  
富甚休甚休秋初當可錦旋屆時能迂道吳門爲平原十日之  
飲否盼甚盼甚凍橐筆吳楚所遇多窮息交絕遊誓不復出蟄  
景書局行將十年短簫久瘖長嘯誰和前年平原師督儲來吳



招之入幕師弟之誼未容固辭備值十金藉資賃廡近歷落莫  
不堪爲先生道也瘦碧語石時過從譚宴之餘輒不禁神往左  
右瘦碧續刊樂府竟地益高不佞曾爲作序借彼盃酒澆我塊  
壘可一笑也年來大著詩文日記篋中詞聞皆有續刻者亟欲  
一讀幸即惠寄數冊陶子續詩集聞已刻于鄂中當尚易得亦  
求覓寄一冊盼禱盼禱頃在崑山訪諸十一連日談藝頗樂披  
襟相對清風灑然同念先生不置翦鐙作此畧抒所懷敬頌起  
居萬福鄧濂叩頭

致宗子戴書

二月十日濂再拜白子戴足下無恙書來追述先德感愴家難  
雖古詩人蓼莪之篇蒙楚之什亦無以過之維時商飈奏哀羣  
木淒瑟忽此根觸不自知其涕之殞落也僕年二十六遭先君

子之喪未三年又喪母身本窶人子無寸田尺宅可以治生時復銜悲出游忍淚求食涼漿麥飯一祭無時痛可言耶然而黔婁有婦辛苦與同以爲老死牛衣中當常共相保何圖賦命之薄卽此窮愁之侶亦難久留天意沉冥於何可訴俯仰身世心骨悲矣含愁茹痛綿歷歲年何足又道今以哀詞所感聊爲吾弟陳其苦衷耳至於近歷落寞尤不堪言始來吳門從事書局又爲陸廉使掌其記室卜居蝸壳之內丐食蠹餐之餘蓋非得已今則書局告撤廉使亦解任去矣素多病善憂邁茲貧瘁生意遂盡每佳風日如在淒煙苦雨中忽不自知其連蹇蕉悴竟至於此也自維生而情弱爲二親所驕又不幸早識文字一卷之外百無所知牧豕賃春皆非所習弱冠以後宦學四方橐筆傭書幾更十主長鋏俱冷短篇欲瘖况夫世嫉雋異俗疵文雅

不遇識者雖元瑜孔璋亦俳優畜之耳而欲藉我十指贍此八口固知難矣世變日亟正不知餘生尚有幾何徘徊人間亦復何所依戀獨念平生結習篤嗜詩文橐草叢殘多未寫定脫復奄忽將并此窮愁著述悉委良蟬亦可恨也吾弟近所遺值誠亦可悲然較僕生平固已遠勝誰謂荼苦其甘如薺所望隨事寬譬有以自釋耳前聞爲令先君排比遺書頃已斷手否方當繼述之盛願勉旃毋過悲春寒千萬保愛濼白

贈榮祿大夫上元宗府君墓誌銘 並序

自法夷寇閩各海疆皆震動於是上元宗君源瀚以寧波府奉檄治海防君既受任即條陳六策及設施所宜謀畫周悉甚至越光緒十一年春正月法人遽犯鎮海連巨艦十數雄踞重溟戰不克亦不退當是時羽檄紛至譎言叢生其諸將率慎固封

守而已若夫大敵當境而民不擾翳君之能及二月六日君以父憂去任大府知其事即特奏天子奪情留君并馳檄抵寧勉君以移孝作忠之義君聞命哀懼乃上書曰源瀚忝竊祿位十稔於茲其能黽勉從公尚無缺失者皆吾父之訓自維生命多舛遭值時艱養既不能定省並闕今且疾不嘗藥殮不憑棺斯爲罪人遑問他事雖大命敦迫宜効馳驅然崩裂之餘氣息僅屬即使強起承命於國無補徒愧其親孝治之朝又焉取此請得終制少償厥辜如其明聽難回甘就斧鉞書上大府見其意甚戚始許給假五十日俾治喪焉君於是以前月日奉喪回常熟即卜於某月日葬父於某山之原先事之月貽書於金匱鄧濂曰吾今得奉父殯歸矣然念世變如此陵谷不可知吾既獲私於君且先子所以訓不肖者惟君知之最諗葬有日願求有

以誌其藏焉乃爲銘以貽之銘曰

宗有名德諱曰學梁字曰懋亭在幽彌光中歲流離運丁陽九  
求濟時艱家室何有內周戚族外撫流庸手掩萬紫黃壤是宮  
吳荒越災十室九瘠上藥一九瀕萎而起維蘊之厚而施之遐  
誰曰不報聿昌厥家有子維三絕塵焱忽長曰得仁半駕而蹶  
次即源瀚古吏之良其季得福亦相頡頏有孫有曾熊熊然角  
多不備書其才俱卓昔昔之日公將去寗哀哀仲子泣拜於庭  
子曰歸乎養親吾職父曰往哉王事宜力百年薤露四海風煙  
委子於國厥心恫焉嘉慶八年受生九月壽八十三示疾長畢  
世居建康今遷海虞菟裘既辨歸于其居厥配曰劉式光翟第  
先公而殂今則同瘞尚湖之北虞山之南我銘其碣百世可風

顧貞女墓表

貞女字淑筠無錫顧維賢長女也性至孝嘗禱天以愈父疾宗  
鄙胥稱之女秦出也舅曰湘臣爲子僚壻愛其甥恒就子徵佳  
子弟欲爲之擇所歸子語之曰吾姊夫錢塘諸璞齋有次子曰  
以旅者亦美才也年又相若必得壻莫高是子兩家卜之吉遂  
訂姻焉時以旅侍父寓蘇州故嗜書及聞所聘賢室則讀益苦  
年十九婚有日矣忽病初甚微其家故安之不意其變也錫之  
俗既請期女氏必先日醴女是日也女始冠帔告廟畢筵於堂  
席南嚮戚族畢會蓋已儼然某氏婦矣顧氏既醴女將行而以  
旅赴至貞女倉卒間慟幾絕由是屏居一室麗服珍珥一切斥  
勿御春秋佳日家人或聚處笑語貞女獨悽然顧影竊淚下見  
者莫不憐也諸氏即欲迎女歸以成其志而顧氏憐女少未許  
且祕之予聞而歎曰嗟乎惜哉此女殆將死矣未幾果病鬱鬱

死臨訣猶泣白母願必歸諸氏葬許之乃瞑其志其遇蓋可悲也諸氏聞之既痛其子又哀貞女之志乃具舟迎其柩歸距以旅之葬逾二年未能合窆也而其墓右適有餘地一若留以待貞女者嗚呼奇矣已璞齋以書抵予曰旅兒之聘也子與秦君實成之今不幸至是假若貞女之行泯不傳於後誰知吾兒有聘婦卓絕若是者乎於是爲備論之以報璞齋且以風其鄉里

### 先妣事畧

先妣于宜人嘉慶二十一年六月二十六日生年二十三來歸凡生子四人長紹曾次溱又次濂又次源女二人長瑜適錢塘諸氏次珍適同里顧氏子女中大姊瑜最孝宜人亦最愛之比年姊夫官楚北宜人憶女甚遂以辛巳冬之武昌明年秋八月忽得中風疾危甚九月濂赴楚迎歸而宜人已半體枯矣濂家

貧惟傭書四方以爲養自母病乃不敢出游而宜人促之力且曰全家賴汝一人活汝一閣筆則皆餓死矣於是濂不得已遂行及瀕行辭母宜人悲不勝把濂手曰吾萬一不能待汝歸汝客中聞耗勿過哀傷乃體也濂失聲哭宜人亦哭既又強笑以慰之且揮之去今年春濂自越歸省見宜人神致如前良慰值宜人誕日乃強扶母坐與其婦前起爲壽諸孫雍雍然拜於前宜人顧之甚喜已忽不樂曰明年能復爾乎皆應之曰能則又喜光緒九年八月十二日宜人卒貧甚無以殮發篋得敝衣數事先是宜人嘗爲子婦言家貧甚吾他日死可殮吾以故時之衣勿乞貸累親戚也至是竟如宜人言嗚呼痛哉宜人諱懿字靜宜金壇于氏考徵君諱喬齡母陳氏徵君博雅有異才子女皆親課之故宜人自幼即通文事及歸我先君遠事先王母最



得王母歡王母卒每祭未嘗不泣庚申之亂先君子方官浙東音耗隔絕宜人子身攜子女更歷危難卒達於浙東復得與先君子相見未幾又避地之崇明時先君子從軍滬上宜人乃自課瀛兄弟讀而與兩姊作女工易錢以爲食故數年之中雖流離顛沛而一家未嘗有凍餒之憂先君子嘗流涕而以爲可感也既聞外王父歿於亂諸舅俱喪宜人一慟幾絕復走千里於兵火中得父骨而歸葬於其鄉并爲置祭田而去宜人平生行事多此類同治初先君子補官慈谿宜人始獲稍安可不憂衣食而勞苦如初先後嫁兩女爲四子娶婦力幾瘁然心固樂之不以爲苦也性嗜吟咏有所作輒命瀛兄弟和之及乙丑年仲兄卒宜人心傷之遂輟不作庚辰年先君子棄養於時八口熒熒無以爲生計宜人獨持家務謀慮枝梧常忘寢食無何伯兄

仲姊相繼卒宜人以暮年屢遭慘酷常悲哀不欲生所居室中懸有先君子小像宜人至無聊時則對之垂淚家人雖見之然恐觸宜人痛亦不敢勸也宜人性好施予雖處極困猶典衣以卹鄰里生平不記人怨遇之一以誠故與之居者皆感而化御婢僕有恩雖至饘粥不繼皆不忍去故自宜人卒內外長幼以及三黨之臧獲無不失聲者平時訓子女最嚴及暮年濂兄弟雖有過亦不忍訶責予妻告予曰姑自君出門後值大風雨則竟夜不眠口中惟喃喃誦佛號及至君將歸每至日暮必倚閤以望夜聞剝啄聲必喜呼滌生曰汝試覘之得弗汝父歸耶滌生濂之子宜人所鍾愛也蓋宜人自十年以來更困苦慘痛無一足以慰其心惟於濂歸省時母子相對以爲樂因念濂少時患瘡頗劇痂垢滿面鼻涕垂尺餘時時枕母膝卧宜人以手撫

摩之始少安追維一二彷彿在目今乃何可再得中夜聞小兒女呼其母乃益思吾少時嗚呼天降罰於濂使之窮餓奔走亦可以已矣乃又使之爲無母之人耶嗚呼痛哉

### 秦姚臣哀辭

光緒八年夏五月吾友姚臣自廣東病歸時予亦將以秋試返里先貽書告之謂可得一月相聚矣乃未幾而姚臣赴至嗚呼予與姚臣交十餘年其間各以事阻不相見者六七年其懽然聚首以文章道義相切勸者僅數年耳予少長于外初與姚臣未相面也十七八時以童試歸里始與姚臣訂交相得甚又因姚臣交范子孟和張子曉帆子時年少氣盛好劇飲大醉不復就繩檢三子者醇厚端謹世目爲賢人君子顧皆與予相狎而不以爲狂由是予每歸必從三子游置酒酣嬉此唱而彼和或

辨論未已間以詼諧當此之時以爲朋友之樂無有加于此者矣其後予以衣食奔走四方當風雨獨處未嘗不歎向者之樂爲難得而易失也去年夏四月與姚臣遇于滬上見其顏色憔悴心竊憂之拉與飲則相對愁坐無復曩時意矣自此姚臣遠羈於廣東而孟和曉帆相繼殂謝予里居無聊意不能自解每山砧水涯顧影獨弔既悼逝者輒思姚臣方謂二子者既不可復見而與姚臣雖異地相望庶幾終得一見耳而何意終吾之生亦遂不可復見嗚呼予窮于世久矣數年來同氣之戚零落殆盡所賴二三知交相慰藉耳乃并此而亦奪之然後歎天之于吾何如是其酷而世之賢人君子竟不能倖而延一日之生爲尤可痛也姚臣之亡也其叔祖淡如先生爲文哀之詳述其學行茲故不具獨載吾兩人交游離散之跡以誌吾之悲焉辭

曰

何吾子之精爽兮乃戢影于黃土終其身不得沾一命兮嗟平生之徒苦豈其厭濁世之不可居兮執丹漆而從尼父問何罪于皇天兮使吾子之已于斯吾欲叩九闕而上訴兮惟虎與豹其阻之雖千秋萬歲終不得復見子兮吾之悲其何已時

明翠樓像贊 并序

己丑秋暮余歸自冀北薄遊城西偶憶薛濤之居言尋蘇小之宅階前碧草漸欲迷人簾底紅鸚猶能認客停花外之嘶騎聞樓頭之墜釵題箏昔年倚袖今日蓋明翠樓者時方落成余別時猶未構也觀其鏤玉爲柱圍花作茵就水碧而開筵借雲藍而補壁斜照當鏡嬌分額黃遠山入簾秀奪眉綠烟昏雨曉春煦秋陰可以消憂可以遣日况復少屏塵雜雅耽琴書傍幽蘭

而讀騷對玉茗而題曲背月覓句花影通身低鬟校書粉痕汚  
冊茶煙分其袖翠墨暈亂其唇朱飄飄乎有拔俗之思出塵之  
概焉然而鴉媒不好鸚母多猜悵司馬之不逢矧文鴛之未嫁  
命如弱絮自分飄零骨比香桃誰憐憔悴凝粧而梁燕訝顧影  
而池魚愁紈扇欲冷怨秋風之未知羅幃初開恨明月之來照  
金難鑄恨玉易成烟爰寄影於鮫綃冀傳神於螺墨脂樵粉悴  
倍可魂銷頰暈眉顰暗憐神似屬因昔眷來索新詞僕本恨人  
何堪覩此夫沉身樂籍屈志女閭婉孌送迎之場綢繆新故之  
際顰笑非我愛憎由人誰謂嬋娟堪茲推辱然當翹袖一舞曼  
聲一歌見者色飛聞者腸斷眉語初接則爭投千金眼波偶交  
則如被九錫雖淪落不偶而聲華彌妍亦足以耀彼芾羅豔其  
桃李若僕者少雁貧賤長歷風塵遠閱九州幾更十主入市買

賦同韓娥之嚮歌出門寡諧類孟女之偃蹇何嘗不高髻從俗  
修眉入時而絕豔之色受誣於畫工希時之音動擯於輦俗長  
缺誰問短簫易瘖何吾生之多艱并彼美之不若嗟乎落花入  
劫猶憐茵溷之殊泥絮論因同有飄零之恨對春風之圖畫感  
秋士之生平事本無聊誰云非偶敢援絕代之例寫此傷心之

詞

贊曰

婉矣之子瑤臺謫仙眉瘦疑月髮淒欲烟掩愁弄笑匿恨呈妍  
敢曰非願人生可憐燕勞同命萍絮成緣鑒予身世保爾嬋娟  
余早歲學作駢文石瞿先生以爲可教因語余曰駢文當  
以六朝爲宗六朝以蘭成爲最思舊銘哀江南賦吳明徹  
墓誌諸篇氣韻沉鬱蒼涼其筆法斷續離合處均得龍門

神理世但賞其詞采猶皮相也故先生自作駢文古豔幽  
秀上規齊梁此文作於光緒戊子鈔存篋中四十年矣南  
湖蒐采先生遺著因錄寄之楊壽栴識

真金集卷七

武進劉亞康書



吾校讀奩集如失羣之雁斷腸之猿悽愴之音幾掩卷而不忍卒讀未嘗不歎其遇之窮也古云得一知己可以無憾奩集早露頭角爲吾從祖都轉公外舅宗兵備公所激賞而譚復堂陶子鎮諸名流亦相與唱和不絕一時名重浙東西蘇藩黃子壽江督陸春江皆賓禮之不少衰嘗一爲南皮座上客以厄於臧倉而歸觀其公卿倒屣詩賦緇衣固未爲不遇也顧之數公者噓枯蘇槁則有餘而卒不能改造詩人之命其窮也固宜竊讀其致宗子戴書涕淚滿紙最傷心者窮愁著述多未寫定脫復奄忽悉委炙蟬引爲一生之大恨與子厚之胎書禹錫以遺草累故人同一意也烏虜茂陵遺草閱之篋笥者三十餘年吾懼其不傳也得南湖而付之千秋亦足慰亡友於地下矣乃不幸而南湖死南湖一若自知其將死預以寫定之草付託於可

桴可桴在補輯之時大病幾殆子戴且欲乞所輯者而整理之孰知可桴卒以不死而完其付託之責而子戴則編次甫竣而死矣雖欲忍死爲一文而已不可得死生之變幻有如此耶青簡何辜幾視爲不祥之物奩有知真當痛哭所幸文字有靈靈魚不食三十年來之寂寂無聞者乃得與歷代諸作者雍容揖讓於一堂不能不歎南湖可桴諸君之高義爲不可及奩身後之遇亦未爲不幸也甲戌仲冬秦敦世跋

武進劉亞康書